

萬 有 文 庫

第二集七百七種

王 雲 五 主 編

宋 詩 紀 事

(十)

厲 鶚 馬 日 瑄 輯

商 務 印 書 館 發 行

宋 詩 紀 事

(十)

馬 日 瑄 輯

國 學 基 礎 叢 書

萬有文庫

第二集七百種

總編 莫者

王雲五

商務印書館發行

宋詩紀事卷六十二

錢唐厲鶚輯
吳毛德基勘定

李元白

元白字希太奉化人嘉定十年進士任永州通判有四家胡笳詞
寧化人工詩嘗集杜句爲一編又集大觀昇平詞進之授初四官二人未知孰是
日谿按陳鳴鶴東越文苑有李元白者

廢寺鶚按詩林萬選作李杜

溪沙橫漲水痕平。閑扣雲關壁半傾。殿上土花人不到。斷甃支睡岸蟬鳴。
後村千家詩

陸德輿

德輿字載之崇德人。按之諸從孫。嘉定十年進士。官至吏部尙書。

題資福院平綠軒

帶市人煙遠。連村野色幽。山從天際出。水抱檻前流。茅屋無端礙。松醪有意留。因懷陵谷感。無語對沙鷗。
至元嘉禾志

鄭清之

清之字德源。鄞縣人。嘉定十年進士。史彌遠薦爲魏憲王府教授。理宗嗣位。以定策功。累拜太傅。

左丞相封魏國公致仕卒封魏郡王諡忠定有安晚集

癸辛雜識清之淳祐再相政事多出姪孫太原手昏繆食汗有人作詩譏之云先生自號爲安晚晚節何爲不自安

香山貓食粥

梵宮新遣兩狸奴晨粥飢餐食肉如料是伊蒲三昧熟不知遶膝訴無魚

詠茄

青紫皮膚類宰官光圓頭腦作僧看如何緇俗偏同嗜入口元來總一般

冬瓜

剪剪黃花秋後春霜皮露葉護長身生來籠統君休笑腹內能容數百人以上安晚堂集

淨明院郊壇齋宮

齋宿虛閑只淨明俗氛暫洗覺身輕半山雲腳炊烟溼一枕松聲湖水鳴對語老禪眞法器譯經新誦出僧槃歸翻貝葉蓮花頰猶帶招提月影清咸淳臨安志

題雪竇妙高峯

陸地芳洲擁翠翹巨靈穿石滾雲濤搏空蒼鳳欲飛舞奔海玉龍爭怒號萬象橫陳坤軸富一亭平挹月輪高獨醒未覺孤清景笑酌寒泉讀楚騷延祐四明志

姚鏞

躡字希聲。號雪蓬。又號敬菴。刻人。嘉定十年進士。吉州判官。以平寇功。擢守贛州。貶衡陽。有雪蓬集。

寓雪川

王戴溪頭小隱仙。漁翁引上雪溪船。幾回倦釣思歸去。又爲蘋花住一年。

春夜曲

金魚鎖合蘭釭小。酒不支愁尋睡早。梨花欲墮風更寒。燕子不歸春自老。流蘇護帳香雲結。三十六簧清吹咽。緘書欲寄湘水深。城烏啼落花西月。

桐廬

兩岸山如簇。中流鎖翠微。風帆逆水上。江鶴背人飛。野廟青桐樹。人家白板扉。嚴陵臺下過。不敢浣塵衣。

訪中洲

踏雨來敲竹下門。荷香清透紫綃裙。相逢未暇論奇字。先向水邊看白雲。以上雪蓬集。

題衡岳

萬山環拱祝融尊。紫蓋前趨若駿奔。火德中天扶日月。炎方一柱鎮乾坤。久無執贄來侯牧。空有穹碑立廟門。北望中原青一髮。淒其四岳正塵昏。

離衡州

天恩下釋湘壘客。心事悠悠月滿船。種藥已收思病日。著書不就負殘年。雜花怪石分人去。老竹荒亭入

畫傳歸夢鑑湖三百里。白鷗相候亦欣然。

法華寺

入門松逕幽。樹杪見鐘樓。客至犬迎吠。香消僧出游。水花迎晚照。風葉引涼秋。欲作居山計。吾盟在白鷗。
以上梅磻詩話。

秋風

顛氣薄衣襟。疎聲集暝林。鴈驚烟塞夢。鱸入故鄉心。靜落階前葉。清傳月下砧。更憐茅屋破。愁絕少陵吟。
後村千家詩。

趙東野

東野、贛州人。

題姚雪篷騎牛像

牛像無笠又無蓑。斷隴橫岡到處過。暖日暄風不常有。前村雨暗卻如何。

鶴林玉露姚鑄爲吉州判官。以平寇論功。不數年擢守章貢。嘗令畫工肖其像。騎牛於澗谷之間。索郡人趙東野題云。蓋規切之也。居無何。忤帥臣以貪劾之。貶衡陽人服東野先見。

王 埜

埜字子文。號潛齋。金華人。嘉定十三年進士。理宗朝。拜端明殿學士。簽書樞密院事。提舉洞霄宮。卒。有文集。

劉後村跋潛齋詩本學術隆師友扶忠賢。絀邪佞愛君如愛親。憂民如憂己。合於詩人之所謂六義者。

絕句

雨重垂楊綠未乾。一渠流碧弄潺潺。暝鴉過盡東風惡。獨倚衡門看遠山。全芳備祖。

贈凝神菴朱高士

拋卻林泉趣。卓菴臨近村。兩窗吞日月。一室養乾坤。菊露秋籬重。松風午枕喧。蒲團數胎息。不肯學傍門。赤松山志。

上霄洞

吾聞北山陽。巖壑寶相竅。何年開鴻濛。隨地通窾奧。朝真高難攀。冰壺深莫料。詭怪者雙龍。崖室最蒼峭。上霄雖晚出。煙霞寄孤嶠。尋源陟空山。訪仙款遺廟。始探頗褊窄。稍入亦窈窕。上穴由梯升。傍穿須火照。青厂既鬱鬱。白乳仍嚼嚼。旁通多曲折。幽眇轉奇妙。窮探豈不欲。所畏自微爍。昏昏蝙蝠飛。悄悄鼯鼯叫。或疑洞靈出。或恐山鬼嘯。又聞村中氓。鑿石供灰燒。俄然得深竇。傾城盡登眺。何人不好事。窒塞迷其要。此雖幸獨存。荒僻委蓬藿。儻移傍京邑。車馬日號召。了知神仙事。茫昧不堪弔。豈無隱淪士。巖築像唯肖。畚田沃可耕。澗水清可釣。平生愛泉石。自謂飢可療。喜茲近吾隱。來往足談笑。此意復誰論。行行逢荷蓀。金華府志。

清明日游鶴林寺

蒿目黃塵擾擾開。出門偶到鶴林山。仙花僧竹俱陳迹。白日青天祇自閑。
竹院閑來春正遲。籀龍猶自有孫枝。野夫豈識尋芳意。爲愛光風面面吹。
鶴林寺志。

李仲之

仲之官統制。爲金人所獲。不屈死。

獻帥府經歷

一飯感恩無地報。此心許國已天知。胸中千古蟠鍾阜。一死鴻毛斷不移。

劉祁歸潛志。貞祐南征。獲一統制官李仲之者。帥府經歷官。劉達卿召而飲之。且誘以降。將宥焉。仲之獻詩云云。竟就死。

蔣重珍

重珍字良貴。無錫人。嘉定十六年進士第一。理宗朝。歷官集英殿修撰。刑部侍郎。致仕卒。諡忠文。

題蕭岳英常州朱氏畫草蟲卷

常州草蟲天下奇。女郎新樣不緣師。未應好手傳輪扁。便恐前身是郭熙。
筆端生意已如生。點綴沙蟲機不停。淺著鵝黃作胡蝶。深將猩血染蜻蜓。
咸淳毗陵志。

自題雲龍小隱

龍山錫山兩山雲。出能爲雨入氤氳。雲山之氣有斂散。斂散之理斯爲神。我廬山下有小隱。雲爲動兮山爲靜。悠然而出物之澤。屹然而峙地之鎮。我見雲山喜與俱。雲山無情不見余。我比雲山多此見。日月相

看雨不厭常州府志

徐鹿卿

鹿卿字德夫。隆興豐城人。嘉定十六年進士。理宗朝。累遷太府少卿。兼右司。權給事中。歷禮部侍郎。提舉鴻禧觀。致仕。卒諡清正。有泉谷存稿。

湛泉酌餞黎丈有詩壁閒。遂次其韻。

幾人林下賦歸休。公獨翩然汗漫遊。味道不妨寒似水。入時須用曲如鉤。從來鄰父邀皆去。底事官曹挽不留。後夜相從邨復得。月明千里故山秋。

鬱孤洞天

夢跨長虹海上遊。寒生肌骨一壺秋。好風吹得詩魂醒。自寄人閒羣玉樓。以上泉谷存稿。

章鑑

鑑字君玉。號藝齋。昌化人。嘉定十六年進士。官至華文閣待制。

林洪山家清供云。章藝齋宰德清時。雖槐古馬高。尤喜延客。然飲食多不取諸市。恐旁緣以擾人。

金錢花

巧冶都由造化爐。風磨雨洗好形模。花神果有神通力。買斷春光用得無。合璧事類別集。

车子才

子才字存叟其先井研人家湖州嘉定十六年進士理宗朝歷官權禮部尙書兼直學士院國史實錄院修撰以資政殿學士致仕卒諡清忠有存齋集

南園

買家喜傍水精宮正是南園故址中我欲築堂名六老追還慶歷太平風

齊東野語慶歷六年吳興太守馬大卿會六老於南園酒酣賦詩教授湖學安定胡先生爲序其事六人者工部侍郎簡年七十九司封員外郎范說年八十六衛尉寺丞張維年九十一俱致仕劉維慶年九十二周守中年九十五吳瑛年七十二皆有子弟列爵于朝詩及序刻石園中後園廢爲牟氏之居存齋詩云

趙以夫

以夫字用甫號虛齋長樂人嘉定進士知漳州理宗朝歷資政殿學士吏部尙書同修國史

詠蘭

一朶俄生几案光尙如逸士氣昂藏秋風試與平章看何似當時林下香全芳備祖

戴榭

榭字文子永嘉人嘉定中進士湖南安撫司參議

松臺王綽云永嘉之作唐詩者首四靈繼四靈之後則有劉詠道戴文子張直翁潘幼明趙幾道劉成道盧次夔趙叔魯趙端行陳叔方者作而鼓舞倡率從容指論則又有瓜廬隱君薛師石焉

白鶴寺

子晉昔游處。平臺片石成。寺名猶記鶴。松響卻疑笙。巖壁飛雙瀑。金沙照一泓。野人豈仙伴。隨鹿過溪行。
前賢小集拾遺。

送廬陵胡季昭夢昱以上濟邸封事貶象州

古郡荒涼象跡新。君行況是去裝貧。此愁欲別柳邊雨。明日初程桂外人。從古不多如意事。加滄宜惜未歸身。春風未必天涯盡。木斛花開瘴水深。
象臺首末。

李義山

義山號後林。嘉魚人。嘉定中進士。樞密院編修。

題梅壇毛慶甫雲悅樓

雲本無心悅者誰。華陽去後少人知。欲分半席無因到。一片飛來是覓詩。
梅仙事實。

幸元龍

元龍字震父。高安人。舉進士。理宗朝。任朝奉郎。郢州通判。有松垣集。

遊越山

上得越山半。方壺紫翠環。山幽春溜響。花落午陰閑。梵刹依松外。仙家在竹閒。小窗借高枕。風定鳥綿蠻。
松垣集。

陸 屋

厚、號盤隱。官府判。嘉定中。與僧居簡倡和。

冷泉亭放開水

泉聲飛出閘。委折綠陰閒。此地原無暑。多時不入山。草敲疑石墜。水定見魚還。難得同猿鶴。游吟半日閑。
成淳臨安志。

留 碩

碩、字仲志。魏公正之子。嘉定閒。守南恩州。

陽江勸農

春風句引出郊行。小隊迢迢草路平。自笑田蕪不歸去。三千里外勸人耕。
肇慶府志。

錢 厚

厚、字惠載。嘉定中。常熟令。號竹巖。有竹巖拾槩。

漱石軒

危石參差上霄漢。中涵萬壑冰玉清。與誰流出洗塵滓。遺我一林風雨聲。
洞霄詩集。

崔起之

起之、嘉定中爲宣城尉。

題萬翠亭

亭在旌德姚司戶壩。

名山繞旌川。未易千百計。棲真聳其西。二幕青扞蔽。柳山與龍山。連亘殆無際。大鼇從東出。石鼓相軒輊。

華容接鶴形。蔓衍若難制。擁南有梓山。盤屹萬里勢。有殿曰甘露。岡峯插天地。玉壺枕其北。鳧山復相比。礧嶺介鳳凰。大洞闡天祕。姚君天韻奇。氣概高一世。胸中飽丘壑。作亭非壯麗。獨能極遐觀。領略萬山壑。蒼玉無遁形。秀色歸一視。卻笑昔人非。所見殊無異。東亭亂清暉。僅得翠微意。東山羅紅帶。未免聲色累。唯君別幽趣。徜徉樂清致。青山不改舊。領客時一醉。寧國府志。

史彌寧

彌寧字安卿。鄞人。浩之姪。嘉定中以國子舍生蒞春坊事。帶閣門宣贊舍人。知邵陽。有友林乙彙。寄雲夫

黔國相逢地。蒼燈共夜籌。雲龍念東野。柏馬歎之累。郵傳一分手。河山再見秋。交情如繾綣。不在寄書稠。

鄭中卿惠螭蛭

客窗不作侯鯖夢。隨分魚鰕薦一杯。食指怪生連夜動。敲門郭索送詩來。

寄慥齋弟

鷗鷺逢人問歸信。三年作客負滄洲。詩袍醉帽黃埃底。羞見扶風馬少游。

春暮同社會飲張園小樓得飛字

殘紅委地水平池。楊柳陰陰鶯亂飛。山色滿樓新雨後。一簾風絮卷春歸。以上友林乙彙。

史彌鞏

彌鞏字南叔。浩從姪。嘉定中進士。江東提刑。

題羊左墓

餘耳當年刎頸交。所爭利害僅豪毛。一朝泚水相屠戮。豈識羊哀左伯桃。景定建康志。

史安之

安之字子田。浩之孫。嘉定初知嵯縣。求高似孫作剡錄。邑之文獻藉以不墜。

高山堂和節度梁公韻

在寶積寺後。僧擇璘建。

關憑嵬構敞軒局。一望塵凡目暫醒。巖嶂遠供千疊翠。松篁還聳四時青。登臨雅愛恣吟筆。圖畫尤宜作座屏。我欲從君遊未得。壯心方欲竄南溟。嵯縣志。

李 訖

訖字誠之。號耀菴。晉江人。雲龕居士。邴之孫。嘉定中。以朝議大夫。敷文閣待制。守建州。後爲戶部侍郎。

謁丞相祠觀八陣圖

人言忠孝不磨滅。神物護持存水滸。千家陵谷幾變遷。此石不移自章武。本由黃帝古兵法。六十四以八爲伍。髯孫且懼仲達走。賊操遊魂何敢拒。刻銘沙沒水底碑。教戰石存山下鼓。一片丹心天地閒。萬世聞風猶禦侮。我來起敬凜如生。再拜一言公必取。瀼流東截陣圖前。寢隳城壁頽民宇。能安拳石止波流。願回讓思思民撫。常使夔人知感公。踏磧年年弔千古。

控巴臺次韻

誰道地拘僮人須知天闕幽妍一段丹青辜閣何人淡掃松煙以上四川總志

楊長孺

長孺字伯子號東山萬里子嘉定閒守湖州後爲番禺帥端平初累辭召命以集英殿修撰致仕家居卒

跋大人論配享書橐

覆羹眞得卓囊書錦水元來勝石渠但寶銀鉤并鐵畫何須玉帶與金魚

鶴林玉露高廟配享洪容齋在翰苑以呂頤浩趙鼎韓世忠張俊四人爲請蓋文武各用兩人出孝宗意也遂令侍從議識者多謂呂元直不厭人望張魏公不應獨遺楊誠齋時爲祕書少監以書爭之以專欺私三罪斥容齋且言魏公有社稷大功五建復辟之勳發儲嗣之議誅范瓊以正朝綱用吳玠以保全蜀卻劉麟以定江左於是有旨再令詳議越數日上忽諭大臣曰呂頤浩等正合公論更不須議洪邁固是輕率楊萬里亦未免浮薄于是二人皆求去容齋守南徐誠齋守高安當苗劉作亂時矯隆祐詔貶竄魏公高宗在昇陽宮方啜羹左右來告驚懼羹覆于手手爲之傷暨復辟見魏公泣數行下舉手示公痕跡猶在

題湖州畫像

面有憂民色天知報國心三年風月少兩鬢雪霜深更莫留形跡何曾廢古今不如隨我去相伴老山林

鶴林玉露嘉定閒楊伯子爲湖州守治聲爲三輔冠郡士相與肖像祠于學宮與工部尙書戴少望並祠伯子意不悅會持浙東庚節將行辭先聖先師禮畢與校官諸生坐講堂命取畫像題詩其上遂卷藏而行當持士子有戲和其詩者末句云可憐

戴工部獨

樹不成林

茨菰花

折來趁得未晨光，清露晞風帶月涼。
長葉剪刀廉不割，小花茉莉淡無香。
稀疎略糝瑤臺雪，升降常涵翠管漿。
恰恨山中窮到骨，茨菰也遣入詩囊。全芳備祖

句

三閒破屋一牀書，錦心繡口冰肌膚。
自紉枯葉作袴襦，此君便是長鬚奴。
顧贊樂圖和徐思叔韻 鶴林玉露

吳晦之

晦之、寧國人。

寧國府志：嘉定中，與韓沈仲和、石巖魯瞻相友善，沈善書。

嘗手書晦之十絕句，自爲跋，世稱吳詩韓字可謂並美。

寄石魯瞻

憶昔從遊杖履中，有山亭上醉春風。
主人已作騎鯨客，自注：時仲和已歿。誰識當年兩病翁。
寧國府志

彭仲衡

仲衡、清江人。

丫頭巖

前峯號龜。今是龜。近巖謂月亦匪月。世閒景幻語未真。說著丫頭便癡絕。蒼然頑石由天成。道旁過者皆含情。我來於此發浩歎。乃知有色能傾城。蘆浦筆記。

胡偉

偉字元邁。嘉定閒。新安布衣。寓吳中。有宮詞集句。

鶚按玉照新志云。胡偉元邁。新安人。父舜申。作乙巳泗州錄。已酉避亂錄。據此當是胡仔元任之從兄弟也。

宮詞集句

雞人唱曉五門開。宮女更番上直來。御仗催班元會集。遙聞索扇一時回。羅鄴 花藥夫人 王禹玉 王建
披香仙殿試春衣。等候官家未出時。整了翠鬟勻了面。大家裝著鬪時宜。晏同叔 花藥夫人 宋子京 王禹玉
殿前香騎逐飛球。一樣眞珠絡轡頭。誇道自家能走馬。掉鞭橫過小紅樓。張籍 王禹玉 王建 花藥夫人
映林先發幾枝梅。準擬君王便看來。競走巾車迎鳳輦。殿前排宴賞花開。元微之 王建 吳可 花藥夫人
美人弄鏡插梅花。抹月批雲自一家。三十六宮春信早。不應青女妒容華。鄭穀夫 饒節 蔡文饒 洪玉父
新生帝子浴瀟瀾。頻奏仙韶喜誕筵。願上玉宸千萬歲。大家恩賜洗兒錢。宋白 吳可 王禹玉 吳曠 十家宮詞

汪莘

莘字叔耕。休寧人。嘉定中。以布衣應詔上封事。不果用。有方壺存稿。

秋日飲錢塘門外雙清樓

西湖日日可尋芳。樓上憑闌意未忘。斫取荷花三萬朵。作他貧女嫁衣裳。

次潘別駕韻

野店溪橋柳色新。千愁萬恨爲何人。殷勤織就黃金縷。帶雨籠煙過一春。

夏日西湖閑居

十里湖山苦見招。柳隄荷蕩赤闌橋。待他朝市人歸後。獨泛扁舟吹玉簫。

露冷風清斗柄遷。芙蓉零落謝家船。都人正作黃梁夢。獨占西湖明月天。以上方壺存彙。

詹初

初字子元。休寧人。以薦入太學。爲學錄。與汪莘善。有流塘集。

出心原心原在流塘南

行行陟南原。遙望北山岑。上有千尺崖。下有高樹林。高林轉幽隩。戛然啼雙禽。流水自迅逝。白雲澹無心。策杖者誰子。閒來坐春陰。相逢籬林下。攜手溪水濱。對之兩無言。悠然鳴素琴。素琴清且越。暢以披沖襟。沖襟良自爾。那知春已深。流塘集

留元剛

元剛字茂潛。永春人。嘉定閒。直學士院。有雲麓集。

武夷九曲棹歌存二首

七曲催船快上灘。好山留與漫郎看。經行雪瀑仙屏下。恍記齋堂夜帳寒。

九曲遙岑更鬱然。板橋漁市引長川。喚回白馬賓雲夢。來看桑麻萬里天。鐵網珊瑚。

王益祥

益祥長樂人。寧宗朝。官監察御史。

題資福院平綠軒

丈室無餘地。生涯小有天。推窗成曠闊。俯檻遠清漣。載酒日邊客。聞歌柳外船。隔墻人易與。贖著買山錢。
至元嘉禾志。

陳宓

宓字師復。丞相俊卿子。以父任入官。寧宗朝。歷軍器監簿。出知南康軍。改南劍州。寶慶初致仕。

城山

穀城巖穴似飛來。十里湖光鏡面開。夜雨松窗榻榻靜。秋風柳岸釣船回。尋幽便叩生雲洞。乘興還登呼月臺。每到西湖吟咏處。令人偏憶故山梅。興化府志。

張潞

潞字東之。吉之永新人。牧昭州。詩師誠齋。石湖有張昭州集。

句

策勳蓑笠上。自是一雲臺。嚴灘憂兄行不得。勸客不如歸。答二禽獨木乘危涉。勞薪帶溼炊。秋雨紫垂戶外瞻天近。綠墜樓前到地香。紫牡丹 後村詩話。

陳堧

堧俊卿之後。知南安縣。

謝趙憲副使惠建茶

賁餘自合到侯王。誰遣甘芳入莧腸。野客驚看龍鳳銜。家人學試蟹魚湯。題來諫議三封印。分到尙書八餅綱。盡灑從前腥腐氣。時時澆取簡編香。莆陽文獻。

曾槃

槃字樂道。幾之孫。左司逢之子。官工部。

句

還持病眼將昏力。來看仙山未了青。題武夷 合璧事類續集。

吳機

機字子發。天台人。嘉定中知真州。

題烟雨奇觀樓。在真州。吳機建。取葉石林半空烟雨之句。

此景儀真亦有年。何人管領向樓前。江淮自昔雖南北。烟雨從來冒變遷。萬里孤帆遺恨在。半空佳句至今傳。諸公欲會當時意。且對滄波汎酒船。儀真縣志。

宋詩紀事卷六十三

錢唐 厲鶚 緝

錢唐 許承模 勘定

黃榦

榦字直卿。號勉齋。閩縣人。受業朱子之門。以子妻之。寧宗朝。補將仕郎。歷知漢陽軍。主管武夷沖祐觀。復知安慶府。主管亳州明道宮。致仕卒。諡文肅。有集。

答曾伯玉長編

白露下百草。迅商薄秋林。幽人起長歎。感此節物深。攬衣自徘徊。撫劍還悲吟。丈夫各有志。莫作兒女心。涉遠當疾趨。畏影須就陰。願言理輕車。去上南山岑。

訪高簽判故居

遠樹分高下。平洲接有無。短亭低密竹。小艇隱寒蘆。轉浪魚深入。斜陽鷓亂呼。自慚貴公子。未老賦歸歟。

侍文公飲浮翠亭用劉叔通韻

涼風振幽壑。陰雲翳前山。高情厲清秋。適意林莽閒。煙橫萬家井。水淨雙溪灣。徙倚暮忘歸。人境相與閑。遊子獨何爲。千里方言還。陪此杖屨遊。忘彼道路艱。心期更他日。依巖結柴關。

過翠微

古寺殘僧少。孤村碧樹圍。明朝山下路。愁絕望煙歸。以上勉齋集

陳淳

淳字安卿。龍溪人。受業朱子之門。嘉定中以特奏恩授安溪簿。有北溪字義。

題江郎廟

三石參天作柱擎。自從開闢便崢嶸。何爲末俗好奇怪。盡道江郎魄化成。四朝詩

輔廣

廣字漢卿。號潛齋。父達本。河朔人。南渡居秀州之崇德縣。從呂成公游。後登朱子之門。自祠官歸隱。以著書爲己任。有六經注釋。四書問答等。藏于家。

題資福院平綠軒

名區與利壠。羊腸盡攀躋。誰能爲芳草。四曠成幽棲。春風一憑闌。秀色無高低。山遙不作障。水近何妨堤。只恐金氣寒。黃枯變碧萋。坐令羣目驚。有似七聖迷。人心無天游。六鑿相攘擠。但于平處觀。衆有何端倪。日月互賓送。景物隨乖睽。彼昏如執著。惟君試金篋。至元嘉禾志

蔡元定

元定字季通。建陽人。從朱子游。尤表揚萬里薦于朝。以疾辭。韓侂胄設僞學之禁。爲言者所詆。謫道州卒。後贈迪功郎。賜諡文節。學者尊之曰西山先生。

自勵詩

數間茅屋環流水。布被藜羹飽暖餘。不在利中生計較。肯于名上著功夫。荷前野馬閑來往。天際浮雲自卷舒。窮達始知皆有命。不妨隨分老樵漁。武夷山志

蔡淵

淵字伯靜。號節齋。元定長子。

仲弟未歸歲晚有懷

明月照席寒。生我愁百端。冉冉歲云徂。游人不顧還。相送荷花碧。相望楓葉丹。高樓日千回。散步東林隈。攀條復攬秀。日暮空徘徊。金杯白玉臺。猶能對寒梅。寄書豈不早。三月千里道。敢怨歸軒遲。但念堂中老。春風萱草生。更樹堂前庭。詩家鼎鑪

蔡沈

沈字仲默。元定子。少游朱子之門。從父謫道州。護喪還。隱居九峯。卒諡文正。

遊西山

柴荆相依倚。綠篠自蒙密。秋蘭澗中花。山果路邊實。沿岡引霜藤。臨流坐寒石。日暮陰崖開。雲收遠山出。踈籬尚存菊。荒庭舊垂橘。絲桐想虛堂。簡策見靜室。俯仰今幾時。漫然已陳迹。摩挲蒼苔痕。屐齒不可識。建寧府志

贈琴士翁明遠

膠漆本無意。絲桐非有情。因緣醉翁指。發此無窮聲。蕭蕭秋風引。葉落渭水濱。喧喧陽春歌。花明錦江城。

離鸞月徊徊。別鶴雲冥冥。清冷灑毛髮。震蕩驚雷霆。曲度神莫測。調高妙難名。時方多艱虞。掩耳誰爲聽。無爲恩怨兒女語。敵場勇士軒昂行。詩家鼎鑿

武夷山天柱峯

才旣非時用。性本愛岑寂。決策名山游。幽隱遂成癖。春風百花紅。秋月千嶂碧。煙霞結綢繆。猿鳥自疇昔。乘閒撫深曠。噴薄鳴鐵笛。笑挹天柱峯。高寒幾千尺。

大隱屏

昔余隱屏東。扁舟夾雙龍。浩歌碧雲裏。萬壑生清風。羣仙幔亭宴。玉女雙鬢蓬。夕景落寒巖。照耀金芙蓉。昔余隱屏北。飄然度巖側。誰知神仙居。自與塵世隔。瑤草冬更青。琪花雪爭白。橫玉吹寒空。萬里天一色。以上武夷山志

章才邵

才邵字希古。崇安人。以父蔭補官。嘗守臨賀辰陽。晚歲與朱子游。世稱爲篤實君子。

過清遠峽

崑頭風急樹欹斜。溪畔漁樵十數家。老盡往來名利客。年年秋水映蘆花。錦繡萬花谷

釣臺

短檣夷猶七里灘。人亡依舊水光寒。漢家名節君知否。盡在君家一釣竿。釣臺集

劉子寰

子寰字圻父號篁嶧建陽人居麻沙早登朱文公之門有篁嶧集

杜若

欽州五月土如炊滿山杜若芳菲菲素英綠葉紛可喜勁烈不避炎歛威採之盈掬薦蔬食臧獲失笑庖人譏君不見屈平夕餐賦秋菊魂兮無南盍來歸又不見坡公服食得臬耳扣角自嘆從前非伊予假祿二千石窮比二子猶庶幾澹花嚼蘂有真樂一飽何必謀甘肥尙餘升合漬生蜜從他薏苡生珠璣全芳備祖

金鳳花

天霜凋九陵梧桐日枯槁鳳德何其衰驚飛下幽草九苞空髣髴衆彩各自好黃中獨含章見晚更傾倒託根幔亭峯弱質深自保便翾金翅短淡泊乃幾道俗眼迷是非人閒跡如掃合璧事類別集

劉炎

炎字潛夫號攜堂學於朱子

王剛仲惠詩醉筆聊和

君不見山澤之壘蒙野服如彼隰桑還自沃又不見侯門公子貴且驕飽象膏粱猶未足人生貴賤不難分唯有聖賢無等倫朝爲塗人暮爲禹窮崖斷壑看回春君方妙齡截不住萬里飛黃又騰去王良造父不得施耳側風聲未爲遽我思古人愛其宇青蘋堂兮杜若廡菱荷可裳菊可餐肯介纖埃與塵土是中非聲亦非色安得與君一憑軾鷓鴣變化不可量要指天地爲一息悠悠此道誰能將從知可玩不可望

慎勿隨風學飄絮。春光駘蕩成飛揚。濂洛風雅。

楊與立

與立字子權。浦城人。受業朱子之門。嘗知遂昌縣。因家蘭谿。學者稱船山先生。

幽居

柴門閭寂少人過。盡日觀書口自哦。餘地不妨栽竹木。放教啼鳥往來多。濂洛風雅。

林用中

用中字擇之。號東屏。古田人。從遊朱晦庵之門。偶偕晦翁走潭州。訪守張敬夫。因有南嶽之游。著倡酬詩百四十餘首。

敬夫用晦翁定王臺韻賦詩同次韻

寂寞番君後。光華帝子來。千年餘故國。萬事只空臺。日月東西見。湖山表裏開。從知爽鳩樂。莫作雍門哀。

後洞山口晚賦

西嶺更西路。雲嵐最窈深。水流千澗底。樹合四時陰。幽絕無僧住。閑來有客吟。山行三十里。鐘磬忽傳心。

贈上封諸老

上封臺觀靜。夕霽景偏清。月下聞禪語。風中有磬聲。龍池留古跡。鴈塔寄餘情。借問房前樹。東窗忽偃生。

以上南嶽倡酬集

方士繇

士繇，字伯謨，號遠菴，莆田人。豐之之子。從朱子游，稱高弟。有集。

昇山卽事

一徑西風裏，閑房客未歸。
砌苔侵野屐，林葉上秋衣。
黃卷經心嬾，青綸入夢稀。
還書報妻子，莫厭故山微。
詩林萬選

崇安分水道中

溪流清淺路橫斜，日暮牛羊自識家。
梅葉陰陰桃李盡，春光已到白桐花。
詩家鼎贊

武夷山

丹崖石氣凝高秋，碧溪上引天河流。
金堂石室不可到，玉棺莓苔生古愁。
仙人昔乘紫雲去，白馬搖鞭在何處。
茫茫塵世那得知，幔亭空記當年事。
君不見茂陵松柏已蕭疎，乾魚猶祭同亭祠。
莆陽文獻

章康

康，字季思，浦城人。居吳隱居不仕。人稱曰聘君。從學於朱晦菴。淳祐中卒。有集。

破山寺

名山久相望，今日爲著屐。到寺第一義，古松足蟠屈。
一一龍蛇形，風雷氣蕭瑟。瓔珞檜兩株，皆數百年物。
佛燈耿青燐，像設暗金碧。雲廊極徘徊，老屋共崑兀。
僧房小盤薄，西原訪泉石。于其最幽絕，似可便築室。
因而思古人，多有愛山癖。要之亦何爲，一賞事已畢。
上方不及登，尙或俟他日。無非會心處，妙同箭鋒直。
山靈謂何如，移文茲不必。作詩畱山中，併可告來轍。
破山寺志

程先

先字傳之。休寧人。與子永奇俱從朱子學。有東隱集。

和人感秋韻

疾風拔枯楠。天作破瓦色。古殿無飛塵。過者見瑟瑟。秋風。

憶昔遊吳甸。新知結項容。松江楓落後。貌得洞庭峯。秋山 新安文獻志。

程永奇

永奇字次卿。新安人。嘗登朱子之門。有格齋集。

題耕隱卷

山下巢雲夢亦清。隴頭耕雨綠蓑輕。時人共指龐居士。爲借農書一到城。新安文獻志。

劉淮

淮字叔通。號溪翁。建陽人。朱文公之高弟。

朱子跋云。叔通之詩。不爲雕刻纂組之

工。而平易從容。不費力處。乃有餘味。

韓家府 嘉定初作

寶蓮山下韓家府。鬱鬱沈沈深幾許。主人飛頭去。和虜綠戶雕牆鎖。風雨九世卿家一朝覆。太師之誅魏公辱。後車不信有前車。突兀眼前看此屋。

四朝聞見錄。韓侂胄居太廟三茅之旁。後山爲閔古堂。爲閔古泉。舊名青衣。有青衣童見泉上。故名。爲流觴曲水。泉自青衣下。注於池。凡有十二折。旁砌以瑪瑙。泉流而下。瀦於閔古堂。渾涵數畝。有桃坡。十有二級。夜宴則殿廳用紅燈。數百出于桃坡之。後以燭之。其靈巖之最奇者曰雲岫。侂胄居之既久。歲累月積。剔奇抉勝。窈窕深。疑爲洞天福地之。居不類其爲在天衢咫尺。舊皆寧臺觀中地也。韓敗。有旨盡給還寧臺。復爲禁地。建陽劉淮賦詩云。

平遠臺

海天漠漠水雲寬。開到梨花正自寒。卻擁重裘上平遠。愁心千疊倚闌干。詩家鼎鑪。

劉仙倫

仙倫一名儼。字叔儼。廬陵人。有招山小集。

得蟹無酒

水鄉秋晚得白蟹。望斷碧雲無酒家。此意淒涼何所似。淵明醒眼對黃花。

西林

路入廬陵西復西。翠煙深處著招提。山僧幾輩雪垂領。水鳥數聲雲滿溪。莫對青山談世事。且循粉壁看留題。禪房夜臥衣裳冷。夢破鐘聲落月低。

盱江驛舍中有婦人書一憶字筆勢頗姿媚。游子明王相之皆題詩。其後率予同賦。

陽臺雨歇行雲查。天闊鴻稀春悄悄。鴻鵠孤眠怨芳草。夜夜相思何日了。妾非無聲不敢啼。妾非無淚不敢垂。柔情欺損青黛眉。夢魂暗逐胡蝶飛。春風著人鎖窗綠。綠窗書字寄心曲。細看香翰婉且柔。中有閑

愁三萬斛。向隅棄筆惆悵時。此情默默誰得知。無緣相見空相憶。不如當日休相識。

以騎驢鍾馗送秦先之

髯翁矍鑠老據鞍。曾入大內見阿瞞。幘頭垂腳藍綬敵。不知班簿爲何官。天寒歲晚日云暮。霜風吹驢耳卓豎。老臧負笠衣裳單。反袂掩目趾穿履。華門我恐難畱君。收卷送似秦將軍。將軍文事有武備。眉骨自是凌烟人。汝當訶護謹厥職。勿但縮頭徒挂壁。將軍來歲在殿巖。豐汝牲醪作除夕。

贈岳周伯

昔年搥鼓事邊庭。公相身爲國重輕。四海幾人思武穆。百年今日見儀刑。筆頭風月三千字。齒頰冰霜十萬兵。天亦知人有遺恨。定應分付與中興。

題岳陽樓

八月書空鴈字聯。岳陽樓上俯晴川。水聲軒帝鈞天樂。山色玉皇香案煙。大舶駕風來島外。孤雲銜日落吟邊。東南無此登臨地。遣我飄飄意欲仙。以上招山小集

岳珂程史云余

兄周伯喜誦之

劉植

植字成道。永嘉人。號漁屋。安上曾孫。

過彭澤

井邑已非舊，柴桑里尚存。春風三畝宅，落日數家村。隔樹聞鷄犬，編民半子孫。頽然孤隴上，寒菊遶松根。
東甌詩集

劉翰

翰字武子，長沙人。吳雲壑居父之客，有小山集。

翠屏曲

小亭簾幕垂陰陰，梅香入枕春生屏。西窗月落翠被冷，鳥聲殘夢東風醒。三年不喚清溪渡，夢裏濃西春水路。江頭女兒雙翠眉，能唱劉郎芳草句。

種梅

淒涼池館欲棲鴉，彩筆無心賦落霞。惆悵後庭風味薄，自鉏明月種梅花。

石頭城

離離芳草滿吳宮，綠到臺城舊苑東。一夜空江煙水冷，石頭明月鴈聲中。

鴻門宴

江東遙遙八千騎，大戰小戰七十二。劉郎曉鞭天馬來，蹴踏長安開帝里。子嬰已降隆準公，君王置酒鴻門東。張良已去玉斗碎，三月火照咸陽紅。繡衣歸來日將夜，可惜雄心天不借。當時已失范增謀，尙引長戈到垓下。刁斗乍急營壘驚，夜深旗尾秋風橫。玉帳佳人不成夢，月明四面聞歌聲。拔劍相看淚如雨，我作楚歌君楚舞。明朝寶馬一聲嘶，江北江東皆漢土。

吳門行

吳歌婉婉清如水。西風曉自闌門起。雙橈艇子采菱來。翠荇綠蘋香十里。芙蓉影落已知秋。濺溼羅衣眉黛愁。回身蕩槳入門去。明月家家秋水流。

立秋日

乳鴉啼散玉屏空。一枕新涼一扇風。睡起秋風無覓處。滿街梧葉月明中。

客去

送客歸來月滿簷。梅花微笑隔疎簾。酒醒今夜銀屏冷。沈水熏爐旋旋添。以上小山集。

劉應時

應時字良佐。慈溪人。有頤菴集。

旅舍

草市欲黃昏。吾行恰到門。僕夫思憩息。燈火喜溫存。一夜催花雨。數家臨水村。征途雖得句。默坐與誰論。

早行

登輿睡思尙昏昏。斗柄銜山月在門。鷄犬未鳴潮半落。草蟲聲在豆花村。

曹直夫水石短軸

奔流出峽響如雷。筆力浮天亦壯哉。吳蜀興亡千古恨。白鷗時逐浪花來。

雪夜

迎春寒色愈嚴凝。小閣爐殘冷欲冰。寂寞黃昏愁弔影。雪窗怕上短檠燈。以上顧菴集

李翔高

翔高號羽軒。

句

春愁自是無重數。又被東風揭繡簾。

貴耳集。李羽軒善爲絕句。盧蒲江

甚愛之。有句云。老子興不淺也。

劉學箕

學箕字習之。屏山先生子。輦之孫。七省翁珙之子。有方是閑居士小稿。

劉叔通云。居士詩摩香

山之壘。詞拍稼軒之肩。

不如歸去禽言。

不如歸去。愁綠怨紅。春欲暮。汝勸行人歸。行人勸汝住。鳴聲不住良苦辛。啼得血流無用處。不如歸去。吾今歸。千聲萬聲爾何爲。

環洲江氏園

欲覽環洲勝。維舟步石磯。踏青隨野色。穿翠任春霏。地迴知山遠。村灣覺水圍。東風輕薄甚。桃李亂荆扉。

以上方是閑居士小疏

武衍

衍字朝宗。汴人。有適安藏拙餘橐。

方蕙苗跋云。東坡見齊安朱廣文小詩云。官閑廳事冷。胡蝶上墀飛。謂其可入畫。圖適安此卷絕句。摹寫景物。吟詠情致。多有可筆於丹青者。惜不遇坡之品題。

宮詞補遺

牡丹春籟正穠華。有旨今年不賞花。翦落金槃三百朵。內批分賜近臣家。

開元廣寒詞

桂華珠殿水精樓。柘袖籠香乙夜游。飛下銀橋人不覺。月明三十六宮秋。

聞角呈宗諭方蕙巖

曉角吹愁客夢寒。一聲聲落畫屏閒。吳兒可殺無風味。老卻梅花只當閑。

柳枝詞

靈和殿裏最風流。三月飛花滿御樓。換得玉人眉樣巧。一春渾不下簾鉤。

秋夕清汎

弄月吹簫過石湖。冷香搖蕩碧芙蕖。貪尋舊日鷗邊宿。露溼船頭數軸書。

春日湖上

飛鷁鳴鑼鼓吹喧。繁華應勝渡江前。吟梅處士今還在。肯住孤山爾許年。
長橋月夕

捲來滄海黃銀浪。飛出層雲白玉團。千古垂虹奇絕處。獨憑三百赤闌干。

老宮人

侍輦看花上苑春。太皇宣索鳳笙頻。如今猶記當時曲。對譜閑教小內人。
寶髻無光玉貌昏。銜悲空感舊承恩。君王愛問先朝事。時許車兒到殿門。

湖亭席上贈商素

一曲春風已擅場。淺顰低囁更傳觴。令人憶殺香山老。舊日玲瓏也姓商。

貴游

鈿車輓轆碾芳塵。步障香移一片春。花下玉盤行禁巒。御前宣勸到湖濱。

清明湖上

榆火初傳禁漏殘。滿城和氣在湖山。接天楊柳風煙裏。照水桃花圖畫間。舊路人穿新路去。長橋船出斷橋還。吾皇應喜民胥樂。歲許西門入夜關。

飲湖亭

寒食梨花月。新晴楊柳風。愁消山色裏。興極酒杯中。綠髮日夜變。青春今古同。忍教行樂地。容易夕陽紅。
以上適安藏拙餘藁

戴敏

敏字敏才。號東臯子。台州黃巖人。石屏之父。有東臯集。

小園

小園無事日徘徊。頻報家僮送酒來。惜樹不磨修月斧。愛花須築避風臺。引些渠水添池滿。移箇柴門傍竹開。多謝有情雙白鷺。暫時飛去又飛回。

初夏遊張園

乳鴨池塘水淺深。熟梅天氣半晴陰。東園載酒西園醉。摘盡枇杷一樹金。以上東臯集。

句

人行躑躅紅邊路。日落秭規啼處山。劉後村詩話。

桑世昌

世昌字澤卿。淮海人。居天台。陸放翁諸甥。著蘭亭博議。回文類集。莫菴詩集。

句

翠添鄰塹竹。紅照屋山花。

葉水心題跋。君詩尤工。其卽事句。蓋著色畫也。

王大受

大受、字仲可。鄱陽人。有拙齋詩集。

四朝聞見錄。水心先生葉適題王大受拙齋詩藁云。紹熙四年。光宗疾不能朝。重華諫者傾朝。謗者盈市。憲聖后兄子瑛最賢。大受因瑛奏孝宗。陛下惟一子不審處利害。恐國人騰口取名於家計。大不便。且羣臣以父子禮。故諍不敢止。陛下何不出手詔云。皇帝體不安。朕所深知。卿且勿言。須秋涼。朕自擇日與皇帝相見也。孝宗喜其策。會晏駕。不果用。攻媿樓公憤其前與族兄鏞有間。且毀其文。力言之于史。相期以必竄大受。史遂命去大受袍笏。編置邵武。瑛之子綱以藥上于朝。而削大受姓名。

遊鹿苑寺

鷺峯遊屐少。我獨住多時。僧護翻經石。猿攀礙月枝。地寒春到晚。山遠夢歸遲。尙被浮名誤。吾心信自癡。

詩林萬選

水樂洞

歷聘寒空六六天。更來洗耳聽春泉。迅湍激石浮清磬。樹溜行沙寫素弦。路口林亭三四面。洞中日月幾千年。何人獨得開收律。譜入宮商與世傳。咸淳臨安志

句

君不見牛奇章與李衛公。二人平生不相容。門前冠蓋互咿軋。惟有愛石心則同。題李季章石林。四朝聞見錄。

徐照

照、字道暉。一字靈暉。號山民。永嘉人。有芳蘭軒集。四靈之一。

葉水心誌徐山民墓云。山民有詩數百。琢思尤奇。皆橫絕欬起。冰懸雪跨。使讀者變踣慄慄。肯首吟歎。不能自已。然無異語。皆人所知也。人不能道爾。

文獻通考陳氏云。徐照。徐璣。翁卷。趙師秀。四人。號永

嘉四靈。皆晚唐體也。惟師秀嘗登科。改官亦不顯。

趙東閣汝回云。唐風不競。派沿江。西永嘉四靈。乃始以開元元和作者自期。治澤萍鍊。字字玉響。雜之姚賈。中人不能辨也。

梅壠詩話。永嘉徐照。題子陵釣臺詩云。梅福神仙者。新知是婦翁。子陵爲梅公壻。傳記不載。詩必有所本。

石門瀑布

一派從天下。曾經李白看。千年流不盡。六月地常寒。灑木跳微沫。衝崖作怒湍。人言深碧處。常有老龍盤。

江心寺

兩寺今爲一。僧多外國人。流來天際水。截斷世閒塵。鴉宿腥林徑。龍歸損塔輪。卻疑成片石。曾坐謝公身。

楊柳

嫩葉因風不自持。淺黃微綠映清池。玉人未識分離苦。折向堂前學畫眉。

贈徐璣

一舸寒江上。梅花共別離。不來相送處。愁有獨歸時。去夢千峯遠。爲官三歲期。思君何可見。新集見君詩。

題桃花夫人廟

一樹桃花發桃花卽是君。空祠臨野水。何處覓行雲。事迹樵人說。爐香過客焚。雨添碑上蘚。難讀古詩文。
以上芳蘭軒集

徐璣

璣字文淵。一字致中。號靈淵。永嘉人。官長泰令。有泉山集。二薇亭集。四靈之二。

初夏遊謝公巖

又取紗衣換。天時起細風。清陰花落後。長日鳥啼中。水國乘舟樂。巖扉有路通。州民多到此。猶自憶髯公。

吾廬

蓬戶閉還開。深居稱不才。移荷憐故土。買石帶新苔。藥信仙方服。衣從古樣裁。本無官可棄。何用賦歸來。

投楊誠齋

名高身又貴。自住小村深。清得門如水。貧惟帶有金。養生非藥餌。常語是規箴。四海爲儒者。相逢問信音。
以上二薇亭集

翁卷

卷字續古。一字靈舒。永嘉人。有西巖集。葦碧軒集。四靈之三。

寄遠

秋氣日淒清。秋衣殊未成。在家猶不樂。行路若爲情。幾處看山色。暮天聞雁聲。思君有幽夢。夜夜出江城。

石門菴

山到極深處，石門爲洞名。嵐蒸空壁壞，雪映小齋清。果落羣猿拾，林昏一虎行。山僧何所事，高坐若無情。

冬日登富覽亭

未委海潮水，往來何不閑。輕烟分近郭，積雪蓋遙山。漁舸汀鴻外，僧廊疊樹間。晚寒難獨立，吟竟小詩還。

夢回

一枕莊生夢，回來日未衙。自煎沙井水，更煮岳僧茶。宿雨消花氣，驚雷長荻芽。故山滄海角，遙念在春華。

以上羣碧軒集

野望

一天秋色冷晴灣，無數峯巒遠近閒。自上山來看野水，卻於水底見青山。詩家鼎鑪

句

梅花分地落，井氣隔簾生。曉對千年流不盡，六月地常寒。瀑布一階春草碧，幾片落花輕。春日分石同僧坐看松見鶴來遊寺移花連舊土買石帶新苔
吾廬 貫耳集

鶚按四靈詩派中趙紫

芝師秀號靈秀入宗室

戴復古

復古字式之，號石屏。嘗登陸放翁之門，以詩鳴江湖間。有石屏集。

姚雪蓬跋。式之詩天然不費斧鑿處。大似高三十五輩。晚唐諸子當讓一面。

方萬里跋石屏詩清健輕快自成一家。

瞿佑歸田詩話。戴式之嘗見夕照映山。峯巒重疊。得句云。夕陽山外山。自以爲奇。欲以壓世夢中夢對之。而不愜意。後行村中。春雨方霽。行潦縱橫。得春水渡。傍渡之句以對。上下始相稱。然須實歷此境。方見其奇妙。

湘中遇翁靈舒

天台山與雁山鄰。只隔中間一片雲。一片雲邊不相識。三千里外卻逢君。

白紵歌

雪爲緯。玉爲經。一織三滌。手織成一片冰。清如夷齊。可以爲衣。陟彼西山。予以采薇。

思家

用后山韻

湖海三年客。妻孥四壁居。飢寒應不免。疾病又何如。日夜思歸切。平生作計疎。愁來仍酒醒。不忍讀家書。

淮村兵後

小桃無主自開花。烟草茫茫帶晚鴉。幾處敗垣圍故井。向來一一是人家的。

題釣臺

萬事無心一釣竿。三公不換此江山。平生誤識劉文叔。惹起虛名滿世閒。

娛書堂詩話嚴子陵釣臺題詠尚
矣天台戴式之一絕亦新意可喜

新安寒食

不擬今年到歙州。要知行止豈人謀。一百五日客懷惡。三十六峯春雨愁。老矣此身猶道路。淒其歸夢遶松楸。花瓢仙子無由見。千里江山負遠遊。

遊九鎖

天柱峯頭一振衣。雲開巖路雨晴時。登臨欲訪神仙事。紀實都無漢晉碑。拍手數聲龍井躍。篝燈一覽洞天奇。林閒安得棲身處。欲煉金丹餌玉芝。

毘陵天慶觀畫龍呈王使君

姑蘇道士天酒星。醉筆寫出雙龍形。墨蹟縱橫奪造化。蜿蜒滿壁令人驚。一龍翻身出雲表。口吞八極滄溟小。手弄寶珠欲飛。握手掌中拳五爪。一龍排山山爲開。頭角與石爭崔嵬。波濤怒起接雲氣。不向九霄行雨來。萬物焦枯天作旱。兩龍壁隱寧非嬾。真龍不用只畫圖。猛拍欄干寄三歎。

烏鹽角行

風簾羅鼓龍鬚笛。夜宴華堂醉春色。豔歌妙舞蕩人心。但有歡娛別無益。何如村落捲桐吹。能使時人知稼穡。村南村北聲相續。青郊雨後耕黃犢。一聲催得大麥黃。一聲喚得新秧綠。人言此角只兒戲。孰識古人吹角意。田家作勞多怨咨。故遣聲音召和氣。吹此角起東作。吹此角田家樂。此角上與鄒子之律同宮。

商合鍾呂形甚朴聲甚古一吹寒谷生禾黍

袁州化成巖李衛公謫居之地

一巖端坐挹千峯三兩亭臺勝概中江水驟生連夜雨松聲吹下半年風因思世故吾頭白獨步林皋夕照紅欲吐草茅憂國志誰能喚起贊皇公

括蒼石門瀑布

少泊石門觀瀑布明知是水卻疑非亂拋玉雪從天下散作雲烟到地飛夜聽蕭蕭洗塵夢風吹細細溼人衣謝公蠟屐經行處聞有留題在翠微以上石屏集

句

詩談天下事愁到酒樽前秋懷鶯啼花雨歇燕立柳風微晚春詩骨梅花瘦歸心江水流城西客愁茅店雨詩思柳橋春春日黃花一杯酒白髮幾重陽九日以上貴耳集

馮取洽

取洽字熙之號雙溪翁延平人

送劉篁嶠

來似孤雲出岫閑去如高月耿難攀若爲化作修修竹長伴先生篁嶠山詩人玉屑

自題交游風月樓

平揖雙峯俯霽虹近窺喬木欲相雄一溪流水一溪月八面疎櫺八面風取用自然無盡藏高寒如在太

虛空落成。恰值三秋半。爲我吹開白兔宮。

詩人玉屑。一溪流水一聯。

詩林皆以爲秀傑之句。

劉正之

正之字子正。臨江人。

送別趙紫芝

夫君落落天馬姿。聲名早與賀白馳。錦囊千首不療飢。非詩窮人窮乃奇。憶昔聞君未識面。獨傳句法誇清健。竭來白下一相逢。傾蓋論心曾幾見。劃然起柁春江流。我亦江頭尋去舟。人生相聚會有別。江水江花無盡愁。萬事不如歸去好。石田茅屋生春草。如君自是玉堂仙。輕車緩轡長安道。春日遲遲柳依依。攀柔條兮送君歸。翰墨大全。

上官良史

良史字偉長。號閬風山人。

尋嚴丹丘東潭居二首

愛子東溪幽。抱被來同宿。山家無膏火。然薪代明燭。閑窗何所有。古書三五束。烏棲月上時。還見簷前竹。山齋樞牖疎。水月連春霧。今夕定何夕。清心忻所遇。如從天姥游。似得招提趣。幽夢出雲時。怱怱山鳥曙。河梁值雨有懷嚴羽

葦岸逢殘雨。河橋對暮流。倚鞭一悵望。客思暫夷猶。楓葉滿江色。夕陽終古愁。遙憐君亦苦。不共故園秋。
以上詩家鼎鑪。

晚泊

渺渺復迢迢。楓林帶野橋。沙寒初上月。浦暗已回潮。霜葦多先折。江花或後凋。今宵何處雁。相伴宿蘭橈。
後村千家詩

蘇洞

洞字召叟。山陰人。丞相頌四世孫。有冷然齋集。

除夕呈主人

臘節梅花外。椒盤淚眼邊。山川非故國。笳鼓咽新年。機事鷗偏覺。家書雁不傳。細箋今夕恨。萬一故人憐。

錢塘渡

百年鬢髮春風晚。十二闌干落照微。多事錢塘江上水。送人離別送人歸。
以上詩林萬選。

金陵

朱雀街頭觀闕紅。角門東畔是春風。人家一樣垂楊柳。種入宮牆自不同。
詩家鼎鑪。

嚴羽

羽字丹丘。一字儀卿。邵武人。自號滄浪逋客。有滄浪吟。

滄溟詩話論詩如論禪。漢魏晉興盛唐之詩，則第一義也。大歷以還之詩，則小乘禪也。晚唐之詩，則聲聞辟支果也。盛唐諸人，惟在興趣，羚羊挂角，無跡可求。故其妙處，透徹玲瓏，不可湊泊。如空中之音，相中之色，水中之月，鏡中之象，言有盡而意無窮。近代諸公，乃作奇特解會，遂以文字爲詩，以才學爲詩，以議論爲詩。夫豈不工，終非古人之詩也。蓋於一唱三歎之音有所歉焉。國初之詩，尙沿襲唐人。王黃州學白樂天，楊文公劉中山學李商隱，盛文肅學章蘇州，歐陽公學韓退之，古詩梅聖俞學唐人，平澹處至東坡山谷始自出己意以爲詩。唐人之風變矣。山谷用工，尤爲深刻。其後法席盛行，海內稱爲江西宗派。近世趙紫芝翁靈舒輩，獨喜賈島姚合之詩，稍稍復就清苦之氣。江湖詩人，多效其體。一時自謂之唐宗，不知止入聲聞辟支之果，豈盛唐諸公大乘正法眼者哉。

答友人

湘江南去少人行，瘴雨蠻烟白草生。誰念梁園舊詞客，桄榔樹下獨聞鶯。

閨怨

昨夜中秋月，含愁顧影頻。空甌可憐影，不見可憐人。

懊儂歌

君子如白日，願得垂末光。妾心如螢火，安得久照郎。船在下江口，逆風不得上。結束作男兒，與郎牽百丈。朝亦出門啼，暮亦出門啼。蛛網挂風裏，搖思無定時。

喜友人相訪擬韋蘇州

朝朝竹林院。閉戶讀殘書。几閣晨風入。荒郊寒露餘。故人步履至。清坐喜踟蹰。輟卷還畱興。漱泉同飯蔬。

霏雪錄嚴滄浪之子詩。刻意古作。卓然不爲流俗所染。五言如閨怨等云云。

廬陵客館雨霽登樓言懷寄友

終日坐汾渙。邈然無少欣。登樓一周覽。始見萬山羣。微雨洗殘暑。青天卷浮雲。襟懷兩廓落。朗若見夫君。見君君何在。顧影還獨笑。吏非金門游。隱異滄浪調。江明秋月白。山空夜猿嘯。徒事百卷文。未返一竿釣。畱滯豈勝愁。非君誰與謀。水寒終赴海。鴈遠暫賓秋。舉世不可語。猶當傲巢由。贈君三尺劍。永駕五湖舟。

山居卽事

稍欣入林深。已覺煩慮屏。霜果垂秋山。歸禽度風嶺。紛紛葉易積。漠漠雲欲盛。磻戶寂無人。松蘿宵然暝。唯聞山鳥啼。月出柴門靜。終歲寡持醪。延歡聊煮茗。羣書北窗下。帙亂誰能整。

還山吟畱別城南諸公

日暮望寒山。惆悵歸思發。如何山中客。歷看城頭月。山中月明女蘿秋。石磴潺湲寫碧流。巖猿久別應惆悵。澗鳥相呼亦共愁。城南故人與我好。令我忘卻歸山道。昨夜西風夢到家。忽驚千嶂芝花老。朝來舟子促辭君。回首空江語尙聞。別後莫嗟難見面。相思只望嶺頭雲。

懷南昌舊游

昨在南昌府。清遊不可窮。杯行江色裏。棹進月明中。樓笛吹晴雪。菱歌漾晚風。坐來懷舊迹。萬里亦飄蓬。
訪益上人蘭若

獨尋青蓮宇。行過白沙灘。一徑入松雪。數峯生暮寒。山僧喜客至。林閣供人看。吟罷拂衣去。鐘聲雲外殘。
客中別劉表叔季高

悠悠遠別半生悲。白日相逢又語離。海內風塵驚不定。天邊消息到何時。洞庭旅鴈春歸盡。瓜步寒潮夜
落遲。惆悵孤舟從此去。江湖未敢定前期。

和上官偉長蕪城晚眺

平蕪古堞暮蕭條。歸思憑高黯未消。京口寒烟鴉外滅。歷陽秋色雁邊遙。清江木落長疑雨。暗浦風多欲
上潮。惆悵此時頻極目。江南江北路迢迢。以上滄浪吟

嚴仁

仁、字次山。號樵溪。邵武人。有歛乃集。

塞下曲

漠漠孤城落照閒。黃榆白葦滿關山。千枝羌笛連雲起。知是胡兒牧馬還。詩林萬選

平遠樓

湘中病客思歸日。城上高樓獨倚時。半樹夕陽鴉集早。一江秋色雁來遲。詩家鼎鑪

嚴參

參、字少魯。自號三休居士。與丹丘次山齊名。世號三嚴。

梅

衣染龍涎與麝臍。裁雲剪月作冰肌。小瓶雪水無多子。只恐橫斜一兩枝。後村千家詩。

看雪

天遠正難窮。樓高不堪倚。醉夢入江南。楊花數千里。詩家鼎鑪。

嚴 肅

肅、字伯復。號鳳山。

落花

片片落花飛。隨風去不歸。如何臨欲別。不得傍君衣。詩家鼎鑪。

羅之紀

之紀、字國張。高安人。嘉定中孝感尉。

句

吾道非耶真可恥。此君豈是折腰人。

西江詩話。之紀尉孝感。攝邑雲夢。上官不

爲禮。之紀因雪壓竹賦詩云。遂棄官歸。

蕭彥毓

彥觚號梅坡。楊誠齋有句跋其詩卷云。西昌有客學南昌。蓋西昌人也。

西湖雜咏

花心亭上坐。滿眼是湖光。只爲便幽趣。能來倚夕陽。水邊春寺靜。柳下小舟藏。不待清明近。鶯花已自忙。

梁家渡

遠水環沙翠作灣。紅塵飛不入青山。涼風一枕秋宵夢。夢繞千巖萬壑閒。

清明日早出太平門

江頭楊柳暗藏鴉。江上鵝兒浴淺沙。早起一風如此惡。路旁落盡刺桐花。以上詩人玉屑。

吳錡

錡字信可。永福人。鄱陽張世南與定交。僅百日而卒。世南悲悼之。錄其一詩。

遊永福方廣巖

曾訪神仙巖洞來。人言偉觀似天台。藤蘿足下猿猱嘯。鐘鼓聲邊日月開。燈續佛光凝紫翠。雲將蜃氣作

樓臺。最憐貫石神龍尾。猶帶天東雨露回。游宦紀聞。

胡時可

稼軒命賦滕王閣

滕王高閣臨江渚。帝子不來春已暮。鶯啼紅樹柳搖風。猶似當年舊歌舞。

隨隱漫錄。辛稼軒鶴客滕王閣。詩人胡時可通謁。聞人姓焉。阿嘗愈甚。辛使前曰。既稱詩人。先賦滕王閣。有佳句則預坐。卽題首句。衆大笑。再書云云。迺相與宴而厚賜之。

彭止

止字應期。崇安人。自號漫者。有刻鶴集。

題辛稼軒齋中

棊子聲乾案接塵。午窗詩夢煖於春。清風不動塔前竹。誰道今朝有故人。

建寧府志。彭止詩筆甚高。嘗謁辛襄疾。值其晝寢。

題一絕于齋而去。稼軒覺。遣人追之。延留累月。

左次魏

跋誠齋論高廟配享書。稟後次伯子韻。

鑾坡蓬監兩封書。道院東西各付渠。乾道聖人無固必。是非付與直哉魚。鶴林玉露。

史文卿

文卿字景望。鄞人。

種梅

呼童耕雲種瑤樹。斗挂青冥下風露。隔林野鶴不知寒。爲我飛來復飛去。素與梅花自有緣。又移幾本種庭前。鏡中一半閑風月。不屬王郎載雪船。

秋詞

寫就秋詞雁影稀。背燈無語獨眠遲。畫闌點滴芭蕉雨。一夜將愁向阿誰。

枯梅

樛枝半著古苔痕。萬斛寒香一點春。總爲古今吟不盡。十分清瘦似詩人。以上前賢小集拾遺。

黃洪

絕句

龍舟大半沒西湖。此是先皇節儉圖。三十六年安靜裏。權歌一曲在康衢。

四朝聞見錄。張巨濟字宏圖。福清人。嘉泰閒上書寧宗。以慈懿攬陵今在湖曲。若陸下游幸。則未免張樂。此豈履霜露之義。寧皇感悟其言。旋轉一秩。由此湖山遂無清蹕之聲。御鶴至沈于波。臣非特儉德也。黃洪詩云云。武林舊事。茂陵在御。略無游幸之事。西湖離宮別館。不復增修。黃洪詩云云。

余良弼

良弼順昌人。

教子詩

白髮無憑吾老矣。青春不再汝知乎。年將弱冠非童子。學不成名豈丈夫。幸有明窗并淨几。何勞鑿壁與編蒲。功成欲自殊頭角。記取韓公訓阿符。

萬姓統謚。良弼子大雅。與游敬仲同時。從朱子游。深得求放心之旨。兩捧鄉書。良弼有教子詩云。

宋詩紀事卷六十四

錢唐 厲鶚 緝

平陽 錢唐 施安 喬光復 勘定

丁 黼

黼字文伯號涎溪池州人寶慶初官成都制置使嘉熙三年北兵至力戰死之賜額立廟諡恭愍

送錢尉入國

正是朔風吹雪初行騰結束問征途不能刺刺對婢子已是昂昂真丈夫常惠舊曾隨屬國烏孫今亦病匈奴不知漢節歸何日準擬殷勤說汴都益部談資

陳 起

起字宗之錢塘人開書肆于睦親坊亦號陳道人寶慶初以詩禍為史彌遠所黥有芸居乙橐

瀛奎律髓寶慶初史彌遠廢立之際錢唐書肆陳起宗之能詩凡江湖詩人俱與之善刊江湖集以售劉潛夫南岳藥亦與焉宗之賦詩有云秋雨梧桐皇子府春風楊柳相公橋本改劉屏山句也或嫁秋雨春風句為散器之所作者併潛夫梅詩論列劈江湖集板二人皆坐罪而宗之坐流配于是詔禁士大夫作詩報定癸巳彌遠死詩禁解

秋懷

又見街頭賣紫萸。老懷擾擾類催租。客來喜得吳江紙。欲寫新吟一字無。

過三橋懷山堂

賣花聲裏憑闌處。沽酒樓前對雨時。景物如初情自老。夕陽波上燕差池。

挽許梅屋

桐陰吟社憶當年。別後攀梅結數椽。湖海有聲排逸韻。弓旌不至歎遺賢。兒收殘橐能傳業。自誌平生不媿天。航便雙魚無復得。夾山西望淚潺湲。以上芸居乙藥。

夜過西湖

鵲巢猶挂三更月。漁板驚回一片鷗。吟得詩成無筆寫。蘸他春水畫船頭。梅磻詩話。

鄭斯立

斯立字立之。

贈陳宗之

昔人耽隱約。屠酷身亦安。矧伊叢古書。枕藉于其間。讀書博詩趣。嚮書奉親歡。君能有此樂。冷淡世所難。我本抱孤尙。爲貧試彈冠。欲和南薰琴。秋風欵戒寒。恬無分外想。賸有日晷閑。閱書于市廛。得君羈思寬。誦其所爲詩。刻苦雕肺肝。陶韋淡不俗。郊島深以艱。君勇欲兼之。日夜吟辛酸。京華聲利窟。車馬如浪翻。淡妝誰爲容。古曲誰爲彈。桐陰覆月色。靜夜獨往還。人皆掉臂過。我自刮眼看。百年適志耳。豈必身是官。不見林和靖。清名載孤山。前賢小集拾遺。

翁定

定字應叟，建安人，有瓜圃集。

劉後村跋：應叟尤工律詩，送人去國之章，有山人處士疎直之氣，傷時間警之作，有忠臣孝子微婉之義，感知懷友之什，有俠客節士死生不相背負之意。

送胡季昭竄象郡

應詔書聞便遠行，廬陵不獨詫邦衡。寸心祇恐孤天地，百口何期累弟兄。世態浮雲多變換，公朝初日盡清明。危言在國爲元氣，君子從來豈願名。

鶴林玉露：李昭，廬陵人。寶慶初元，爲大理評事，應詔上書言濟邸事。竄象郡。翁定諸人送行云云：「兄子建弟國寶，皆懷奇負氣，友愛最隆，得罪之日，囊無一錢，子建挈家歸，寶文以活國寶奮然徒步從其兄。子貶所，季昭歿，詔許歸葬，贈朝奉郎，官其一子。」洪舜俞草贈官制詞云：「朕訪落伊始，首下詔求讜直，蓋與諫鼓誇木同意，以直言求人，而以直言罪之，豈朕心哉！爾風甚峭潔，志概激壯，繇尉廷平，上書公車，言人之所難言，方嘉貫日之忠，已墮僊月之計，開塗胥口，訪事瀧頭，曾無幾微見于顏面，何氣節之烈也！仁祖能全介於遠謫之餘，孝祖能拔銓於投荒之後，撫今懷往，魂不可招，潦霧墮鳶，悲悔何及！陟階員外，仍官厥子，用旌折檻之直，且識投杼之過，爾雖死可不朽矣。」

胡炎

炎寶慶初太學生。

送胡季昭竄象郡

一封朝奏大明宮。嘯起廬陵古直風。言路從來天樣闊。蠻荒誰使徑旁通。朝中競送長沙傅。嶺表爭迎小澹翁。學館諸生空飽飯。臨分憂國意何窮。鶴林玉露

李昉英

昉英字俊明。番禺人。寶慶丙戌。廷對第三。淳祐初。官吏部郎。累擢龍圖閣待制。吏部侍郎。歸隱文溪。卒諡忠簡。有文溪集。

久住白雲呈鎮長老

桑下戒三宿。我此尙畱戀。曹溪悟一夕。我復無知見。鎮公房遜客。所須如執券。園丁曉供茹。行者時灌硯。飯奴更芻馬。紙帳費香篆。主人真好事。荅應了無倦。欲歸興未闌。坐享伊蒲饌。

酌別張子元并序

子元已注今年班籍。去臘余以言職免歸。子元不待引見。毅然相隨南還。茲再入京。送之至鑿空閣下。用東坡韻爲別。

南士如君幾。妙處方寸境。撐腸五千卷。落筆擅三影。喜談狂朱雲。恥作諛谷永。憂時點髭雪。未肯疎鑷鏡。摩挲匣中龍。起視斗牛耿。每同畫灰語。寒夜僮僕屏。吾儕期歲晏。世俗任炎冷。江亭揮別酒。謔笑鬪機警。景文兄弟情。畝異禾同穎。日邊多便驛。頻書來越嶺。

景泰寺

樹合疑山盡。攀緣有路通。遠鴉追夕照。低雁壓西風。瀑勢雷虛壑。松聲浪半空。凭闌僧指似。漲霧是城中。

送舶使周甲

堂堂山立舊朝簪。久屈清流督獻琛。風送連艘出獅國。浪吹殘句到雞林。平生不隔同年面。中歲難禁惜別心。歸見蒼英定相問。祇言閉戶萬山深。以上文溪集

送湛師回華首寺

翩然拂袖忽然回。帶得羅浮面目來。乞食又還雙足繭。坐禪豈是寸心灰。故依華首從三靖。旋摘茶芽供一杯。蘭若苦空君不厭。可能爲我掃蒼苔。羅浮山志

洪夢炎

夢炎字季思。號然齋。淳安人。寶慶二年進士。歷官武學博士。出知衢州。有集。

高齋桂窟

植桂不在多種德。如種樹前人能種後人傳。自有清陰滿庭戶。高枝凌雲低覆闌。晴光翠色生晝寒。人家多愛種桃李。幾日春風紅滿地。何如此花開獨遲。蟾宮窟裏秋香細。課兒讀書書滿牀。更將幽興引壺觴。半酣獨臥高齋下。啼鳥數聲清晝長。淳安縣志

徐經孫

經孫字仲立。初名子柔。豐城人。寶慶二年進士。累遷刑部侍郎。太子詹事。拜翰林學士。知制誥。忤賈似道。罷歸。閑居十年。卒諡文惠。有矩山存稿。

病中有感

習嬾多成病。旬餘久覆杯。帳中聞燕語。瓶裏看花開。醫已肱三折。愁來腸九迴。何時得疎散。屐齒印蒼苔。

送太庾黎丞

客懷秋易惡。送客更當秋。薄宦相從久。孤征暫畱。酒輕離思重。目短大江流。黃菊聊持贈。寒香晚不羞。

福州卽景

一別居諸歲月增。遙聞此景畫難能。潮田種稻重收穀。石路逢人半是僧。城裏三山千簇寺。夜閒雙塔百枝燈。當年六月東山裏。地湧寒泉漱齒冰。以上矩山存藥

吳子良

子良字明輔。臨海人。寶慶二年進士。官至湖南運使。大府少卿。有荆溪集。

葵花俗名一丈紅

花生初咫尺。意思已尋丈。一日復一日。看看衆花上。全芳備祖

馬光祖

光祖字華父。金華人。寶慶二年進士。仕至寶章閣直學士。沿江制置使。江東安撫使。知建康府。拜知樞密院事。以金紫光祿大夫致仕。卒諡莊敏。

汝南灣

當時只號汝南灣。後有三人住此閒。自謂逸民須隱約。並稱賢士想高閑。祇緣水味都殊異。且欲鄰居數往還。好事有時相就飲。不妨鐺脚對青山。

魚氏筆乘。汝南潯當秦淮。曲折處。齊陸慧曉清介自立。家子潯前。張融牽船住岸。卜鄰以居。劉瓛及弟璉二人并居其間。水有異味。時共酌飲之。馬制使光祖有詩。

翁甫

甫字景山。崇安人。寶慶二年進士。累官江西轉運使。改知泉州。有浩堂類稿。

九日

秋風兩度身爲客。已見重陽未到家。村酒不堪供節事。祇將青眼看黃花。全芳備祖。

程元鳳

元鳳字申甫。歙人。紹定二年進士。累遷參知政事。拜右丞相兼樞密院使。罷充醴泉觀使。度宗卽位。拜少傅右丞相。進封吉國公。致仕。卒諡文清。

明堂大禮慶成詩

聖心翼翼對蒼穹。歲事明禋協肅雍。玉輅曉升香霧滃。紫壇夜款瑞烟濃。風聲應律諧簫管。月色澄空映璧琮。丹鳳樓前恩施溥。歡呼三祝效堯封。
森嚴羽衛擁和鑾。咫尺龍顏侍至尊。禋祀儀文勤聖問。敬天實意進芻言。百神受職來鴻祉。多士承休肅駿奔。右饗不常威可畏。載歌周頌報皇恩。

寶祐五年史院修高孝光寧四朝國史成。上進九月明堂升佑高宗禮成進詩三章稱賀。

聖主嚴恭德意真。兩儀合饗鑒精神。九筵五室儀章舊。一祖三宗佑典新。風日益溫變輅駕。月星明概玉

卮陳元良式獻邦家慶。共祝吾皇壽萬春。

格天盛德素躬全。胙蠻交通心卽天。供幣用將祈永命。奉粢端爲告豐年。寬條日布民安業。捷幟星馳將護邊。虎拜紫宸稱賀處。祥光縈繞御爐烟。

愚臣何幸際明時。才本疎庸玷宰司。未報聖恩懷夕惕。更叨使領侍親祠。駿奔重屋儀文肅。雞揭端門惠術施。歸美慚微天保頌。畏威願繼我將詩。以上明良慶會錄

李曾伯

曾伯字長孺。潭懷人。居嘉興。理宗朝。歷官四川宣撫使。賜同進士出身。爲湖南安撫使。進觀文殿學士。又知慶元府。兼沿海制置使。有可齋類稿。

題二水光華軒

歷歷湖南道。駸駸嶺右州。感時僧解夏。觸事客驚秋。雨洗流金虐。風生落木愁。一萍如寄耳。往夢付悠悠。

寧廟挽詞

德化勤三紀。仁聲溢九州。滌衣昭禹儉。晷食軫文憂。潤色恢鴻業。艱難啟燕謀。中興宗漢廟。端自敬天休。自聽山東詔。甘泉息夜煙。璽膺新玉帛。圖貢舊山川。望切堯民日。憂形杞國天。中原尤感泣。不獨老臣然。

利州登棧道

足跡初來劍北州。試登危棧瞰江流。萬山西接地窮處。一水東歸天盡頭。欲訪殺函無健馬。相忘楚漢付輕鷗。丈夫要了中原事。未分持竿老釣舟。

偶得希真巖，整舊隱正在小圃。因賦

數峯佳致，藹前修。心匠玲瓏小更幽。公去我來幾傳舍，人非物是一虛舟。蠹天柳色新條改，垂地藤陰舊迹留。坐對黃花誰領會，猶疑胡蝶是莊周。以上可齋類彙

厲文翁

文翁，字聖錫，號小山居士，東陽人。唐詩人御史元之後。父少保模，理宗朝以郊恩入仕，累官權戶部尚書，端明殿學士。兩浙制置使，兼知臨安府，封東陽郡開國侯。

庭竹

渭川未暇栽千畝，庭檻聊須種數根。最愛深秋羣木脫，獨欺風雨戰黃昏。全芳備祖

句

暮雲春雪江南北，回首人生歎路歧。梅且喜臥龍常自在，新詩特地報平安。松 全芳備祖

岳珂

珂，字肅之，號亦齋。又號倦翁。忠武王孫。敷文閣待制。霖子。管内勸農使。知嘉興。歷官戶部侍郎。淮東總領。有玉楮集。

無題

秋水芙蓉試早妝，半軒微雨灑鴛鴦。細腰正欠酬金餅，奮翼何堪卸玉梁。髮鬢釵橫人在牖，繩低斗轉月侵牀。無情花影雲來去，都作一天風露涼。

試廬陵賀發竹絲筆

此君素以直節名。延風揖月標韻清。何人心匠出天巧。縷析毫分勻且輕。居然束縛復其始。卽墨紆朱封管城。世門官爵豈必計。且幸一家同汗青。

九月十三日始就郊墅拜寶謨閣直學士提舉江州太平興國宮之命

槐影西清舞翠鸞。竹宮高接五雲環。職陪溫洛圖書地。名在元封卜祝閒。晝訪未承龍閣問。晨香猶廁羽衣班。祠官到處無公事。且聽松聲老此山。以上玉楮集

鶴林寺

秋枕竹鳴屋。晝棊松掩關。雨晴猶溼徑。雲薄不藏山。未洗中原恨。誰消永日閑。西風動征隰。空媿鬢毛斑。鶴林寺志

董太初

保應廟在新昌縣十四都。隋諸王避難。沒葬其地。水旱疾疫。祈禱輒應。寶慶二年。從鄉民之請。建廟賜額。

廟食空山八百年。衣冠猶是李唐前。汴河十里垂楊柳。何似松陰數畝田。紹興府志

顏頤仲

頤仲字景正。龍溪人。煥章閣學士師魯孫。以祖蔭補官。累擢吏部尚書。寶章閣學士。提舉玉隆宮。卒。

柳

柳漸成陰萬縷斜。舞腰柔弱弄韶華。一庭春色無人管。簷雨聲中飛盡花。廣羣芳譜。

祝穆

穆字和父。曾祖確。歛之名士。于朱文公爲外祖。父康國。始從文公居崇安。穆少與弟舉同事文公。于雲谷得其緒論。嘗著事文類聚。方輿勝覽。行世。

山攀花

玲瓏葉底雪花寒。清晝香薰草木閑。移植小軒供宴坐。恍疑身在普陀山。全芳備祖。

楊棟

棟字元極。青城人。紹定二年進士。度宗朝官同知樞密院事。參知政事。出知慶元府。卒。有平舟集。淨土寺追和東坡韻。在臨安。吳越王建。

令君督來期。書郵日旁午。世事不足論。清游乃先務。朝朝叩禪關。復此得淨宇。淺斟琥珀濃。細嚼銀絲縷。味雋問牛酥。軒高來燕乳。曲折溪屢橫。尖圓峯可數。萬頃喧桑田。一蔟靜松塢。由來鏡中人。不殊草頭露。越主朝汴宮。蜀客盡吳語。剝蝕淨土碑。荒殘峽山路。桑梓如之何。誰能忘一顧。日詢錦橋新。三歎清流俯。咸淳臨安志。

蔡抗

抗字仲節。號九軒。處士元定孫。沈之子也。紹定二年進士。累官擢吏部尙書。端明殿學士。同知樞密院事。拜參知政事。以忤時相落職。奉祠卒。諡文簡。改文肅。

大隱屏

脫略塵世慮。仙巖共夷猶。乘源得風便。快楫行扁舟。神仙現奇怪。古木橫巖陬。振衣萬仞高。天風動衣裾。巍巍隱屏峯。擎天峙中流。良朋論心事。感慨悲新秋。浩歎復浩歌。一飲還一酬。南陽豈終臥。東山諒同憂。斟酌素有定。今焉試爲籌。西方起暝色。歸袂不可留。去去惜離別。後會良悠悠。武夷山志

陳松龍

松龍字應初。號三嶼。閩縣人。紹定二年進士。仕爲京口倅大理司直。

茶蘼

布葉叢條翠作圍。自生芒刺護裳衣。莫嫌野興難拘束。祇伴春風亦見幾。全芳備祖

曾原一

原一字子實。號蒼山。贛州寧都人。領鄉薦。紹定中。與戴石屏結江湖吟社。

賦楊妃轍七歲作

萬騎西行駐馬嵬。凌波曾此墮塵埃。誰知一掬香羅小。踏轉開元宇宙來。梅磧詩話

鄭會

會字有極。號亦山。

江亭夜坐呈曾蒼山

江梅欺雪樹榘牙。梅片飄零雪片斜。夜半和風到窗紙。不知是雪是梅花。詩林萬選

游金精山

春風棧閣曉雲寒。中有潺潺玉一灣。白石碁盤青石磴。蘚花猶帶漢時斑。

金精風月

題邱閒壁

醱醺香夢怯春寒。翠掩重門燕子閑。敲斷玉釵紅燭冷。計程應說到常山。

宋藝圃集

陳夢庚

夢庚字景長。閩人。紹定中廣西路漕幕。

大隱屏

大隱屏前風月閑。何人手種萬琅玕。深深五曲東流水。合作千年洙泗看。

武夷詩集

徐元杰

元杰字仁伯。信州上饒人。紹定五年進士第一。歷著作佐郎。兼兵部郎官。進太常少卿。兼給事中。

國子祭酒。卒諡忠愍。

湖上

花開紅樹亂鶯啼。草長平湖白鷺飛。風物晴和人意好。夕陽簫鼓幾船歸。

西溪叢話

孫子秀

子秀字元實。餘姚人。紹定五年進士。開慶初歷提點兩浙刑獄。除太常少卿。兼知臨安府。

游丹山

四明洞天居第九。巨靈擘石開窗牖。捫蘿陟巘不憚勞。同行況遇忘年友。老苔護石蒼虎閑。飛瀑懸崖玉龍吼。豁然人與境俱勝。未必醉翁真在酒。徘徊步月醉忘歸。世事浮雲竟何有。姚江逸詩

朱繼芳

繼芳字季實。建安人。紹定五年進士。有靜佳乙橐。

登眺

破帽任風吹。天知鬢已絲。大江流禹蹟。老樹見秦時。北際山如礪。南溟水似池。夜涼無夢到。久已歎吾衰。

江湖偉觀

葛嶺壽星院上有閣曰江湖偉觀。安撫趙與憲建。

吳山表裏水爲池。百有餘年壯帝畿。天目舊將雙鳳下。海門新拱六龍飛。胥濤白雪生秋思。太乙紅雲駐夕暉。江上沙鷗湖上舫。柳絲風裏兩依依。

次韻野水花朝之集

睡起名園百舌嬌。一年春事說今朝。鞦韆庭院紅三徑。舴艋池塘綠半腰。苔色染青吟屐蠟。花風吹暖弊裘貂。主人自欠西湖債。管領風光是客邀。

吳歌

雁影江潭底。秋聲浦溆間。吳兒歌一曲。月子幾回彎。

揚州

金陵王氣水東流。流到淮南古岸頭。夜半一聲天上曲。錦帆天子下揚州。

用前韻謝野水郎君招飲

爲有池臺無限嬌。遊人歌舞尙朝朝。清漪浴日開金面。晴晷調風袞綠腰。騷客五花唐殿馬。主家七葉漢庭貂。丁寧紅紫休開徧。約住春風待見邀。

題李秋堂盟鷗集

相逢已恨十年遲。買酒吳山一夜時。明日送春仍送客。柳花風颺鬢邊絲。

辛亥二月望祭齋宮因遊甘園

朝霏作雨連天溼。花氣熏人到骨香。四望水亭無正面。有花多處背湖光。老眼看花興未厭。不知頭上雨廉纖。流鶯浪語東風恨。誰拗花枝插帽檐。

滄浪風月

我登滄浪亭。復歌滄浪曲。歌竟復長歌。杳杳山水綠。天風吹散髮。山月照濯足。爲謝獨醒人。漁家酒初熟。
以上靜佳乙集。

靈芝寺

黃金市地小橋通。四面清平納遠空。雲氣長扶天子座。日光浮動梵王宮。殘碑幾字莓苔雨。疎磬一聲楊柳風。沙鳥不知行樂事。背人飛過夕陽東。

武林舊事。寺在湧金門外錢王故苑。芝生其間。捨以爲寺。高宗孝宗凡四臨幸。朱靜佳有詩。

六言

柳下白頭釣叟。不知生長何年。前度君王遊幸。賣魚收得金錢。

武林舊事。淳熙閒壽皇以天下養。每奉德壽三殿。游幸湖山。凡游觀買賣。皆無所禁。小舟時有宣喚。賜予如宋五嫂魚羹。嘗經御賞人所共趨。遂成富媪。宋靜佳六言詩云云。往往修舊京。金明池故事。以安太上之心。豈特事遊觀之美哉。

薛師傅

師傅鄞人。紹定五年進士。有雪蓑集。

六橋閑步

出郭青岑近。臨流白鳥飛。笙歌春雨歇。草樹夕陽微。山色邀藜杖。湖風颭葛衣。虛舟林處士。不見鶴來歸。

甬上耆舊集。

俞桂

桂字希郟。仁和人。紹定五年進士。有漁溪詩藁。

過湖

舟移別岸水紋開。日暝風香正落梅。山色濛濛橫畫軸。白鷗飛處帶詩來。

虎丘

突兀浮圖插翠微。吳王事迹總成非。寺僧未晚山門閉。不放閑雲一片飛。

松江送人

西風蕭瑟入船窗。送客離愁酒滿缸。好記此時分袂處。暮烟微雨過松江。以上漁溪詩彙。

方岳

岳字巨山。號秋崖。祁門人。紹定五年進士。兩爲文學掌故。官中祕書。出守袁州。有秋崖先生小橐。

泊歙浦

此路難爲別。丹楓似去年。人行秋色裏。雁落客愁邊。霜月皎寒渚。江聲驚夜船。孤城吹角處。獨立渺風烟。
約黃成之觀瓊花予不及從以詩代簡

杜宇聲中鬢欲華。春風將綠又天涯。欠隨江夏無雙士。共看揚州第一花。想像烟雲人跨鶴。淋漓詩句字棲鴉。蹇驢不管唐衫溼。醉兀歸鞍暮雨斜。

立春都堂受誓祭九宮壇

輦路春融雪未乾。雞人初唱五更寒。瓊幡第一番花信。吹上東皇太一壇。

湖上

沙暖鴛鴦傍柳眠。春來亦懶避湖船。佳人窈窕惜顏色。自照晴波整翠鈿。今歲春風特地寒。百花無賴已催殘。馬塍曉雨如塵細。處處筠籃賣牡丹。綠波如畫雨初晴。一岸烟蕪極望平。日暮落花風欲定。小樓弦管壓新聲。游人抵死惜春韶。風暖花香酒未消。須向先賢堂上去。畫船無數泊長橋。

清明日舟次吳門

篷窗恰受夕陽明。楊柳梨花半月程。老去不知寒食近。一篙烟水載春行。

趙昭儀春浴

紅薇滴露護輕寒。微鬢香絲卸玉鸞。祇道春風庭院祕。外閒已作畫圖看。以上秋崖小稿。

陸壑

壑字景思。號雲西。會稽人。佃五世孫。紹定五年進士。官禮部員外。崇政殿說書。謝臯羽編天地間集。列于文謝諸公後。

絕句

采藥人歸聞朮氣。尋仙路遠夢桃花。買來山釀全如水。亦解昏昏到日斜。

野槿扶疎當縛籬。山深不用掩山扉。客來踏破松梢月。鶴向主人頭上飛。全芳備祖。

退宮人

破篋猶存舊賜香。輕將魂夢別昭陽。祇知鏡裏春難駐。誰道人閒夜更長。父母家貧容不得。君王恩重死難忘。東風二月垂楊柳。猶禁飛花入苑牆。天地閒集。

湯巾

巾字仲能。安仁人。官制幹。

以廬山三疊泉寄張宗瑞

九疊峯頭一道泉。分明來處與雲連。幾人競賞飛流勝。今日方知至味全。鴻漸但嘗唐代水。涪翁不到紹

熙年從茲康谷宜居二。試問眞巖老詠仙。

遊宦紀聞廬山三疊泉於紹熙辛亥歲始爲世人所見從來未有以淪茗者。紹定癸巳湯制幹仲能主白鹿教席始品題以爲不讓谷簾寄張宗瑞云。

張輯

輯字宗瑞履信之子。馮深居目爲東仙。有欵乃集。

朱滿虛序其詞云東澤得詩法於姜堯章世所傳欵乃集皆以爲采石月下謫仙復作不知其又能詞也。

次湯制幹寄三疊泉韻

寒碧朋尊勝酒泉。松聲遠壑憶畱連。詩于水晶進三疊。名與谷簾眞兩全。畫壁烟霞醒昨夢。茶經日月著新年。山靈似語湯夫子。恨殺屏風李謫仙。

游宦紀聞紹定癸巳湯制幹仲能主白鹿教席始品題三疊以爲不讓谷簾常以詩寄二泉張寶之云云九疊屏風之下舊有太白書堂。

蕭、蕭

蕭字則山號大山臨江人紹定進士以太府丞奉祠。

贈陸冰詩

標格眞清映雪霜。每聽新語覺神傷。茶分鴻漸經中味。菊愛龜蒙賦裏香。圃積玉多知學飽。囊裝金少爲

貧忙向來笑疾難醫在。老筆空抄十卷方。

梅磻詩話純用陸姓事與東坡贈

張子野詩頗相類鴻漸龜蒙的對

荻芽

江客因貧識荻芽。一清塵退雜魚蝦。燒成味挾濠邊雨。掘得身離雁外沙。春饌且供行釜菜。秋江莫管釣船花。食根思到蕭騷葉。痛感邊聲咽戍笳。

荔子

選荔過于選士難。味佳能有幾登盤。林家新出金釵子。合入君謨譜後看。

句

雨過亂蓑堆野艇。月明長笛和菱歌。以上全芳備祖。

章謙亨

謙亨湖州人。紹定中鉛山令。

淨惠院

淨惠荒涼寺。平林淺阜閒。殿存碧支佛。門對赭亭山。遠屋竹陰翠。沿階苔暈斑。雨中來託宿。卻羨白鷗閑。

廣信府志。

安如山

如山字汝止。廣漢人。善擊劍。左右射。讀經史百氏之書。端平甲午。安撫曹友聞辟掌書記。不起。友聞戰死。如山往收其骨。藏諸其先人之側。乃東下。老子會稽。

曹將軍

將軍精悍姿。齒齒碎鐵石。在昔童稚中。但聞飽經術。縱橫騁柔翰。丹蘄開金碧。有司塞明詔。敵邑屈詞伯。芹香春水生。冠玉侍重席。脫略章句陋。搜抉窮理窟。未及文化成。其如王土窄。丈夫報主願。豈必蒙清秩。蒼然請去位。滿面秋栗烈。糾合熊虎羣。旌旆揚廣陌。正當摩厲閒。一鼓拔勍敵。屯兵沔水源。千里斧戡截。浩蕩排烟旻。西極安岷嶲。柰何國無人。腐儒秉旄鉞。賞予入私門。金湯授盜賊。公時奮臂爭。反遭獻玉刑。三軍視馬首。慟哭下天壁。功成坐齟齬。憤怒鬚插戟。中宵拔劍赴。肅肅整勁翮。吐氣風雲生。拳旗陷堅列。貫穿死生地。蹀血天地黑。勢雖衆寡懸。形未雌雄決。路窮斷首尾。衆盡乃手格。豈知龍虎逝。黯淡山川色。百萬尙震驚。嗚呼死諸葛。長城但自壞。千古痛稠結。肉食無遠謀。野史有直筆。酒酣歌節士。晶晶霜月白。去去如奔馬。來來無盡船。人心似江水。日夜向吳天。以上谷音。

下瞿塘

黎宙

宙號月潭。

游金精山

不到金精久。山空花自香。殿梁唐歲月。石鼓漢文章。洞杳多雲氣。崖高易夕陽。酌泉消世慮。吾亦正徜徉。

金精風月

宋詩紀事 卷六十四

宋詩紀事卷六十五

錢唐厲鶚輯
吳毛德基勘定

陳均

均字平甫號雲巖莆田人俊卿從孫肄業太學嘗輯宋編年舉要備要二書端平初有言于朝者
敕賜迪功郎不受卒

九江聞雁

烟波渺渺夢悠悠家在江南海盡頭音信稀疎兄弟隔一聲新雁九江秋詩家鼎鑿

鶴林寺

知有楓林坐竹閒每尋紆路試登山虛簷忽見籠中鶴似我愛閑身未閑
竹遶高僧逢話處花畱仙者舊開枝道身虛淡元無著付與東風爛漫吹鶴林寺志

杜旃

旃字仲高旃弟與弟旂叔高旣季高旣幼高俱博學工文人稱金華五高嘗占湖漕舉首有癖齋
小集

綠珠行

蜀絲般空金作谷。珊瑚成林珠百斛。彼姝千花萬花蕪。明月出胎波照綠。鏡中飛鸞掌中身。夜月春花看不足。悲歎倚伏爲禍福。西里憐顰東市黻。願將舊意奉新人。此別它生定難卜。君因妾死莫多怨。妾死君前君眼見。高樓直下如海深。璧玉一碎沙中沈。平時感君愛妾貌。今日令君知妾心。

讀杜詩斐然有作

王澤久淪浹。正聲皆雅言。百川忽西流。青黃雜犧尊。騷經吹死灰。明燭日月昏。綺麗兆建安。淳古還開元。夫子握元氣。大音發胚暉。明婁失毫芒。神義隘乾坤。再變六義彰。一日五典惇。上該周南風。下返湘水魂。仲尼不容刪。餘子何足吞。五季兵戈繁。嘲嗜蟲鳥喧。頽波旣瀾漫。新奇尙西崑。吻喙生譏評。神鬼懷憤冤。王蘇發醞醞。黃陳窮河源。煌煌百年閒。後學同推尊。時時或嘗鼎。往往猶戴盆。傲慕惑銅槃。箋釋訛金根。顧子小子旃。獨受罔極恩。神融淚交墮。思苦心屢捫。相望五百載。如接顏色溫。爐冶無停工。況復忝諸孫。斯文誠尙存。庶以起九原。

陸務觀赴召

四海文章陸放翁。百年漁釣兩龜蒙。數關天地吾何與。老作春秋道未窮。李耳守官逾二代。張蒼職史到三公。坐令嘉泰追周漢。此是君王第一功。以上辭齋小集。

杜旂

旂字叔高。端平初以布衣召入館閣校讎。

陳同甫跋云。叔高之詩。如千戈森立。有虎食牛之氣。而左右發春妍。以輝映于其間。

嚴先生釣臺

斯人真隱處。寂寞使人愁。正著雙臺在。還從一老遊。涼風動陰壑。斜日下滄洲。灘畔沈沈水。潛魚亦避鉤。

釣臺集。

游九功

九功字勉之。建陽人。用蔭補官。除湖北運判。知鄂州。召爲兵部郎官。出知泉州。端平初仕至司農少卿。寶謨閣直學士。與兄九言自爲師友。講明理學。號受齋先生。諡文清。

絕句

烟翠松林碧玉灣。捲簾波影動清寒。住山未必知山好。卻是行人得細看。全芳備祖。

答黃叔陽

冥鴻倦雲飛。斂翼退遵渚。秋蟲感時至。自野來在宇。老我久合歸。溪山況延佇。俯此沙水清。面彼烟塵聚。壘斷旣衝衝。瀾倒亦詡詡。豈無砥中立。而不改風雨。忽忻遠寄聲。秀句盈章吐。璀璨爛寒芒。晴空見冰柱。頗聞詞場筆。漫焉棄如土。黃梁枕上過。得之亦不處。獨行固不移。尤在審去取。詩家鼎鑪。

李伯玉

伯玉字純甫。饒州餘干人。端平二年進士第二。仕至敷文閣待制。權禮部尙書。兼侍讀卒。有斛峯

集

懷湯尚書伯紀

一曲清歌一弄琴，十千美酒十分斟。江流不動潮初上，斗柄將垂夜向深。沙觜露溥孤鶴警，潭心月冷老龍吟。此時最是懷鄉國，雲裏征鴻閒遠砧。饒州府志。

潘 勃

勃字庭堅，閩人。端平二年進士第三，歷太學正，通判潭州，有紫巖集。

齊東野語：庭堅富沙人，初名公筠，後以詔歲乞靈南臺神，夢有人持方牛首與之，遂易名勃。理宗殿試第三人，跌宕不羈，為福建帥司機宜文字，日醉騎黃犢，歌離騷于市，嘗約同舍置酒瀑泉，酒行，令曰：有能以瀑泉灌頂而吟不絕口者，眾拜之。庭堅被酒豪甚，脫巾髻髻，裸立流泉之衝，高唱灑纓之章，眾謬為驚歎，羅拜以爲不可及。歸即臥病而殂。庭堅年六七歲時，嘗和人詩云：竹輓生便直，梅到死猶香。識者知其不永。劉潛夫誌其墓云：庭堅爲文，脫去筆墨蹊徑，秀拔精妙，結字有顏筋柳骨，小楷尤工。廷試第三，策傳京師，紙貴。初遠相擅國，諱聞綱常，端平親政，奮發獨斷，雪故王，收人望。乙未，策士庭堅對曰：陛下手足之愛，生榮死哀，反不得視土庶人，宜厚東海之恩，裂淮南之土，以致人和。時對者數百人，庭堅語最直。

澧陵

一郭依稀隔渡頭，解鞍來倚店家樓。已攀桂樹吟招隱，因看梅花賦遠游。市上俚音多楚語，橋邊碧色是湘流。江南鄉國三千里，目送羈鴻起暮愁。後村千家詩。

題嶽麓寺道鄉臺

坡仙不謫黃黃應無雪堂道鄉不如新此臺無道鄉青山非其人山靈能頡頏一落名勝手境與人俱香
悲吟倚空寂臨眺生慨慷道鄉不可作承君不可忘困學紀聞

景靈宮恭謝駕回丞相以下皆簪花

輦路安排看駕回千官花壓帽簷垂君王不輟憂勤念玉貌還如未插時隨隱漫錄

落梅

一夜風吹恐不禁曉來零落已駸駸忍看病鶴和苔啄空遣飢蜂繞竹尋稚子躊躇看不埽老夫索寞坐
微吟窗前最是關情處拾片殷勤在掌心夢梁錄

英烈夫人廟

淮海豔姬毛惜惜蛾眉有此萬人英恨無七首學秦女向使裹頭眞杲卿玉骨花顏城下土冰魂雪魄史
開名古今無限腰金者歌舞筵中過一生

高郵州志毛惜惜郵之官妓也端平二年榮全據城叛召

惜惜佐酒不風罵賊死詔封英烈夫人賜廟潘枋有詩

曹娥江

一川紅日漲晴波黃絹碑漫閉碧蘿不止但爭三十里曹擘元不識曹娥娥江題錄

林希逸

希逸字肅翁福清人端平二年進士歷官翰林權直兼崇政殿說書直祕閣知興化軍有虞齋續

集竹溪十一藁

劉後村跋乾淳間林艾軒始好深澁之思加鍛鍊之功有經歲累月繕一章未就者一傳爲網山林氏名亦之字學可再傳爲樂軒陳氏名藻字元潔三傳爲竹溪詩比其師樞乾中含華滋蕭散中藏嚴密窘狹中見紆餘

題馬和之覓句圖

先生隱几奴煨火斜插疎枝破瓦尊鶴夢未回更幾轉吟成應是月黃昏

明皇聽笛圖

壽王妃弄寧王笛對面三郎背老伶卻恨馬嵬西去路無人吹出雨淋鈴

題江貫道山水四言

此畫正絹作石林簡齋有詩跋

遠山叢叢遠樹濛濛咫尺萬里江行其中短長何岸高低何峯彼坻彼峙彼瀑彼洪晴嵐乍豁煙靄蔥籠或斷或屬且淡且濃爾峯奚寺爾盤奚宮或垣陰翳或梁嵌空有吠者廡有樵者翁危檣落碇短棹掀篷往來異趣寂動殊容霧翠其庭豈非盧鴻略約而渡豈非龜蒙昔我經行雲山萬重若淮南北與江西東亦蓑而雨亦帽而風乃今追維夢境相從及此開卷恍然昔同誰居作者造化論功淹總其裔熙成是宗聲聞九陞既召而終謂彼樹白貫道畫林木如算子其身皆白識其身窮其然豈然訊之天公此名穹壤疇曰不逢

題達磨渡蘆圖

白頭浪中碧眼胡赤腳笑蹋雁銜蘆太平寺主不知我觀音後身誰誑渠是身如幻本來空偶然遊戲非

神通當年涉海向震旦，扁舟本與商胡同。君不見壺丘弟子御風飛，猶有所待周笑之。又不見橫拋錫杖渡水僧，回瞻黃檗稱大乘。此胡法器更奇在，何曾以此爲聖解。蕭郎不悟義不畱，欲要時人略驚怪。異時埋骨寄熊耳，萬里西歸提隻履。忽從蔥嶺遇宋雲，雅意依然今日是。此圖誰筆面如活，客來卻詠臨波轍。若將底事比渠儂，老胡暗中定差殺。以上竹溪十一藥。

曾三異

三異字無疑，號雲巢。新淦人，以隱逸召爲祕閣校勘，除太社令。

鶴林玉露雲巢周益公門人，博學工文，尤精考訂，以隱逸召立朝，逾年未及有所開陳，奉祠而歸，年九十乃終。

攜茶訪楊東山

寒衣不待履霜回，到得如今亦樂哉。泓穎有時供戲劇，軒裳無用任塵埃。眉頭猶自懷千恨，興到何如酒一杯。知道華山方睡覺，打門聊伴茗奴來。

鶴林玉露：端平初，楊東山累辭召命，以集英殿修撰致仕家居。年八十，曾雲巢攜茶訪之，詩云。

陳容

容字公儲，自號所翁，福唐人。端平二年進士，倅臨江，入爲國子監主簿，出守莆田。

圖繪寶鑑所翁詩文豪壯善畫龍得變化之意潑墨成雲噴水成霧醉餘大叫脫巾濡墨信手塗抹然後以筆成之或一臂一首隱約不可名狀曾不經意皆得神妙

題浯溪中興頌

銀旗金甲渡巴西。靈武城樓已萬幾。一札祇聞元帥命。五牋合待使臣歸。未聞請表更追表。且看黃衣換紫衣。天性非由人偽滅。何緣尙父結張妃。

六等勝如誅獨柳。二張縱活亦何顏。太師死後猶書法。水部刑章托頌閒。最憶海青投樂器。絕憐甄濟隱青山。中興碑下姦臣懼。天道何嘗不好還。隨隱漫錄

張道洽

道洽字澤民。號實齋。衢州開化人。端平二年進士。嘗爲池州簽判。後辟襄陽府推官。卒。平生作梅花詩三百餘首。

方萬里序實齋先生詩無一語不平淡而豪放之氣自不可掩詠梅詩極多篇有意句有韻

梅花

行盡荒林一徑苔。竹梢深處數枝開。絕知南雪羞相並。欲嫁東風恥自媒。無主野橋隨月管。有根寒谷也春回。醉餘不睡庭前地。祇恐忽吹花落來。瀛奎律髓

李山節

山節、汾州人。金亡歸宋。

詠楊妃菊

命委馬嵬坡畔泥。驚魂飛上傲霜枝。西風落日東籬下。薄倖三郎知不知。

山房隨筆。端平中朱湛盧復之使北。展觀八陵。引李與王仲偕南。李初任鄉郡節制司幹。後任浙西倅。時正倅陳三嶼松龍。會僚友于多景樓。賞楊妃菊。令諸妓各持紙筆侍衆。官請詩。李自江下後。至酒一行起。背手數步吟云。辭致精切。或至闌筆。

陳振孫

振孫字伯玉。號直齋。安吉縣人。端平中仕爲浙西提舉。改知嘉興府。嘗著書錄解題。

題張氏十詠圖

平生聞說張三影。十詠誰知有乃翁。逢世昇平百年久。與齡耆艾一家同。名賢敘述文章好。勝事流傳繪素工。遐想盛時生恨晚。恍如身在畫圖中。齊東野語。

朱復之

復之字幾仲。號湛盧。建安人。端平中使北。展謁八陵。

楓

鳳山高兮上有楓。青女染葉猩血紅。莫辭老紅嫁西風。一夜憔悴成禿翁。全芳備祖。

句

忽聽夏禽三五弄。新紅突過石榴枝。初夏紅蕖老去羞明鏡。推讓朱榮上蓼梢。秋日後村詩話。

周 弼

弼字伯弼。文璞之子。有端平詩集。

建寧浦城李頻行祠

建安梨嶽老梨木。刻作唐朝建州牧。香爐忽動吹寒灰。浦城環翠陰風來。嶺頭頑石盡能走。澗下奔泉皆倒回。猿猱啼兮鬼嘯野。六元蚪兮四驪馬。想須吟遶碧草亭。舉手高翻白雲寫。峯爲文通名夢筆。楊公書堂曾散帙。麗月鮮霞付與誰。烟墅有人還築室。田父何所祈。贈爾青甍黑桑椹。里儒何所求。贈爾黃梁布囊枕。萬歲兮千秋。既往兮復畱。抽蘭心。拆椒口。簸南箕。挹北斗。不假竹枝歌。何須折楊柳。祇用秦原妙絕詞。傳入神弦薦春酒。

寄杜北山

一曲小湖濱。幽居不厭貧。坐容禪子憩。家就麴生鄰。簷竹侵燈衆。籬花落竈頻。幾時吟得句。寄與豫章人。

孫伯符墓

梧葉蕭蕭墓草長。夢魂曾斷九迴腸。空聞絳靶離漳水。誰見黃旗入洛陽。虎踞有基宮樹老。龍盤無廟石城荒。赤烏不識桑田變。猶自棲棲戀白楊。

山居春晚

索居牢落動關心。但覺怱怱歲月侵。無夢不因憐晝靜。有懷多是惜春深。草香稚蝶銷胡粉。花落蠻鶯變楚金。最是不禁芳樹色。能涵幾日又成陰。

荻港

波眼法法浪復輕，稍蘇羈束過清明。情人覓路先尋酒，久客懷鄉始見錫。松下紫芽肥野菜，竹間青葉帶山櫻。自從一別齊安後，直到今朝始聽鶯。

中和節

時節匆忙過隙駒，可堪岑寂就船居。不禁衰病慵耽酒，無益閑交嬾報書。風暖暮田歸海燕，雨酣春水上潮魚。客中自是光陰速，纔見新正又月初。

釣臺

晴江漾漾綠波來，惆悵君房去不回。秦苑山河歸故國，越鄉風雨閉荒臺。春風一道江蘿長，落日千峯杜宇哀。欲訪釣舟無處所，野花如雪滿汀開。

野廟

野廟荒蕪倒掩扉，寂寥香火客來稀。年年歸燕相看覩，空滴春泥損畫衣。

夜深

虛堂人靜不聞更，獨坐書牀對夜燈。門外不知春雪霽，半峯殘月一溪冰。

題僧子溫畫水墨葡萄

鼻鼻多應半熟時，落斜高挂冷攢枝。分明記得山窗下，一架寒藤帶雨垂。

除夕思歸

山妻書到多日野渡舟橫幾回想見溪邊亭上故人待我銜杯以上端平詩稿

陳瀧

瀧字伯雨其先汴人徙于吳鄉薦漕試皆不利晚號碧澗翁與湯仲友高常顧逢皆吳中端淳名士

題蘇子美滄浪亭有盤井方石上刻字兩行云滄浪亭奕局

整履上飛虹風高退酒容葉黃翻亂蝶樹老臥蒼龍古徑秋霜滑空山暮靄濃滄浪碁石在題筆暗塵封硯北雜志

樓扶

扶字叔茂號梅麓鄞人端平中沿江制置司幹官淳祐中知秦州軍事

句

夜深更擁寒衾坐明月梅花共一窗全芳備祖

張端義

端義字正夫自號荃翁鄭州人居姑蘇端平中應詔三上書韶州安置有貴耳集

賦秋江圖

浪靜風平月正中自搖柔櫓駕孤篷若無三萬六千頃把甚江湖著此翁

費耳集附自作小傳。大父雲莊公登辛未榜。先君詠齋爲淮南漕。光宗卽位初年。應詔上書。下後省看詳。羅紫薇點劉左史光祖極稱賞之。將上爲時宰所沮。予少苦讀書。肄舉子業。勇于弓馬。嘗拜平齋項先生于荆南。如慈湖說齋鶴山菊坡習菴皆從之遊。愛作詩賦。小詞。盧蒲江取碧雲千里暮紅葉十分秋之句。周晉仙取怨春紅豔冷之句。孟臧春取蜨詩不因花退盡。必是夢殘時之句。凡海內名勝。來莫必訪。樂圃之張書。桃符曰。江湖且過。詩酒叢林。應端平詔上第三書。得旨韶州安置。以螻蟻之微。嬰斧鉞之威。人皆危之。當國者云。詔以直言。罪以直言。非祖宗制。幸脫萬死。考之典故。安置待宰。執侍從。居住待庶官。聽讀待士子。自效待軍將。小臣用大臣之法。誤矣。或者以安置爲竄謫之極典。又非也。余三十年前賦秋江圖一絕。今白髮種種。儻符此詩語。吾志畢矣。余生于淳熙之己亥。書於淳祐之辛丑。年六十有三。有上皇帝三書。詩五百首。詞二百首。雜著三百篇。曰荃翁集。

挽周晉仙

策杖辭朋友。形骸已可憐。無錢親藥裹。冒雨上歸船。官竟生前棄。詩應死後傳。空餘京洛月。愁照夜臺邊。
詩家鼎鑪

盧方春

方春號柳南。永嘉人。嘉熙戊戌進士。

送陸郎中歸越

啾啾風雨餘。出晝思何如。鏡裏無慚色。囊中有諫書。寒崖立松柏。清廟擲璠璵。四海看霜月。光明祗似初。
詩林萬選

窄嶺

危嶺惡有名。窄嶺險無數。石鼻卷我車。石牙隱我步。空岡蟲九頭。黑身眼四顧。擲之聲愈厲。飛前使人怖。想當開闢時。已是樵獵路。茅臭不成山。瀑斷不成布。羊崑升惡狻。蹄涔立飢鷺。蘆花大如錢。況乃時寒互。遐征誤假道。撫景自作怒。林壑非出倫。筆硯不入務。腳怠宿未投。天低日俄暮。東甌詩集

錢時

時字子是。號融堂。淳安人。受學慈湖之門。嘉熙二年。以薦授祕閣校勘。出佐浙東倉幕。召爲史館檢閱。有蜀阜前後集。

十六渡

頗聞十六渡。客子良閒關。一雨落澗谷。湍氣怒潺潺。我來屬秋晚。霜葉初爛斑。窈窕行竹輿。鳴禽相與閑。複嶺互交鎖。淺瀨隨回灣。路斷一罅通。石磴危躋攀。時見荷鋤者。行歌語蠻蠻。採山有薇蕨。結廬有茅菅。安知避世人。不曾巢其閒。何時一枝筇。溯流到黃山。桃源事荒怪。誰謂非人寰。

蜀阜精廬無風自涼方欣然出戶見竹雞將雛砌外

蔕葡淨如洗。蒼筤清且深。依巖自幽潤。況無日影侵。亭午一升階。忽若投凌陰。涼氣颯以入。肅肅生衣襟。大火浮炎埃。虛堂抱雲林。安得冰霜顏。聽我山中吟。盤桓去未忍。砌外行山禽。一母將四雛。出沒叢草陰。我非有馴德。渠自無機心。欣然歸北窗。載弄南風琴。

袁尚友座中王屯田出與可竹甚奇歸成古調

郎星聚頭金地籠。十月夜堂春昱昱。屯田博古到名畫。座上忽展牛腰束。我生不識須菩提。薛鶴楊梅姑置之。寒梢八幅奇更偉。上有巴中與可題。蒼蛟滑足石詰曲。鐵鉤怒掃連蛇腹。鼓風灑雨清逼人。恍疑身在箕筥谷。千尋雙榦劔拔雄。筆力有盡意無窮。冥冥上與風雲會。拭目變化洪陂龍。長憶東坡一轉語。與可德人非畫史。輪困寫出歲寒心。正要諸公來料理。薛稷鶴楊補之梅並唐畫須菩提皆座上所觀

新晴

宿雲穿日薄。商略作新晴。燕子先期社。海棠今日春。溪山雙白鬢。天地一閑身。無語東風裏。飛花亂撲人。

安素午睡

禾黍秋相近。溪山日自長。午窗千嶂雨。幽夢一簾香。以上蜀阜集

溪南遇雨

溪風颯颯雨霏霏。秋滿蘋汀獨步歸。丹巘園林棠葉老。錦纏籬落豆花肥。眼前風景依然在。箇裏光陰得者稀。憶著歲寒雲壑上。山禽對雨傍人飛。嚴州府志

登蜀阜

秋暮如京歲暮還。春來更墮藥瓢閒。眼前有底閑風月。忍得經年不上山。青溪詩集

賈似道

似道字師憲。號秋壑。天台人。姊爲理宗貴妃。詔赴廷對。登嘉熙二年進士。累拜少傅右丞相。度宗朝拜太師。平章軍國重事。德祐初。元兵破鄂州。出督師。潰于魯港。謫高州團練使。循州安置。至漳

州木綿菴監押鄭虎臣拉殺之。

盧熊蘇州府志。鄭虎臣宅在鶴舞橋東。其家鉅富。居第之盛。號鄭半州。四時飲饌。各有品目。著集珍日用一卷。并元夕閨燈寶錄一卷。當宋末殺。買似道於木綿菴。即其人也。虎臣字景召。

歸葛嶺舊居

罷官歸舊宅。山水得頻過。息影隄邊樹。清心湖面波。勞無功可紀。頑有命相磨。見說連朝雨。田家正剪禾。

題孤山

半是樓臺換卻春。幾回獨立更消魂。斷隄野水梅花宅。千古春風月一痕。

紫薇嶺在昌化縣。

西風落葉路漫漫。依袂微生旦暮寒。祇隔片雲家便到。遠山移作夢中看。

鳳山在於潛縣。

數家烟火深村裏。幾處牛羊落照中。客久不歸心事遠。梧桐葉葉是秋風。

宿天竺通元菴

十里高楓樹。松邊屋數間。客同終夜語。心是一般閑。燈色難禁雨。秋聲不離山。明朝分手後。俗事不相關。

咸淳庚午冬大雪遺安撫潛侍郎

臘前又放玉園林。一片花飛一片心。漉奕端由人所召。變調多媿病難任。乾坤浩浩無偏處。田野穰穰更自今。但得諸賢成此樂。權舟我欲去山陰。以上咸淳臨安志。

芍藥

又是揚州芍藥時。花應笑我賦歸遲。滿堂畱客春如畫。對酒何妨鬢似絲。玉立黃塵那可到。錦幃紅蠟最相宜。買山若就當移種。此際誰能杖履隨。

梅花

朔風吹面正塵埃。忽見江梅驛使來。憶著家山石橋畔。一枝冷落爲誰開。山北山南雪未消。村村店店酒旗招。春風過處人行少。一樹疎花傍小橋。

閨怨

燕子樓前柳色新。畫眉人去鏡生塵。年來羞結空牀夢。閑撥琵琶過一春。以上全芳備祖

寒食

寒食家家插柳枝。戀春春亦不多時。兒孫祇解花前醉。青冢能消幾箇悲。

三朝野史寒食詩云。此賈秋壑于德祐元年。上母墳回至集賢堂所作。豈非亡國之讖。

天台石橋

古寺行終日。僧房出翠微。瀑爲煎茗水。雲作坐禪衣。尊者難相遇。遊人又獨歸。一猿橋外急。便是不忘機。
天台山志。

句

梅花見處多畱句。諫草藏來定得名。送朝客 深雪偶談。

朱南杰

南杰、丹徒人。嘉熙二年進士。溧水令。有學吟。

同陳如叔遊湖

四月湖邊冷若秋。先賢堂下繫扁舟。山頭積翠來新意。波面飄紅憶舊遊。無奈楊花欺倦客。已多荷葉覆輕漚。隄邊誰道春歸了。猶有一聲黃栗留。

題吳梅菴和靖索句圖

童寒鶴冷雪霏霏。正是先生得句時。一段孤清圖不盡。梅花從此厭人詩。以上學吟。

錢默

默、號梅谷。時子。

秋思

坐擁遺衾百尺樓。湘簾高捲不勝秋。半窗涼月三更夢。一枕淒風萬斛愁。青溪詩集。

錢標

標、默弟。

溪上

秋老蘆花冉冉飛。曉天寒氣襲人衣。輕橈權入鷗羣去。釣得鱸魚帶雨歸。青溪詩集。

蔡公亮

公亮嘉熙中監岳見孫夢觀雪窗文集附錄

一字天

石室陰幽卻朗然仰窺長罅見清元不知誰把如椽筆畫出光明一字天武夷詩集

翁逢龍

逢龍號石龜四明人嘉熙中平江通判

天津橋

下馬過天津聽傳禁漏頻惟憐一橋月曾照六朝人金剝宮門字紅飛粉壁塵中官來宿內因問帝鄉親景定建康志

曹娥江

再拜靈娥廟魂清若可招幡風吹古渡帆月落殘潮碑有行人讀香多野客燒迎神漢朝曲時聽起雲霄娥江題詠

杜耒

耒字子野號小山盱江人

鶴林玉露嘉熙間山東忠義李全跋扈日甚朝廷擇人帥山陽見士大夫無可使遂用許國許國武人也特換文資除太府卿以重其行國至山陽偃然自大受全庭參全軍忿怒因而殺之轅客杜子野詩人也亦死焉

送胡季昭竄象郡

事見翁定詩

廬陵一小郡。百歲兩胡公。論事雖小異。處心應略同。有書莫焚橐。無恨豈傷弓。病媿不遠別。寫詩霜月中。
鶴林玉露

寒夜

寒夜客來茶當酒。竹爐湯沸火初紅。尋常一樣窗前月。纔有梅花便不同。

同紫芝宿雙嶺

本作翠巖游。反成雙嶺畱。雲深山易晚。雨過寺如秋。野水連青竹。殘僧半白頭。上方成共宿。劇語到元幽。
以上前賢小集拾遺

苕溪

風掠篷窗兩鬢秋。生涯無歲不扁舟。吟詩本欲相消遣。及到吟成字字愁。
詩林萬選

趙范

范字武仲。號中菴。衡山人。少從父方軍。累官淮東安撫。與弟葵討平李全。進工部尚書。沿江制置使。尋知襄陽府。北軍內叛。言者劾范落職。送建寧府居住。嘉熙初復官。卒于家。

絕句

半窗圖畫梅花月。一枕波濤松樹風。不是客愁眠不得。此山詩在此香中。
全芳備祖

趙葵

葵、字南仲。號信菴。范弟。少從父方軍中。補承務郎。以淮東提刑。平李全有功。進兵部侍郎。淳祐中。拜右丞相。兼樞密使。咸淳初。特授少師。武安軍節度使。封冀國公。薨。贈太傅。諡忠靖。有集。

劉後村跋。少保丞相魯國信菴趙公事兩朝。出將入相。四十餘年。發曠懷於翰墨。寓雄心于杯酒。其訂謨定命。則雅人之致。家庭唯諾。則萬石之訓。結交氣義。則河梁之作。望古慷慨。則梁父之吟。至于陶寫性情。賞好風月。雖玉壺香奩諸人。極力追琢者。

不能及也。

雪夜

酒力欺寒淺。心清睡較遲。梅花擎雪影。和月度疎籬。

雪

玉龍昨夜起天涯。曉看團花一尺圍。莫放妝臺簾卷上。怕驚釵畔寶鸞飛。以上後村千家詩。

避暑水亭作

水亭四面朱闌遶。蔌蔌游魚戲萍藻。六龍畏熱不敢行。海波煎徹蓬萊壘。身眠七尺白蝦鬚。頭枕一枚紅瑪瑙。公子猶嫌扇力微。行人多在紅塵道。

昨非菴日纂。趙葵嘗避暑水亭。作詩六句已成。葵遂睡去。有侍婢續二句云。

惠山寺

古木森森映碧苔。嵯峨樓閣倚天開。山僧不問朝天客。自注冰泉浸野梅。常州府志。

林興宗

興宗字景復。莆田人。官曲江守。

句

最是北來詩料少。地寒難得見梅花。形容變盡頭如雪。不改當時一寸心。

梅欄詩話。宋嘉定寶紹間。叛將李全。駐兵淮東之山陽。驕悍難制。戕許國。逐姚翀。殺命士荀夢玉杜耒。士大夫視山陽。不啻如蛇鄉。虎落時。莆人林興宗。景復。授法曹。以往時論壯之。安晚鄭公在瑣園餞行。有詩云。淮海轅門立奇士。要看左祖爲劉時。蓋

勉其盡節也。景復到任後。改淮安令。辛卯春。全破通泰。犯揚州。爲王師掩擊。殪城下。其妻楊姑姑懼朝廷必討。遂掃衆盡俘執。南官北去。景復羈囚山東。凡十年。挺節無所汙。安晚餞詩。可無負矣。信菴趙公遣問物色。損金資得之。以反縣國印與。告身俱存。趙公奏乞旌擢。以勸盡節者。朝廷錄用。官至曲江守。景復北地詩云。江湖閒多稱之。

葉夢鼎

夢鼎字鎮之。寧海人。嘉熙上舍。釋褐。淳祐中爲祕書郎。寶祐初。以集賢殿修撰。知贛州。咸淳閒。特拜右丞相。惡與賈似道同政。力辭。益王卽位。召爲少師。道梗不能赴。南向慟哭而還。卒于家。

瀛洲亭 在撫州西北。

汝城高處著危欄。人在蒼寒縹緲閒。下瞰無邊春境界。西來第一好江山。酒拈重碧酣詩思。柳曳輕黃入

笑顏閣老可能專此勝。蛾眉花底又催班。撫州府志。

許棐

棐字忱夫。號梅屋。海鹽人。嘉熙中隱居秦溪。于水南種梅數十樹。自號梅屋。有梅屋詩藁。融春小綴。

許梅屋嘗自序其藏書目云。予性喜書。舊積書千餘卷。今不啻倍之。人有奇編。見無不錄。以故環室皆書。今卽老而貧乎。而人不鄙夷予之貧。鬼不挪揄予之貧。皆書賜也。

訪潘叔明

一室寬于養鶴籠。荻簾疎透雪花風。怪來几案無寒色。春在題詩卷子中。

明妃

漢家眉斧息邊塵。功壓貔貅百萬人。好把香閨舊脂粉。豔妝顏色上麒麟。

元夕後湖上作

自從樓閣罷燒燈。未有今朝一日晴。暖拆葑邊冰翼破。寒畱山頂雪痕輕。驕驄已印尋芳跡。小妓新翻鬪唱聲。每箇旗亭商一醉。也應排日到清明。

枯荷

萬柄綠荷衰颯盡。雨中無可蓋眠鷗。當時乍疊青錢滿。肯信池塘有暮秋。

泥孩兒

牧瀆一塊泥，裝塑恣華侈。所恨肌體微，金珠載不起。雙罩紅紗廚，嬌立瓶花底。少婦初嘗酸，一玩一心喜。潛乞大士靈，生子願如爾。豈知貧家兒，呱呱瘦于鬼。棄臥橋巷間，誰或顧生死。人賤不如泥，三歎而已矣。
以上梅屋詩藥。

筍蕨羹

趁得山家筍蕨春，借廚烹煮自炊薪。倩誰分我杯羹去，寄與中朝食肉人。
山家清供。

黃簡

簡，一名居簡，字元易，號東浦，建安人。寓吳。工詩。嘉熙中卒。通判翁逢龍葬之虎丘。有東浦集。雲墅談雋。

犁春操爲謝耕道作

東山兮雲浮，東湖兮雨流。失今不勤兮，曷其有秋。水滌兮石齧，田礪礪兮一畦九折。予勞兮何辭，牛奚罪兮從子以羸。眇良疇兮彌野，獨功倍兮刈寡。雖然不愈于無田，而遊兮歲晏，淒其桑落之下。

招荆江蕩子

衝風逐飛雲，庭葉紛墮槁。蕩子久不歸，佳人坐中老。蕭蕭楚山晚，湛湛江水流。經從望夫石，那得不回頭。
以上前賢小集拾遺。

柴望

望，字仲山，號秋堂，衢州江山人。嘉熙間爲太學上舍，除中書。奏名。淳祐六年丙午元日日食，詔求

直言上丙丁龜鑑。忤時相意。詔下府獄。趙節齋疏救。得放歸田里。因又號歸田。景炎二年。端宗登極。三山孔大諫奏薦。特授迪功郎。史館國史編校。辭歸山中。宋亡後。稱宋逋臣。有道州台衣集詠史集。

困學紀聞。淳祐丙午。衢士柴望上丙丁龜鑑。其表云。今來古往。治日少而亂日多。主聖臣賢。前車覆而後車誠。

月夜溪莊訪舊

山山明月露。何處認梅花。石室冷疑水。溪流白是沙。清吟幽客夢。華髮故人家。相見即歸去。已應河漢斜。

天地閒集

靈芝寺別祖席諸友

落日寒城暮雨餘。滿斟離酒意何如。見妻還指張儀舌。痛國誰憐賈誼書。羸馬病童旋雇倩。寺禽山獠亦歔歔。長安可是深居處。更向深山深處居。

鶚按淳祐六年。秋堂以上丙丁龜鑑下獄。趙京尹節齋疏救之。放歸田里。設祖道。涌金門外者。爲三山鄭震。紹武吳陵。建安葉元素。松溪朱繼芳。錢唐翁孟寅。田井。陳麟。黃漆。南康馮去辨。西江趙崇嶠。會原一。吁江黃載。汶陽周弼。時晚色涵岫。商飈振林。

各賦詩爲別。見蘇幼安所撰墓誌中。靈芝寺正在涌金門外。

和王景陽越中寄別韻

王名億之。號松閔。

故人書祇問平安。分已還山豈願官。猿鶴不驚松徑夢。貂蟬難換竹皮冠。長安落葉秋深見。故國斜陽雨後看。莫道剡中吟不盡。不成吟處亦停鞍。

送宋南山開蜀闢

殿上傳宣內引官。一封歷歷奏忠肝。八千里路先聲至。百萬都人夾道觀。節度晉公先授鉞。淮陰韓信舊登壇。擎天正要中流柱。莫擬人閒蜀道難。

和通判弟隨亨書感韻

風沙萬里夢堪驚。地老天荒祇此情。世上但知王蠋義。人閒唯有伯夷清。堂前舊燕歸何處。花外啼鶯月幾更。莫話淒涼當日事。劒歌淚盡血霑纓。

沛中歌

秦時日月漢山河。家計今誰與仲多。天子不知天下貴。酒中唯唱沛中歌。以上柴氏四隱集。

戴昺

昺字景屏。號東野。石屏之從孫。嘉熙己亥授贛州法曹參軍。有東野農歌集。

秋日過屏山菴

淒切抱葉蟬。閒關棲樹禽。入山本避喧。復愛聆此音。微颺動夕爽。薄雲散秋陰。衆籟闐以靜。片月生東林。

有感

著身平地更多憂。一棹思爲泛宅謀。昨夜西風邊報急。防江也要釣魚舟。以上農歌集。

高子鳳

子鳳字儀甫華亭人嘗注杜詩林竹溪爲序

題楊補之墨梅卷

離根玉瘦兩三枝爲繞吟香夜不歸安得密林千畝月仰眠吹笛看花飛

松風餘韻

宋詩紀事卷六十六

錢唐 厲鶚 緝

平湖 馮銜三 勘定

徐儼夫

儼夫字公望平陽人淳祐元年進士第一官至禮部侍郎

直鉤和韻

一曲湖邊一釣磯桃花風定柳綿飛漁人豈識濠梁趣祗解沙頭盡醉歸東甌詩集

王應麟

應麟字伯厚其先汴人後居鄞淳祐元年進士寶祐四年中博學宏詞科度宗時官禮部尚書兼給事中入元始卒有深寧集

唐開成年墓誌石

元至元二十七年城中握蘭橋旁民家築室穿土得誌石一片其文乃唐開成四年太原王夫人之墓誌謂其曾祖王元涪在元宗時拜諫議大夫左庶子慕巢由之志辭疾不就前宋尚書王應麟爲詩以紀其事

鴻濛肇開關變嬪幾成毀寥寥斷竹歌瓦墜剏姚姒周墳典以族詎認青烏子公琴記咎繇邢山稱重里

葛清失之矯。璠瓊過于侈。焉知宮夾墓。莫識龜言水。銅槃字十六。銘自比干始。延陵有孔子。烏虜半辭止。漢甄猶簡僕。石章侈華靡。無媿惟有道。媚俗多虛美。七松談士良。何以懲不軌。載筆鮮南董。襲浮謬臧否。豈悟家中人。三百年不死。婦名弗出閭。古未有碑誄。謚見春秋初。誌起典午氏。簪蒿隱士妻。芳刻垂千祀。楊高託不朽。習之文中理。或犯葵丘禁。息國事何恥。蛾眉爲黃土。磨滅更誰紀。宰如比何人。雒邑之士女。逸民儒仲裔。冰雪濯紈綺。采儷古鄆州。儉勤終暮齒。問幾年。頗與銅人似。雖微黃絹辭。亦質而不俚。丘夷池又平。蓬顆今塵市。聚廬寒劫灰。餘光輝泥滓。或行松柏下。勢榮朝菌爾。降碣牛礪角。翁仲臥荆杞。蘭艾均一塵。玉珉同一燬。孤竹夢茫然。柳下壘孰是。片石幸有傳。詩以貽彤史。王尙書遺棄。

澤民廟唐大歷開明州刺史吳謙築九里堰民德而祀之。

城西有祠臨水。涘翠松列植。路如砥。問之耆老。此爲誰。唐大歷中吳刺史。刺史爲民開陂湖。故蹟猶傳。堰九里。年年簫鼓報豐穰。決渠爲雨潤澤美。遺愛有橋名懷恩。姓名不載太史氏。昔漢吳公治第一。列傳寂寂。名無紀。刺史豈其苗裔歟。明州政亦河南比。堂上大書荆公詩。蘭菊春秋百世祀。地誌祇稱王長官。有功于民。蓋一揆。吾聞是邦多賢守。裴王碑字顏與李。惟侯盛德著人心。彼石可焚祠弗圮。廣德湖爲鴻隙。陂召棠。變社誰敢毀。杭稌充羨侯之賜。廟食長存如此水。延祐四明志。

錢端琮

端琮淳安人。淳祐元年進士。

暮春

園林深處綠成堆。更著松陰一徑苔。煙欲過牆風約轉。水將爭港石衝回。斷雲收雨鳩呼婦。嫩麥盈隄雉應媒。獨有殘紅春不管。等閒飛入酒卮來。四朝詩。

馮去非

去非字可遷。號深居。南康都昌人。椅子。淳祐元年進士。幹辦淮東轉運司。寶祐四年召爲宗學諭。

江上

清秋不可柰。先自嬾登樓。一雁叫寒水。數峯生遠愁。乾坤消劍氣。江海笑詩流。不解人閒事。眠鷗儘自由。

所思

雁自飛飛水自流。西風不寄小銀鈎。斜陽何處橫孤簾。十二闌干一樣愁。以上詩家鼎鑪。

金陵鳳凰臺

許大乾坤裏。那無一鳳鳴。臺敲紅日晚。梧拂翠雲生。瑣瑣六朝夢。悠悠千古情。寒潮如有恨。時打石頭城。景定建康志。

偶成

春風吹送笑談香。玉漏銀燈破夜涼。歸去東華聽宮漏。杏花落盡六更長。

愚見紀忘云。宋時內樓五更絕。柝鼓交作。謂之蝦蟇更。禁門方開。百官隨入。所謂六更也。馮去非詩云。

句

茶疎緣睡少，全芳備祖。

曾 欲

欲字宏父。

題鳳山書院

暮春浴罷振春衣，正是流觴修禊時。世事藏機應落落，人情忘我總熙熙。醉能辭醉原非醉，詩到無詩乃是詩。偉矣蘭亭衆君子，不將文字立藩籬。

禊帖綜聞：宏父跋云：宏父扞鳳山書院于廬陵，去郡城遠不二三里，深得林泉之勝。雖夏旱冬澗，滂流自如。稍東卽泉所發源，地鑿石引水以爲池，號流杯池，置亭其上。友人維揚倅朱行父，閒拉十數親友，輒蹈前躅，因刊禊圖并考訂，所以親爲小詩贊于後。時淳祐改元歲次辛丑，斗柄插亥，上澣甲子日也。

董 史

史字良史，號閑中老叟，有皇宋書錄三卷，淳祐壬寅自序。

題米元章書蹟拓本

書家寶晉殆猶龍，妙用通神五指中。墨海波瀾無定勢，元雲天矯欲隨空。格高韻勝存人品，腳闊頭空笑俗工。建紹聖人精鑒賞，奪真移在玉屏風。

皇宋書錄高宗製集米芾墨跡爲十卷元章劇跡咸萃焉史家藏拓本嘗妄贊其後

俞文豹

文豹字文蔚括蒼人著吹劍錄淳祐三年自序

徐進齋得古銅香爐具象鼻眼博古圖謂之象鼻屬余賦之雖不足言詩聊記曾見

在象數前鍾鼻眼出囂塵外鑄形模傳香到手親曾見全勝人看博古圖

願得身遊海外天蓬萊頂上覓沈箋爲君喚起槐安夢細讀南華內外篇

自注泉州守王庭珪香譜云箋次于沈

出占城國吹劍錄

王平子

平子吳郡人尤工小詞

題雪獵圖

烽火一息三千年漢家將軍畫凌煙胡兒不識征戰事龍沙萬頃今桑田麗譙聲裏梅花月雲暗雪深風色惡長嘶一騎驄蟬聯狼帽氈裘寒矍鑠鞬鷹走犬登平岡狂狐剔眼夢飛揚貫鵬落雁真戲劇高鳥略盡良弓藏鳳鳴居士口雙碧少年讀書勇無敵但知橫行翰墨場豈料一禽終不獲向來百非今已無筆端有口聊自娛故將胸中磊落事寫作人閒雪獵圖

吹劍錄

盧鉞

鉞字威仲永福人淳祐四年進士官太學博士咸淳中以顯謨閣學士知隆興府官至侍郎

吳興舟中

笠澤高風寒凜凜。蒼溪凝雪白皚皚。扁舟我獨乘歸興。自是不因安道來。後村千家詩

和太師平章魏國賈公大雪遺潛侍郎之作

底用封書禱梵林。瑞霏先臘感由心。豫知農畝宜禾稼。復喜邊儲足輦任。民樂齊宮誇往昔。捷歌周戍屬斯今。變調妙造推元老。治象陽明無伏陰。咸淳臨安志

陳合

合字維善長樂人淳祐四年進士官知樞密院終資政殿學士諡文惠

題陳經國龜峯詞後

西晉風流自一家。憶君魂夢到梅花。梅花深處無人跡。明月一枝霜外斜。龜峯詞有所齋諸兄爲之跋安用復著贊語漫書癸卯冬所作懷舊一絕繫于後陳合雜善龜峯詞

汪立信

立信字誠甫號紫源先世新安人自浮梁徙六安淳祐七年進士歷官端明殿學士江淮招討使元兵至建康扼吭死之贈少傅

金陵懷古

勝地尙存龍虎氣。荒臺已失鳳凰蹤。六朝文物山川古。霸氣終歸指顧中。新安文獻志

葉隆禮

隆禮號漁林嘉興人淳祐七年進士官建康府西廳通判改國子監簿

烟雨樓和朱南杰韻

榜家亭館占湖東寂寞爲鄰抵陸公竹樹一隄如有礙乾坤萬象自無窮
擢歌遠入秋波綠塔影中分晚照紅尊酒待遊烟雨候畫圖著我笠蓑翁至元嘉禾志

馬廷鸞

廷鸞字翔仲號碧梧饒州樂平人淳祐七年進士度宗朝歷官參知政事兼同知樞密院事拜右丞相以觀文殿大學士提舉洞霄宮瀛國公即位召不至自罷相歸又十七年卒

贈程楚翁

汗竹丹鉛側空花粉黛中尙懷丞相亮肯署大夫雄有客來今雨誇予邁古風幽情傾不竭渺渺碧雲東
新安文獻志

程瑞

瑞字希鳳號梧桐饒州人幼與同郡馬廷鸞相友隱居自娛馬登政府未嘗以仕進干之

詠梅

清淺溪橋水高低籬外枝這些風骨異瘦盡古今詩中洲野錄

陳鑒之

鑒之字剛父。閩縣人。淳祐七年進士。有東齋小集。

過吳江

垂虹四年別。淼淼來夢境。今晨整芒屨。柳風吹鬢影。春光徹重淵。蛟困綠波靜。遠帆有無處。小立爲徐領。浩歌翁自得。白髮亂垂頸。一室世誰知。三萬六千頃。平生卜鄰意。此際味差永。翁肯平分歟。吾其辦漁艇。

晚登京口倅廳富覽

窮途逢偉觀。小閣江萬里。薄暮岸幅巾。寒烟四山起。天河注平淮。斗柄臥蘆葦。欲返還少畱。燈青客船尾。

京口江閣和友人韻

良辰仍我輩。斗酒大江邊。小閣納萬里。一帆來九天。世塵黃鵠外。詩興白鷗前。地勝吾衰矣。長懷李謫仙。

題鄭承事所作蕙蘭

蘭如君子蕙如士。此評吾得之涪翁。有餘不足姑勿論。畢竟清幽氣類同。

有感

霖雨何人記子桑。朱門車馬漲塵黃。百年友誼須英概。畫虎何妨效季良。

同劉叔泰放步湖邊。入靈芝寺。坐依光良久。叔泰誦坡仙好把西湖比西子之句。予因賦古風一首。

劉郎喚我出勝處。意所便。清寒柳桃風。濃淡杉檜煙。僧廬自生香。步遶古佛前。依光偶不局。坐數禽聯翩。

平林度清磬。遙隄蒨歸船。湖山露真態。鷗點溶溶天。形容幾吟筆。剛道妝抹妍。莫作西子看。正如姑射仙。

相知喜值予。微笑生清漣。

探梅

驢蹇颯寒獵帽幫。吟肩山聳酒微醺。彎彎竹徑霏霏雪。小小溪橋淡淡雲。忽邂逅時真得侶。向空濛處細飄芬。回天力量知誰似。笑挽春來首策勳。

與客夜飲蠟燭有花。客請賦之。

圓蒲促坐話情真。蠟炬能花似有神。畢竟蜂鬚膏馥在。酒邊依舊十分春。

同潘孔時飲總宜園。孔時出寶晉數帖。呼道人吹簫。次日有詩。予用韻答之。

六橋秋新宜醉吟。舉杯共聽巖鶴音。危亭三面立老竹。寶晉數帖清人心。涼蟬不敢喧夕曛。洞簫聲遶山腰雲。搖搖歸艇水紋裂。山紫天青河漢白。想君獨立對空闊。一鷺毛寒藕花月。

題村學圃

田父龍鍾雪色髯。送兒來學尙腰鎌。先生莫厭村醪薄。醴酒雖醲有楚鉗。以上東齋小集。

湯漢

漢字伯紀。安仁人。江東提刑趙汝騰薦于朝。免解差。充象山書院堂長。赴禮部別院試。正奏名。授上饒簿。淳祐中。差充史館校勘。度宗朝。仕至刑部侍郎。權工部尙書。提舉玉隆宮。以端明殿學士致仕卒。諡文清。有集。

寄劉後村

唐朝空自貴宏詞。科目何嘗得退之。掌制徒聞誇子厚。殘篇僅見命敦詩。堪嗟實錄無完傳。太息淮西有

後碑寄語莆田紫薇老。文章蓋世例如斯。後村詩話。

自儆六言

春秋責備賢者。造物計校好人。一點莫畱餘滓。十分成就全身。困學紀聞。

黃 磬

磬字子耕。分寧人。山谷諸孫。從朱文公學。登淳祐進士。累遷軍器監丞。勾外。知台州。終袁州守。有復齋漫稿。

葉水心墓誌云。子耕詩調。如徑幽薄。超高丘。宇宙寄曠風。露綽約。人謂非子耕所能。磬直遺墨。散落收拾未盡爾。

題桃源 台州郡圃。

本自深村老圃來。偶分符竹到天台。漫山幸可容桃李。莫待劉郎去後栽。赤城志。

常 楸

楸字長孺。海鹽人。淳祐中進士。度宗朝。累官浙東安撫使。德祐初。拜參知政事。宋亡。里居卒。

題平江集仙宮

松菊新來入夢頻。公餘乘興得尋真。紅塵物外常清境。白日壺中不老春。柏子灰寒烟寂寂。桃花風煖水粼粼。逍遙羽士閑如許。媿我浮名役此身。海鹽縣圖經。

劉克莊

克莊字潛夫號後村莆田人以蔭仕淳祐中賜同進士出身官龍圖閣直學士卒諡文定有後村集

題孺子亭

孺子亭前插酒旗遊人那解薦江籬白鷗欲下還飛起曾見當年解榻時

題忠勇廟

士各全軀命惟侯視死輕張巡鬚盡怒先軫面如生短刃猶梟寇空卷尙背城新祠簫鼓盛人敬此神明

隨隱漫錄紹定庚寅春汀寇入譙趙守竄殿司裨將胡斌領弱卒二百巷戰矢盡刀折易雙鐵鞭所殺尤衆死焉坐執雙鞭屢日不偃民賴其力多獲鼠兔守臣王堃聞于朝贈武節大夫贈廟額忠勇

秋風

黃葉蕭蕭忽滿街獨騎瘦馬豫章臺莫將宋玉心中事吹上潘郎鬢畔來

周漢國公主挽詞

孝謹親顏悅溫恭婦德修鵲橋方紀節鸞扇忽驚秋魯筆王姬卒湘弦帝子愁願言寬聖抱況返藁宮遊賜館恩通內妃瑩詔卜鄰來應自仙佛去尙戀君親望送龍綃溼封崇鶴表新不能乘彤管羞媿作詞臣

庶齋老學叢談理宗聖學高明尤工于文周漢國

公主薨誌銘詔楊平齋撰挽詩以劉後村爲第一

落梅

一片能教一斷腸。可堪平砌更堆牆。飄如遷客來過嶺。墜似騷人去赴湘。亂點莓苔多莫數。偶黏衣袖久猶香。東風謬掌花權柄。卻忌孤高不主張。

病後訪梅

夢得因桃卻左遷。長源爲柳忤當權。幸然不識桃并柳。也被梅花累十年。以上後村集。

瀛奎律髓寶慶初史彌遠廢立之際錢唐書肆陳起宗之能詩凡江湖詩人皆與之善宗之刊江湖集以售劉潛夫南岳稟與焉宗之詩有云秋雨梧桐皇子府春風楊柳相公橋哀濟邸而謂彌遠本改劉屏山句也或嫁爲放牖菴器之所作言者併潛夫梅詩論列劈江湖集板二人皆坐罪初彌遠議下大理逮治鄭丞相清之在瓊闌白彌遠中輟而宗之坐流配于是詔禁士大夫作詩如孫花翁李蕃之徒改業爲長短句紹定癸巳彌遠死詩禁始開潛夫爲病後訪梅絕句云云此可備梅花大公案也。

齊人少翁招魂歌

夜月抱秋衾。支枕玉鸞小。豔骨泣紅蕪。茂陵三十老。臥聞秦王女兒吹鳳簫。淚入星河翻鵲橋。素娥剗轆跨玉兔。回望桂宮一點霧。粉紅小蝶沒柳烟。白茅老仙方瞳圓。尋愁不見入香髓。露花點衣碧成水。

東阿王紀夢行

月青露紫翠衾白。相思一夜貫地脈。帝遣織阿控綵鸞。崑崙低小海如席。曲房小幄雙杏坡。玉鼻吐麝熏錦窠。輦香蕙雨幫袂溼。紫雲三尺生紅鞵。金蟾吞漏不入咽。柔情一點薔薇血。海山重結千年期。碧桃小核生孫枝。陳王此恨屏山知。

趙昭儀春浴行

花奴一雙鬢垂耳。綠繩夜汲露桃菜。青桂寒煙溼不飛。玉龍呵暖紅薇水。翠鞵踏雲雲帖妥。燕釵微卸香絲鬢。小蓮夾擁眞天人。紅梅犯雪敲一朵。鸞錦屏風畫水月。鳩鵲抱頸啜蘭葉。劉郎散卻金餅歸。笑引香綃護癡蜨。以上詩入玉屑。

句

判花人競誦。詩草士深藏。贈洪使君 藝林伐山。

劉克遜

克遜字無競。號西墅。後村之弟。仕爲古田令。

送楊帥

累詔登華省。當時已避蹤。身閑名轉重。道大世難容。南國因鋤蕪。東山得倚筇。何當投劾去。短褐許相從。
詩林萬選

劉黻

黻字聲伯。號質翁。樂清人。淳祐中試入太學。由學官試館職。度宗朝累官吏部尙書。端明殿學士。擁二王入海。及羅浮卒。諡忠肅。有蒙川集。

大龍湫

總是佳山水。龍居又不同。神明專一壑。氣勢壓羣雄。派想從天落。湫疑與海通。矩那看不厭。冥坐雨聲中。

寶界寺在南安軍張無垢讀書于此雙趺隱然

城中惟一寺僧老雪盈頭曾識神仙到仍多諫議游鐘聞香火夕碑隱桂杉秋可惜高堂上雙趺石不甞

題江湖偉觀

柳殘荷老客淒涼獨對西風立上方萬井人烟環魏闕千年王氣到錢塘湖澄古塔明寒嶼江遠歸舟動夕陽北望中原在何所半生盈得鬢毛霜以上蒙川集

方岳

岳字元善寧海人有深雪偶談

感舊并序

淳祐初僧友自南嘗從天竺歸隱溪之南岡余冬夕踏落葉訪之小厖迎吠時佛燈猶在啟關煮茗既而侶行溪閒篙小舟自拜龍巖順流東下誦坡谷詩徘徊久之舍舟登岸借僧裘禦寒而返僂指二十霜矣

昔年訪月寒溪頭霜高酒劣棧生裘溪僧輟寢從吾幽共移不繫漁父舟斷崖老木紛金蚪又如蘋藻涵清流鶴骨浸煩風露憂妙語滿地無人收深雪偶談

鷺

聳兩吟肩似我愁菰蒲葉下一身秋溪風昨夜吹魚落飛過前灘看水流陳郁話腹

方逢辰

逢辰字君錫，淳安人。淳祐十年進士第一。初名夢魁，理宗御筆改今名。累官兵部侍郎，國史修撰，兼侍讀。宋亡，元世祖詔起之，辭不赴。卒于家。有蛟峯集。

被徵不赴

萬里皇華遣使軼，姓名曾覆御前甌。燕臺禮重金爲屋，嚴瀨風高玉作鉤。丹鳳喜從天外落，白駒須向谷中求。敲門不醒希夷睡，休怪山雲著意留。

贈樵隱

樵仙深入琴碁境，一笑出門天地寬。人世已非存朽斧，土音不改只南冠。弦中自有冰心在，局外何妨道眼觀。霽月光風元屬我，飯牛何謂夜漫漫。以上蛟峯集。

袁立儒

立儒號溪翁，建安人。淳祐中提點兩浙刑獄，除侍右郎官。

題駙馬都尉王晉卿所作夢游瀛山圖

珍木文禽玉佩環，清都絳闕色琅玕。香山居士蓬萊院，借與王郎夢裏看。清河書畫舫。

楊伯巖

伯巖字彥瞻，號泳齋。楊和王諸孫。淳祐間除工部郎，守衢州。錢唐薛尚功之外孫，弁陽周公謹之外舅也。著有六帖補、九經補韻，行于世。

遊九鎖

曉山雲樹碧生秋。乘興閑爲洞府游。片石卻將仙路隔。負人平昔慕浮丘。
亭前絕壁下飛瀑。天風夜半吹韶咸。疑是銀河天上水。壯士挽落千丈巖。洞霄詩集

徐偃王廟

當年大德瑞朱弓。仁在斯民千古同。故國已無徐子土。靈祠今有梵王宮。水流簷影晴江上。山接鐘聲暮
鷲中。攬轡此行因致敬。蒲團分坐聽談空。衢州府志

施清臣

清臣、號東洲。淳祐閒人。

牽牛花

一泓天水染朱衣。生怕紅埃透日飛。急整離離蒼玉佩。曉雲光裏渡河歸。詩林萬選

王同祖

同祖、字與之。號花洲。金華人。淳祐中建康府通判。次改添差沿江制置司機宜文字。有學詩初集。

太乙宮卽事二首

金殿重重畫不開。盤窠蒼柏兩行栽。角門東畔瞻宸几。仙仗曾迎翠輦來。
綠陰密處著危亭。佳氣蔥蔥王武林。一片紅塵飛不入。杜鵑啼處白雲深。自注山後有亭乃武林山。

夜步內門

靜夜孤燈人未眠。等閑行過內門前。一聲唱徹連珠啞。皇城夜閒唱連珠啞碧月朱闌綠柳邊。

春日雜興

迢迢清夜靜無譁。月色千門噪亂鴉。吳山月明則鴉羣噪。坐久忽驚寒力重。不知殘雪在梅花。

天津橋橋在金陵行宮前。昔人謂山如洛邑。水如瀟澗。因以名之。

行闕千重鎖暮烟。山如洛邑水如瀟。黃塵障斷中原路。悲立橋頭聽杜鵑。

冬日金陵制幕書事五首

督制堂堂兩重臣。駐師移府夾江濱。資糧屢屢多多辦。更有舟車乞與鄰。自注。時督制兩關。移屯江岸。應援淮城。

東關亦自維揚提兵會合軍需等物。多本司貸之。

官軍聞說定廬州。破虜功成一滴油。自注。一滴油。警名。智勇功名付元凱。王三錫命到康侯。自注。此詩爲合肥作。

金人以重兵三十萬圍城者四十餘日。制帥杜公于援兵未至前。不動聲色而破之。父子俱奏雋功。受上賞。

城中守將方投死。陣面將軍已賣降。版築紛紛成底事。那知靠後是長江。自注。此詩爲滁州作。金人圍滁城凡兩

月。守臣陳廣竭力挫之。已有退志。會援師築城于江壩。未進。廣以中傷死。有內變。金人遂入而城亡矣。

薄晚官軍得勝歸。家家戶戶挂旌旗。陣前紀律明于日。師入城來半不知。自注。爲往來過軍作。

三五同寮出幕遲。公餘終日意遲遲。歸來又被梅花惱。撥冗銅彝插數枝。以上學詩初集。

陳允平

允平字衡仲。一字君衡。四明人。號西麓。有西麓詩藁。

香奩體

小院薰風滿。閑庭白晝長。蜻蜓楊柳岸。鶻鶻菱荷塘。雲合朱簷卸。山高翠閣涼。蔓滋青薛荔。芽長紫良薑。簾幙深深地。闌干曲曲廊。淡烟瑤草細。流水碧桃香。幡影重門靜。苔痕小篆荒。螭盤丹鼎雪。龍吸露臺漿。琴古翻新調。笙沈艷舊簧。雨聲犀角枕。月色象牙牀。掌上雙鸚鵡。屏間兩鳳皇。石函藏寶劍。金鑰啟瑤箱。扇雉團清影。匳鴛試曉妝。霞綃衣窄索。雲錦佩玎璫。鬢攏金蟬蟲。釵橫玉燕翔。袂飄天水碧。幫濺鬱金黃。太液簫初遠。蓬壺漏未央。流星飛碧落。零雨下銀潢。去去人千里。迢迢天一方。斷腸春洛浦。殘夢夜瀟湘。

題胡月山吟屋

蘇公隄上路。日日課新吟。流水行花影。斜陽臥柳陰。斷橋春聽樂。矮屋夜鳴琴。皎皎山門月。如君一片心。

吳江道上

夜半扁舟出洞庭。客帆初挂早潮平。社風纔過海鷹至。嵐霧未收江鷓鳴。吳岫亂雲擎古塔。楚臯寒葉擁荒城。垂虹橋外連天水。無限別離生杜蘅。

后土廟

塵擁妝臺翡翠翹。瓊花開盡玉魂銷。崑崙山上天風落。二十四橋吹洞簫。

江南謠

柳絮飛時話別離。梅花開後待郎歸。梅花開後無消息。更待明年柳絮飛。

秋夜遊東墅

雲壓高空雁陣低。江城歷歷草離離。樓臺秋淡玉簫遠。簾幙夜寒銅漏遲。明月鸞鸞菱葉浦。西風蟋蟀豆

花籬一尊酒盡銀河落。猶有殘鐘出古祠。

閨情

閑拈花片貼紗窗。繡幙斜飛燕子雙。細數歸期相次近。倚樓日日望春江。

吳山雪霽

九天宮闕春風滿。陸地樓臺夜月寒。鐵笛一聲吹雁落。片雲不到玉闌干。

馬塍道上

閑拖瘦竹筇。獨步馬塍東。鳥影青山外。春愁碧樹中。麥潮風化蝶。櫻熟雨生蟲。莫過溪頭去。溪頭多落紅。

小樓

寒空漠漠起愁雲。玉笛吹殘正斷魂。寂寞小樓簾半卷。雁烟蜚雨又黃昏。

登西樓懷湯損之

楊柳飄飄春思長。綠楊流水遶宮牆。碧雲望斷空回首。一半闌干無夕陽。以上西麓詩集。

句

石屋雨來春樹暗。海門潮起暮雲高。

方虛谷桐江集云。予淳祐中偶至靈隱冷泉。時京尹盡去。楹

間詩板僅存者二。其一云。此四明陳允平詩。蓋許渾體也。

鄭霖

霖字景說天台人淳祐中知平江府。

淳祐己酉月正人日春雨堂宴三學同舍卽事。

十年隨牒訪三高。不覺星星上鬢毛。尙憶齋鹽形夜夢。聊因椒柏薦春醪。文明再會知何日。臭味相投屬我曹。總是虞庠舊培植。致君當不媿夔臯。吳郡志附

王學可

學可字亞夫襄陽人。參知政事之望。孫淳祐開臨安府倅。

洞霄宮

天柱峯高萬壑分。故畱九鎖限塵氛。泉飛窗牖長爲雨。日上岡巒半是雲。洞壁陰崖通遠岫。石生暗暈作奇紋。聖朝每爲民祈福。絕笑求仙漢代君。洞霄詩集

石橋

天巧何年路。千峯亂入雲。瀑飛雙澗合。崖斷一橋分。樹色春猶凍。猿聲夜或聞。靈蹤如可見。煮茗共爐熏。天台山志

題蘇端明書乳泉賦後

蘇公早聞道。文章乃其戲。乳泉出重海。作賦聊記異。玉池曠中夜。挈瓶非小智。氣者水之生。此語可深味。式古堂書考

李彭老

彭老，字商隱，號箕房，淳祐中，沿江制置司屬官。

元夕

斜陽盡處蕩輕烟，輦路東風入管弦。五夜好春隨步暖，一年明月打頭圓。香塵掠粉翻羅帶，蜜炬籠綃鬪玉鈿。人影漸稀花露冷，踏歌聲徹曉雲邊。武林舊事。

弔賈秋壑故居

瑤房錦樹曲相通，能幾番春事已空。惆悵舊時吹笛處，隔窗風雨剝青紅。

齊東野語：景定三年正月，詔以魏國公賈似道有再造功，命有司建第宅家廟，賈固辭，遂以集芳園及緡錢百萬賜之。園故思陵舊物，古木壽藤，多南渡以前所植者，積翠四抱，仰不見日，架廊疊磴，幽渺透迤，極其營度之巧，猶以爲未也。則隧地通道，抗以石梁，傍透湖濱，架百餘楹，飛樓層臺，涼堂燠館，華麗精妙，前揖孤山，後據葛嶺，兩山映帶，一水橫陳，各隨地勢以構，架焉堂榭，之有名曰蟠翠（古松）、雪香（古梅）、翠巖（奇石）、倚繡（雜花）、挹露（海棠）、玉藥（瓊花茶蘗）、清勝（假山）已上集芳園物。高宗扁西湖一曲奇勛（理宗御書）秋壑遂初客堂（度宗御書）初陽精舍山之坳曰無邊風月見天地心，水之濱曰琳瑯步歸舟（早船）通名之曰後樂園，又以爲未足，則于第之左數百步，瞰湖作別墅，曰光澤閣，春雨觀養樂堂，嘉生堂（千頭木奴）生意瀟然，生物之府，通名之曰養樂園，又于西陵之外，樹竹千挺，架樓臨之，曰秋水觀，第一春梅塢，刻船亭，則通謂之水竹院落焉。近世以詩弔之者甚衆，李彭老一絕云：

程洙

洙，秘族弟，淳祐十年進士，景定初爲上元簿，德祐乙亥，建康守將以城降元，洙不屈死，有南窗橐

秋晚懷友

長亭一樽酒，猶記別時斟。碧草思前夢，黃花見此心。關河秋北望，天地日西沈。遙想山中桂，何人月下吟。
新安文獻志。

曾淵子

淵子，字廣微，南豐人。宰六世孫鈺之子。淳祐十年進士，累官右正言、監察御史、權戶部尚書。浙西制置使，拜同知樞密院事，罷。知雷州。端宗在岡州，自雷來覲，拜參知政事。廣西宣諭使，元兵至，走安南卒。

九日登翰苑臺

在筠州新昌縣。

翰苑臺邊拂舊題，歲華荏苒壯心違。看萸喜得親猶健，對菊猶慚令未歸。秋水一江鷗共瘦，雲山千里雁初飛。宦情有暇無風雨，把酒相酬此會稀。
瑞州府志。

客安南見進奉使回口占

安南莫道是天涯，歲歲人從薊北回。江北江南親故滿，三年不寄一書來。
四朝詩。

隙必復

必復，字无咎，閩人。淳祐十年進士，有山居存橐。

山居

接砌斜通徑，緣籬矮結牆。地卑蝸篆屋，山暖蜜分房。過雨林亭靜，落花春晝長。幽居差省事，猶有課詩忙。

客枕

客枕偏饒睡。春歸尙擁綿。屋深燈易暈。漏短夢難圓。棲鳥警涼夜。鬧蛙喧雨天。一聲柔櫓過。何處上溪船。

贈張嗣自號牧隱

乍見語相合。苦吟心更親。老于琴得趣。隱與牧爲鄰。一夜巖花雨。十年江樹春。所交半湖海。恨晚識斯人。

宿龍山精舍

偶貪禪宇靜。襍被到深林。夜榻僧同話。寒簷客自吟。窗明疑積雪。樹黑怪常陰。猶恨愬愬出。丁寧約重尋。

舟中效東坡用韻

底事京塵踏。輒紅又隨棹。過吳淞。人家半在桑柘住。春水忽迷蘆葦叢。赤蟹白魚。今稍稍。紅櫻紫筍已愬愬。船窗盡日看山色。多少好山供眼中。以上山居存藥

蕭立之

立之字斯立。寧都人。淳祐庚戌進士。知南城縣。歷南昌推官。辰州判。遭世亂。歸隱蕭田。有集。仲子士贇。爲李白詩分類補注。行于世。

桃源

桃源花發幾番春。聞說漁郎此問津。秦帝漫勞方士遣。神仙已是避秦人。全芳備祖

杜鵑

思歸言語苦悲辛。啼老江南綠樹春。莫倚巴西君故土。巴西風景近愁人。

秋日

野店聊爲一枕謀。五更歸夢入鄉愁。溪流清淺春鉏曉。籬落荒涼絡緯秋。以上梅磻詩話。

落梅

玉龍戰退鹿胎乾。好在晴沙野水看。舞翠夢回仙袂遠。射鵰人去露崖寒。連環骨冷香猶暖。如意痕輕補未完。誰在高樓吹笛處。輕衫當戶獨凭闌。小窗清紀。

陳杰

杰字壽夫。分寧人。淳祐十年進士。制置司屬官。有自堂存藁。

題梅壇毛慶甫雲悅樓

白衣蒼狗無猜物。翻手悲歡變古今。輸與道人長快活。看渠起滅不關心。梅仙事實。

王時彥

時彥蜀人。

題梅壇毛慶甫雲悅樓

一生活計一身閑。日與白雲相往還。五百年閒知此味。華山去後到梅山。梅仙事實。

朱渙

渙字行父。號約山。大理寺丞。守衡州。

題梅壇毛慶甫雲悅樓

和衣高臥白雲堆。門倩雲封不妄開。畱向山中自娛悅。莫教一片出山來。梅仙事實

姚勉

勉字述之。高安人。寶祐癸丑廷對第一。除校書郎。兼太子舍人。有雪坡集。

余評事惠龍團獸炭香瓔鼻寶。且許以百丈山楮衾而未至。

青禽銜雲落蓬壺。風簷快讀光眉鬚。百朋珍貺羅庭隅。一一皆可當清娛。建溪龍焙香雲腴。香瓔巧製來東吳。鬚鬢獸炭奇形模。辟斜天祿獅熊驅。王家烏種君家鼻。晴沙暖抱明月珠。雅意下照仙人癯。矮窗醉兀詩情孤。蒲團松拂燒紅爐。蝸廬積凍春潛驅。侍兒金珞香玉膚。月鑑煮雪煎春酥。窗前笑玩嬌黃雛。能言直可貢上都。其波及晉皆君餘。獨欠一幅橫雲鋪。王孫醉擁紅氍毹。楮生長揖非吾徒。藤牀紙帳恰此須。能供梅花清夢無。

新晴曉步

晴曉芳蹊潤。幽情得自怡。霧黏行草蜨。風舞冑花絲。竹靜聞鄰話。林虛度客碁。意行無伴侶。池上只鶯知。

放生池納涼晚歸

湖面輕煙起。前山漸不分。鐘聲連寺答。人語隔船聞。吟客衣生月。歸僧笠帶雲。及城門未掩。燈火已紛紛。

題西湖竹閣寺二首

入門纔見萬琅玕。便覺玲瓏日影寒。峯勢近環簷外立。湖光更好竹中看。煙霞古淡僧容瘦。風露清高鶴夢殘。已占兩亭涼坐足。再須登閣倚闌干。

千古清風白樂天。昔時曾此飽談禪。自從西閣無吟迹。唯有東坡嗣舊傳。來往祇應湖上寺。聽聞誤說海中仙。我來再拜祠堂下。笑摘巖花薦井泉。以上雪坡集。

時少章

少章字天彝。金華人。寶祐癸丑進士。官史館檢閱。

冬狩行

北庭十月百獸肥。夜植虎落朝打圍。倒榛伏棘一千里。疊鼓欲渡繩林西。西風吹塵黯如霧。賀蘭花驄踏風去。老鑿鉞交作兒啼。橫飛一矢貫兩麋。將軍十指撮矢笑。四合周陸皆絕叫。牛酒過山酺爾曹。今年拔城如拔毛。金華詩粹。

孫炳炎

炳炎字起晦。餘姚人。寶祐癸丑進士。權吏部郎。出知饒州。除軍器監。

題元寶弟姚山別業

別業倚嶙峋。幽居寓目新。閑花繁覆砌。靜燕語通人。野翠生窗晚。林香入戶春。願因張老祝。持以奉芳辰。四明山志。

林泳

泳字太淵。號弓寮。希逸長子。寶祐元年進士。出宰安溪。有集。

岳武穆王墓

天意只如此。將軍足可傷。忠無身報主。冤有竹封王。苔雨樓牆暗。花風廟路香。沈思百年事。揮淚灑斜陽。
武林舊事

郭 燠

燠、東陽人。

挽內子

山崑崙兮日西。望吾侶兮不歸。惆悵兮階前。物換兮人非。春去兮花殘。春歸兮芳菲。老不可以再壯。君胡爲而先馳。
石洞遺芳集

章雪崖

雪崖、平江人。問道于朱子。

偶作

掩關作夏計。長日獨清坐。戎葵競自花。安榴粲成朵。時芳詎容歇。幽賞無不可。微風忽吹來。諒亦深知我。
車若水脚氣集

宋詩紀事卷六十七

危昭德

錢唐厲鶚輯
歙汪大成勘定

昭德字子恭邵武軍人寶祐元年進士歷官起居舍人殿中侍御史權工部侍郎兼同修國史實錄院致仕有春山集

春晚

晴天楊柳絲千緒淡月梨花玉一庭又是東風去時節數聲啼鳥不堪聽後村千家詩

王翔龍

翔龍四明人寶祐元年進士

遊澤山在慈谿

獨俯空堂夜無人境自寬高風河影動斜月竹身寒湖海秋聲闊山林客夢安坐來更幾點北斗已闌干延祐四明志

樂雷發

雷發字聲遠春陵人寶祐元年特科第一有雪礮叢藁

寄姚雪篷使君

時姚貶衡州

湘鱗六六寄相思。疎柳新蟬想別時。今夜各聽三楚雁。秋風又老一年詩。梅花且補離騷闕。薏苡應爲史筆知。翦竹疑峯新製笛。待衝霜月訪桓伊。

寄許介之

惹得詩名徧九州。酒徒棊伴半公侯。離騷甘隱魚鱗屋。樂府多傳鳩鵲樓。醉葉幾窠藏菊徑。蠹荷三畝護漁舟。中原應有樓蘭國。空鎖吳鉤到白頭。

送丁少卿自桂帥移鎮西蜀

瓊海收兵玉帳閑。又移齋艦泝涪灣。三邊形勢全憑蜀。四路封疆半是山。魏將舊聞侵劍閣。漢兵今欲卷函關。時會有三京之役。細傾瑞露論西事。想在元戎指顧間。

舜祠送桂林友人

堯山分手舜山逢。呼酒旗亭兩鬢蓬。客思且須論契闊。詩交應不計窮通。兒曹富貴秋烟外。前輩風流落葉中。明日吟船又何處。渡江衣冷荻花風。

讀繫年錄紹興八年以後事

婁敬金繒滿去鞬。便看雷雨潤遐陬。諸賢自抗排雲議。宰相方深偃月謀。湘國乍聞悲鵬鳥。秣陵還聽唱符鳩。九原晏老今知否。搔首青編恨未休。

秋日村路

兒童籬落帶斜陽。豆莢薰芽社內香。一路稻花誰是主。紅蜻蜓伴綠螳螂。

題昭州田廷亮書臺後

少海無波鶴禁虛。滿朝閉口養曹蜍。白袍烏帽和寧外。卻有山人請建儲。以上雪磯叢藂

游紫霞洞歌

猗歟奇哉紫霞之洞。真天開。千變萬化不可述。恍如幻出方壺與蓬萊。湘妃兩妹不敢到。悵望蒼梧雲縹緲。邇來三千三百年。班龍空臥金花草。我採姪女江華濱。是爲三十六帝之外臣。右提綠玉杖。左攜紫金經。長歌天上謠。一呼開仙扃。列炬照深窈。懸身事幽討。羣仙喜我來。驚笑欲絕倒。何侯撫我項。偉遠拍我肩。綠華贈我金條脫。安期分我虹景丹。借問此何地。指言太虛天。翠霞紫雲張寶幄。懸黎結綠盤瓊瑤。萬疊蒼苔荒石田。誰呼青龍耕紫烟。虎獄銅牆未徧識。擬開寶藏紅雲笈。嗟我水際披蓑翁。應是錢鏐釣神龍。仙人仙人何多事。驚眩世俗變靈異。或跌巨足垂天雲。或叩短趾畱沙潯。或見姑射處子身。粉霞紅綬藕絲帶。或見普陀大士形。或簪楊柳垂寶瓔。或插鏤象管。或結火齊珍。或琢元圃玉。或布祇園金。洞中之深不知幾百里。但見縈紆曲折一里一澗水。人言有路通桂林。乘興欲尋日華君。吾聞洞中大小洞天三十六。帝遣列真分治局。上界官司應更多。定知此地應誰屬。猗歟奇哉紫霞之洞。真天開。我上會稽探禹穴。復浮滄海登天台。巖谷豈無奇。視此何塵埃。摩挲崖石題惡句。記我杖屨敲雲來。黃涪翁。元漫叟。目力一生空宇宙。澹巖陽華有何奇。枉費詩篇刻石竇。九巖山志

嚴椿齡

乙卯禱雨梅壇

大隱清名格帝關，真人新寵粲王言。
南昌補吏官雖小，北極通班道更尊。
諫疏不容強漢室，仙風聊復傲吳門。
我來物色朝元處，山遶星壇水遶村。
梅仙事實

王洧

洧號仙麓，閩人，曾爲浙帥參。

西湖十景

蘇隄春曉

孤山夜月趁疎鐘，畫舫參差柳岸風。
鶯夢乍醒人未起，金鴉飛上五雲東。

段橋殘雪

望湖亭外半青山，跨水修梁影亦寒。
待伴痕邊分草色，鶴驚凍玉啄闌干。

雷峯夕照

塔影初收日色昏，隔牆人語近甘園。
南山遊徧分歸路，半入錢塘半暗門。

麴院風荷

避暑人歸自冷泉，步頭雲錦晚涼天。
愛渠香陣隨人遠，行過高橋方買船。

平湖秋月

萬頃寒光一席鋪，冰輪行處片雲無。
鷺峯遙度西風冷，桂子紛紛點玉壺。

柳浪聞鶯

如簧巧囀最高枝。苑樹青搖萬縷絲。玉輦不來春又老。聲聲訴與落花知。

花港觀魚

斷汶惟餘舊姓傳。倚闌投餌說當年。沙鷗曾見人興廢。近日遊人又玉泉。

南屏晚鐘

涑水崖碑半綠苔。春遊誰向此山來。晚烟深處蒲牢響。僧自城中應供回。

三潭印月

塔邊分占宿湖船。寶鑑開匳水接天。橫玉叫雲何處起。潭心驚覺老龍眠。

兩峯插雲

浮屠對峙絕攀躋。積翠浮空霽靄迷。試向鳳凰山上望。南峯天近北峯低。以上咸淳臨安志。

寶祐丙辰余奉漕檄經從得識九鎖山面目咸淳乙丑歲除前五日以帥檄遵奉朝旨四縣疎決回塗重游時積雪初霽瓊瑤境界恍非人世得七言一章錄呈菊巖龔先生

九鎖山寒玉作圍。紅塵世事可曾知。峯迴似覺前無路。身到因思舊有詩。雲掩巖扉龍墊冷。月明華表鶴歸遲。梅花笑我真迂闊。踏雪重游臘盡時。洞霄詩集。

文天祥

天祥字宋瑞。一字履善。吉安人。寶祐四年進士第一。度宗朝累遷直學士院。知贛州。德祐初除右

丞相兼樞密使。元兵至。奉使軍前被拘。亡入真州。泛海至温州。益王立。拜右丞相。以都督出江西。兵敗被執。囚于燕京。四年不屈。死柴市。有指南吟嘯等集。

敬和道山堂慶瞻御書韻

墨灑天奎映籀紅。斯堂殿閣與俱隆。方壺圓嶠神仙宅。溫洛滎河造化工。列聖文章千載重。諸孫聲氣一時同。著庭更有邦人筆。稽首承休學二忠。著作之庭。乃胡忠簡公書。周文忠公立。

游青原

鐘魚閑日月。竹樹老風烟。一徑溪聲滿。四山天影圓。無言都是趣。有想便成緣。夢破啼猿雨。開元六百年。空庭橫蠨蛸。斷碣偃龍蛇。活火參禪筍。真泉透佛茶。晚鐘何處雨。春水滿城花。夜影燈前客。江西七祖家。以上文山集。

南華山

北行近千里。迴復迷西東。行行望南華。忽忽如夢中。佛化知幾塵。患乃與吾同。有形終歸滅。不滅惟真空。笑看曹溪水。門前坐春風。

金陵驛

草舍離宮轉夕暉。孤雲飄泊復何依。山河風景元無異。城郭人民半已非。滿地蘆花和我老。舊家燕子傍誰飛。從今別卻江南日。化作啼鶻帶血歸。以上指南錄。

遇異人指示作五言八句

誰知真患難。悟此大光明。雲散天仍在。風休水自清。功名幾滅性。忠孝太勞生。此意如能會。神仙亦可成。
上元懷舊

禁門三五金吾夜。回首青春忽二毛。池上昔陪王母宴。斗中今直貴人牢。風生江海龍游遠。月滿關山鶴
唳高。夢到鈞天燈火鬧。依然彩筆照宮袍。以上吟嘯集

理宗度宗在燕京獄中

先帝弓劍遠。永懷侍芳茵。今朝漢社稷。爲話涕霑巾。

誤國權臣似道喪邦之政不一而足其竊虜使開邊釁則兵連禍結之始也哀哉

蒼生倚大臣。北風破南極。開邊一何多。至死難塞責。

京城

當宁陷玉座。兩宮棄紫微。北城悲笳發。失涕萬人揮。

陵寢

五陵花滿眼。霜露在草根。冥冥子規叫。重是古帝魂。以上文山集杜

邳州哭母小祥九月七日

我有母聖善。鸞飛星一周。去年哭海上。今年哭邳州。遙想仲季閒。木主布筵几。我躬已不閱。祀事付支子。使我早淪落。如此終天何。及今畢親喪。于分亦已多。母嘗教我忠。我不違母志。及泉會相見。鬼神共懽喜。

過淮

北征垂半年。依依只南土。今辰渡淮河。始覺非故宇。故鄉已無家。三年一羈旅。龍朔在何方。乃我妻子所。昔也無柰何。忽已置念慮。今行日云近。使我淚如雨。我爲綱常謀。有身不得顧。妻兮莫望夫。子兮莫望父。天長與地久。此恨極千古。來生業緣在。骨肉當如故。

亂離歌六首

有妻有妻出糟糠。自少結髮不下堂。亂離中道逢虎狼。鳳飛翩翩失其凰。將雛二三去何方。何虞國破家又亡。不忍舍君羅襦裳。天長地久遠茫茫。牛女夜夜遙相望。嗚呼一歌兮歌正長。悲風北來起彷徨。

有妹有妹家流離。良人去後攜諸兒。北風吹沙塞草萋。窮猿慘淡將安歸。去年哭母南海湄。三男一女同歎歎。惟汝不在割我肌。汝家零落母不知。母知豈有瞑目時。嗚呼再歌兮歌孔悲。鵲鴿在原我何爲。

有女有女婉清揚。大者學帖臨鍾王。小者讀字聲琅琅。朔風吹衣白日黃。一雙素璧委道旁。雁兒雁兒秋無梁。隨母此去誰人將。嗚呼三歌兮歌愈傷。非爲兒女淚淋浪。

有子有子風骨殊。釋氏抱送徐卿雛。四月八日摩尼珠。榴花犀錢落繡襦。蘭湯百沸香似酥。歛隨飛藿飄泥塗。汝兄十三騎鯨魚。汝今三歲知在無。嗚呼四歌兮歌以吁。燈前老影明月孤。

有妾有妾今何如。大者手將玉蟾蜍。次者親抱汗血駒。晨妝靚服臨西湖。英英雁蕩飄瑤琚。風花亂墜鳥嗚呼。金鏡沈澗浮汗渠。天摧地裂龍虎徂。美人塵土何代無。嗚呼五歌兮歌鬱紆。爲爾迎風立斯須。

我生我生何不辰。孤根不識桃李春。天寒日短空愁人。北風吹隨鐵馬塵。初憐骨肉鍾奇禍。如今骨肉更憐我。汝在空能嬰我懷。我死誰當收我骸。人生百年何醜好。高粱得喪俱草草。嗚呼六歌兮勿復道。出門

一笑天地老。

收柳女信痛割腸胃人誰無妻兒骨肉之情但今日事到這裏于義當死乃是命也奈何奈何塗中有三詩今錄至言

至于此淚下如雨。一讀此三詩便知老兄悲痛真切之情事至于此爲之奈何。兄事祇待千二哥至造物自有安排。一可將此詩呈

嫂氏歸之天命仍語靚妝孺英不曾周旋得毋怨毋怨徐妳以下皆可道達吾此意當此天翻地亂人人流落天數奈何奈何。一可令

柳女環女好做人爹爹管不得淚下哽咽哽咽。一此詩本仍可納之千二哥。兄天祥家書達百五賢妹。

鐵網珊瑚張翥跋云右文信公遺墨前參知政事本齋王公所藏公歿已久家人理篋書尺叢積顧是紙損爛將裂以拭扞

匪公之子季境適至識爲信公書咄咄驚異亟命裝池以完嗚呼豈非有神物守護之歟不然英靈之氣不泯而致之歟先賢

尺牘人尙皆藏弄之矧信公之精忠偉烈靈耀古今翰墨光芒垂示臣子

者乎不惟王氏寶之百世而下固夫人之所同寶也史官河東張翥書

羅椅

椅字子遠號礪谷廬陵人饒雙峯高第寶祐四年登第以秉義郎爲江陵教改潭州及宰贛之信
豐遷提轄榷貨度宗升遐失于入臨論罷。

吳江雪霽圖

天上清流雪片人間名勝吳淞兩賢相厄已甚賴得斜陽半峯。詩家鼎鑿

次劉孟元見贊韻

坐久不知夜飢餓窺瓦檠詩徒吟樂國酒不打愁城白雪夫君句黃花老我情商量能住否膽欲飲公榮。
翰墨大全

寄危驪塘贈以古鑑

百尺樓頭山雨長。夢提白髮濯滄浪。從渠金帶花成蔕。何處魚羹飯不香。語妙囊中了今古。騷成肘後繫瀟湘。山寒歲晚蘭苗盛。欲當包茅獻草堂。詩林萬選

幼輿折齒歌

秋衫未成錦機語。棠梨半花鳳一羽。象牀雪綜小龍梭。細穴銀光口冰縷。西鄰郎君東海歸。芙蓉半白杏雨肥。十二闌邊說幽怨。勸織南浦鴛鴦飛。匿蘭含蕙無消息。春醒彤霞漾玉色。小龍呼出風雨聲。奔騰觸裂雙白石。白石國城三十六。女子軍來兩城覆。鸞歌猿嘯強激昂。百戶風來如箭鏃。章臺公子真豪縱。復以微言相感動。郎君切莫更癡心。忍作甘心可人痛。乾坤清氣

吳琳

琳字禹玉。號存吾。潛之子。寶祐四年進士。倅婺州。

題鹿田西寺壁

爲從吏隱招提宿。相望城中隔幾塵。雲暗雨來疑是晚。山深寒在不知春。鋤松得石添幽徑。接竹通泉隔近鄰。此去又尋三洞約。初平應怪我來頻。吳禮部詩話

唐天麟

天麟嘉興人。寶祐四年進士。

烟雨樓

百尺樓高足賞心。我來猶記舊登臨。四時天色有晴雨。一片湖光無古今。遠塔連陰知寺隱。小舟穿柳覺春深。凭闌多少斜陽景。分付漁歌替晚吟。至元嘉禾志。

陳著

著字子微。號本堂。鄞人。寶祐四年進士。仕爲著作郎。出知嘉興。忤賈似道。改臨安通判。有本堂集。

題勝國院在奉化縣

轉路便幽深。曾來不用尋。寺依仙石腳。僧識老巖心。是處鬼無墓。此山松自林。滔滔未涯事。分付一蟬吟。延祐四明志。

陸夢發

夢發字太初。歙人。寶祐四年進士。官太府寺丞。德祐乙亥歿于上海。有烏衣集。

梅花

城中忙失探梅期。初見僧窗一兩枝。猶喜相逢那恨晚。故應更好半開時。今冬不雪何關事。值伴孤芳卻欠伊。月落山空正幽獨。慰存無酒且新詩。梅花鼓吹。

薛嵎

嵎字仲止。一字賓日。永嘉人。寶祐四年進士。終長溪簿。有雲泉集。

趙東閣曰。雲泉詩本用唐體。物與理稱。自成一家。

歲暮書懷

園林春又近，老態更無懼。添歲兒童喜，照貧燈火寒。直心嗟道喪，多事識才難。已種梅千樹，從今爛漫看。

寄宋希仁兄弟

咫尺不相見，閉門唯苦吟。聽殘寒夜雨，灰盡壯年心。身外一貧在，燈前百慮深。所欣交友義，白首到如今。

省試舟中

闕下春光近，囊金又一空。霜風吹敗絮，星斗隔疎篷。世道誰能挽，妻孥見未同。青燈對黃冊，銷盡幾英雄。

漁村

生涯小小落溪灣，妻子知時不說難。畢竟直鉤爲計拙，晚來無酒可銷寒。

松風隆首座住雲際禪院

山門開望海，鐘鼓動魚龍。人具慈悲相，秋生寂寞容。隨身惟一鉢，畱偈別雙松。後夜橋西月，支筇失所從。

自君之出矣

自君之出矣，抱此離恨情。春蠶不作絲，纏綿過一生。以上雲泉集。

陸秀夫

秀夫，字君實，楚州鹽城人。寶祐四年進士，累擢宗正少卿，兼權起居舍人。元兵入臨安，益王立于福州，進端明殿學士，同簽樞密院事。崖山破，負王赴海死。

鶴林寺

歲月未可盡。朝昏屢不眠。窗前多古木。牀上半殘編。放犢飲溪水。助僧耕種田。寺門久斷掃。分食媿農賢。
鎮江府志。

句

曾聞海上鐵斗膽。猶見雲中金甲神。挽張鄂州世傑。山房隨筆。

謝枋得

枋得字君直。號疊山。信州弋陽人。寶祐四年進士。咸淳中爲江東提刑。江西招諭使。景炎帝以枋得爲江東制置使。卽弋陽起義兵。軍潰。隱于閩。元徵聘。累辭不就。後福建行省魏天祐迫脅至燕。不食死。門人誄之曰文節先生。有疊山集。

北行別人

雪中松柏愈青青。扶植綱常在此行。天下豈無龔勝潔。人間不獨伯夷清。義高便覺生堪捨。禮重方知死甚輕。南八男兒終不屈。皇天上帝眼分明。

求紙衾

避世知無地。危身只信天。寧持龔夫一作勝扇。不著挺之綿。養性真同道。知心有箇緣。紙衾加惠絮。晴日臥雲邊。

春日聞杜宇

杜鵑日日勸人歸。一片歸心誰得知。望帝有神如可問。謂予何日是歸期。

慶全菴桃花

尋得桃源好避秦。桃紅又見一年春。花飛莫遣隨流水。怕有漁郎來問津。以上疊山集。

武夷山中

十年無夢得還家。獨立青峯野水涯。天地寂寥山雨歇。幾生修得到梅花。天地閒集。

菖蒲歌

有石奇峭天琢成。有草夭夭夏夏青。人言菖蒲非一種。上品九節通仙靈。異根不帶塵埃氣。孤操愛結泉石盟。明窗淨几有窗契。花林草砌無交情。夜深不嫌清露重。晨光疑有白雲生。嫩如秦時童女登蓬瀛。手攜綠玉杖徐行。瘦如天台山上聖賢僧。休糧絕粒孤鶴形。動如五百義士從田橫。英氣凜凜摩青冥。清如三千弟子立孔庭。回琴點瑟天機鳴。堂前不入紅粉意。席上常聽詩書聲。怪石篠簜皆充貢。此物舜廟當共登。神農多智入本草。靈均蔽賢遺騷經。幽人耽翫發仙興。方士服餌延修齡。綵鸞紫鳳琪花苑。青蚪玉麟芙蓉城。上界真人好清淨。見此靈苗當大驚。我欲攜之朝上帝。太清瑤草不敢專芳馨。玉皇一笑畱香案。賜與有道者長生。人閒千花萬草盡榮豔。未必敢與此草爭高明。宋遺民集。

柴隨亨

隨亨字剛中。號瞻帖居士。寶祐四年進士。知建昌軍事。宋亡。與其兄望弟元亨元彪。隱于櫟林九礫之閒。人稱柴氏四隱。

題白雲菴

散策入禪扉。愁城酒解圍。泥黃肥客屨。雲淡護僧衣。心事溪相照。吟情雨帶歸。未盟泉石隱。林鶴背人飛。

江行卽事

讀罷騷經手自抄。紉蘭歸計勝誅茅。新蠶食葉將成繭。舊燕銜泥旋補巢。菜老花隨黃麥落。草長色與綠楊交。一春過盡三之二。閑倚東風憶孟郊。

錢唐寒食

絮花如雪草如茵。寒食清明處處春。惆悵錢唐門外路。今年人哭去年人。以上柴氏四隱集。

舒岳祥

岳祥字舜侯。台州寧海人。寶祐四年進士。官奉化尉。終承直郎。宋亡不仕。有篆畦橐。蜚軒橐。竹梧里橐。蓀野橐。學者稱閬風先生。

古意

客從南方來。遺我薰風琴。薰風未易致。且奏易水吟。高浪忽起立。四顧變愁陰。征馬立躊躇。旁人淚霑襟。壯士不畏死。怒髮豎森森。長揖辭四座。秦關無阻深。燕客視秦王。已若置中禽。一朝事不成。易水有悲音。請君且勿彈。此曲傷人心。

一春四十日天氣未佳花事行復已矣太息成吟

積翠林塘十畝陰。雨中不覺□□□。江山萬里登樓眼。宇宙千年隱几心。有客不來還日暮。掩書無語自春深。倚闌欲數排簷竹。故故飛花點客襟。以上赤城詩集。

天門山

烟樹連天遠，漁樵兩地分。仙舟滄海路，僧錫石橋雲。落日人行少，空村犬吠聞。誰知隱淪者，絕迹在人羣。

石臺紀遊

蒼山面長溪，勢若飲奔馬。層臺跨其脊，萬古絕蕭灑。登臨惟茲時，朋從未云寡。迢迢歷榛莽，靡靡眺原野。白雲與翠霞，盪在履鳥下。窮秋向搖落，霜菊摘盈把。賞心孰與同，幽抱欣已寫。邈矣千載期，名山俟來者。
以上台州府志。

楊白花

楊白花，懊惱隨風渡江水。將心莫託少年郎，少年一行輕萬里。楊條插地便生根，花性飄揚似夢塵。恨不築城高萬丈，花飛莫放出重門。珠簾繡柱香雲護，祇有黃鸝知去路。
宋藝圃集。

唐元齡

元齡，新建人，寶祐進士，樂安令。

鬱林寺

一徑通深窈，叢林獨蔚然。神仙棲佛屋，香火當僧田。罕見催租吏，誰談文字禪。吳儂來拜朔，僂指滿三千。
西江詩話。

潘希白

希白，字懷古，號漁莊，永嘉人。寶祐中登第，幹辦臨安府節制司公事。德祐中起爲史館檢校，不赴。

送蔣朴之維揚

隋家天子愛揚州。四十離宮取次遊。荆棘久迷秦隴路。柳絲空拂汴河流。君才清似庾開府。世事難于孫仲謀。莫爲青山怯騎馬。卻將風景付閑愁。

入南溪

沙頭落月照篷低。杜宇誰家樹底啼。舟子不知人未起。載將殘夢上南溪。以上東甌詩集。

史季溫

季溫字子威。眉山人。舉進士。寶祐中官祕書少監。

遊鼓山

上到瓊峯第幾閒。御風騎氣渺人寰。天高陡覺星辰近。地迴偏饒日月閑。去海茫茫疑十里。望州隱隱見三山。武夷榜墨千年在。任使重厓薛字斑。鼓山志。

朱杰

杰字子俊。金華人。寶祐中豐城令。

遊九鎖山

九天虎豹不守關。瑤京夜半墮塵寰。化爲青山故曲折。中有玉殿開仙班。白龍天來三百丈。飛沫直下琉璃灣。神仙可望不可接。桃花伴我歸人閒。洞霄詩集。

侯畱

鬲字道子樂清人以武舉仕寶祐閒爲海州通判李松壽據山東突出漣泗慶城下死之賜廟旌忠諡節毅有霜崖集

暮雨

暮雨生寒衣袂薄楚鄉客子正傷情扁舟莫向蘆邊宿夜半西風有雁聲東甌詩集

會極

極字景建臨川布衣文定公弟宰之後以詩語訕謗謫道州卒有春陵小雅金陵百詠

寄蔡西山時在道州貶所

四海朱夫子徵君獨典刑青雲伯夷傳白首太元經有客憐孤憤無人問獨醒瑤琴空鎖匣弦絕不堪聽後村詩話

往春陵作

挾策行行訪楚囚也勝流落嶠南州鬢絲半是吳蠶吐襟血全因蜀鳥流徑窄不妨隨繭栗路長那更聽鉤輅家山千里雲千疊十口生離兩地愁

鶴林玉露渡江以來詩禍殆絕唯寶祐閒中興江湖集出劉潛夫詩云不是朱三能跋扈祇緣鄭五欠經綸又云東風謬掌花權柄卻忌孤高不主張散器之云梧桐秋雨何王府楊柳春風彼相橋曾景建云九十日春晴景少一千年事亂時多當國者

見而惡之並行貶斥景建謫春陵死焉往春陵詩云云

送曾泉州

隱然風節動朝行。屢叩龍墀貢卓囊。未促相如歸蜀道。翻令汲黯去淮陽。使藩自足榮萊服。邃殿誰當補舜裳。急召諸賢固根本。蠶書早晚出明光。濂洛風雅。

和謝康樂華子岡韻

隱仙無定在。館宇非一山。華子出商洛。巢雲俯渴泉。羸顛劉蹶際。師生自爲賢。頗哀區中人。峯頂起新阡。決絕目下事。駕鴻凌紫煙。身隱焉用文。滅跡托空筌。雲仍散洲渚。世漁業相傳。笈笈挂虎落。舴艋當門前。蹇予厭世慮。企石聽潺湲。山空月明時。足音自趫然。

遊華子岡紅泉碧澗

去城纔半驛。深谷自透迤。藤絡崩崖石。松垂倒地枝。寒山束毛髮。碧澗照須眉。霜氣全消歇。空存太傅祠。以上撫州府志。

金陵百詠存二十九首

覆舟山 在城北五里。晉北郊壇。宋藥園壘。樂遊苑。冰井。甘露亭。皆在此山。

六代興亡貉一丘。繁華夢逐水東流。操蛇神 原注列子注。山海之神。皆操蛇。 向山前笑。三百年前幾覆舟。

秦淮 在縣南三里。始皇時。望氣者云金陵有天子氣。使朱衣鑿山爲瀆。以斷地脈。改金陵爲秣陵。晉陽秋。秦開故曰秦淮。或

云淮水發源。屈曲不類人工。

鑿斷山根役萬人。祖龍癡絕更東巡。石城幾度更新主。贏得淮流尙繫秦。

西浦 張碩遇杜蘭香處

珠璫錯落江臯佩。羅鞵輕盈洛浦妝。欲採蘋花擲春信。停橈難覓杜蘭香。

桃葉渡 一名南浦渡。金陵覽古在秦淮口。桃葉者晉王獻之愛妾名也。獻之詩云：桃葉復桃葉，渡江不用楫。但渡無所苦，我自迎接汝。不用楫者，謂橫波急也。獻之歌此送之。

裙腰芳草抱長隄。南浦年年怨別離。水送橫波山斂翠。一如桃葉渡江時。

臙脂井 陳末後主與張麗華乳貴嬪。投景陽井以避隋兵。舊傳云：欄有石脈，以帛拭之，作臙脂色。又名辱井。在法華寺。或云：

白蓮閣下有小池，面方丈餘。或云：在保寧寺覽輝閣側。

寒泉玉甃沒春蕪。石染臙脂潤不枯。杏怨桃羞嬌欲墮。猶將紅淚灑黃奴。

射殿 有七十間，旁多槐竹。

鶴蓋陰陰覆苑牆。更添蒼雪助清涼。高皇儉德規模遠。不作南朝石步廊。 李賀詩：春熱張鶴蓋，兔目宮槐小。蘇子瞻詩：蒼雪紛紛落夏簾。丁公言詩：困憶南朝石步廊。

古龍屏風 宣和舊物。高宗攜之渡江。後壞爛。宮官惜之，翦裁背成屏風，立殿上。

乘雲遊霧過江東。繪事當年笑葉公。可恨橫空千丈勢。剪裁今入小屏風。

新亭 在城南十五里。金陵覽古在江寧縣十里。洛陽四山園伊洛瀟瀟在中。建康亦四山園。秦淮直瀆在中。故云：風景不殊。舉目有山河之異。李白云：山似洛陽多。許渾云：祇有青山似洛中。謂此也。蔡靈作天津橋亦以此。

青山四合遠天津。風景依然似洛濱。江左于今成樂土。新亭垂淚亦無人。

賞心亭 下臨秦淮。盡觀覽之勝。丁晉公謂建。嘗以周昉所畫袁安臥雪圖。張于屏後。太守易去。續志又云。丁始與金陵。陸辭之日。真宗出入幅袁安臥雪圖。付丁謂曰。卿到金陵。可選一絕景處。張此圖。謂遂張于賞心亭。柱上有蘇子瞻題名。猶存。

柱上題名客姓蘇。江山清絕冠吳都。六花飛舞凭闌處。一本天生臥雪圖。

同泰寺 在臺城內。梁武帝窮竭帑藏。造大佛寺。閣七層。爲天火所焚。

布薩關齋涕泗揮。大通基在昔人非。此身終屬侯丞相。誰辦金錢贖帝歸。

宋興寺 劉裕故居也。

晉至昌明祚已終。識文猶有兩昏童。桓元偷得宮中璽。卻屬新河伐荻翁。

八功德水 在蔣山。悟真菴後。按梅摯亭記。梁天監中有胡僧曇隱。寓錫于此山中。乏水。時有龍眉叟。相謂曰。予山龍也。知師

飲渴。措之無難。俄而一泓沸成。後有西僧繼至。云本城八池。已失其一。似竭彼盈。此也。其泉一清。二冷。三香。四柔。五甘。六淨。七不鹹。八鐫疴。故名八功德水。自梁以後。常取給。

數斗供廚替八珍。穿松漱石瑩心神。中涵百衲煙霞色。不染齊梁歌舞塵。

謝元廟

兒輩能軍國未危。更令朱序助聲威。秦人若有全師集。雲母車盛晉鼎歸。

蔣帝廟

白馬千年繫廟門。爐煙浮動袞龍昏。闔棺謾說榮枯定。青骨猶當履至尊。

吳大帝陵

老瞞虎裂橫中州。何物生兒作仲謀。四十帝中功第一。壞陵無主使人愁。

卞將軍墓

握節顏公拳透爪。歸元先軫面如生。晉陵發掘今無主。獨有忠魂只冶城。

張麗華墓

在賞心亭天井中間有光氣如匹練掬之如水銀漸流散。

伴侶聲沈王氣銷。香魂血澆有誰招。蓬科三尺光塵在。猶作臺城花月妖。

臺城

紫蓋橫天整復斜。興亡接翅似昏鴉。舊時石闕摩雲處。荻屋荆扉一兩家。

李氏宮

本朝修李氏宮。掘地得水銀數十斛。宮娥棄粉膩所積也。事見湘山野錄。

埋愁無地柰君何。可是黃壚飲恨多。玉鏡臺前棄脂水。深泉流汞尙盈科。

華林園

羽葆來臨鼓吹停。華林暢飲倒長瓶。萬年天子瞢騰眼。錯認長星作酒星。

昇元閣

今之昇元閣。非古基矣。石柱二。見屹立右軍教場中。昇元閣一名瓦棺閣。乃梁朝建。高二百四十尺。

摩挲石柱蘚痕斑。亡國如鴻去不還。無復切雲三百尺。祇傳風鐸在人閒。

孫陵鵝眼錢

六代初終幾變遷。孫陵無樹起寒煙。青蚨細薄如榆莢。猶是當年買笑錢。

澄心堂紙

王直方詩話澄心堂紙。江南李後主所製。劉貢父詩。當時百金售一幅。澄心堂中千萬軸。

楮生玉面霧深藏。未肯橫陳翰墨場。一幅降牋何用許。價高緣寫宋文章。

德慶堂字

李主所書。南唐但餘此物。李主筆法有鐵鉤鎖。

森然筆勢聚干將。氣軋鍾王未肯降。惆悵當年鐵鉤鎖。可能無意鎖長江。

三段石

上元縣南三十里有段石岡。丹陽記云有大碣石長二丈。折爲三段。紀吳功德。其文東觀令華嚴作。其字大篆。或又云皇象書也。今移在府中。

凜然皇象法書存。重屋應無野火焚。割據英雄餘一念。斷碑千載尙三分。

校官碑

在溧陽縣官廨。

風摧雨剝校官碑。集古先生竟不知。同是光和千歲刻。未容苦縣獨稱奇。

石步道中有石麒麟數十

地悴天荒工隴平。難從野老問衰興。蒼烟落日低迷處。折足麒麟記壞陵。

鳳州柳

鳳州柳。蜀主與江南結婚。求得其種。鳳州出手柳酒。

蜀主函封遣使時。芳根元自鳳州移。柔荑醞醪今安在。唯有青絲拂地垂。

青松路

王介甫手種松。

致君堯舜事何難。投老鍾山賦考槃。愁殺天津橋上客。杜鵑聲裏兩眉攢。以上方輿勝覽。

翰墨大全。羅欄谷。謝景建。惠金陵百詠書云。黍苗離離。麥秀芘芘。芘古宮于荒畦。撫頽城于

野草。僕悲馬懷之歎。至百詠極矣。不知景建是何肺腑。能辨此等惱人言語于千載之下耶。

宋詩紀事卷六十八

錢唐厲鶚緝

錢唐金志章勘定
丁敬

吳大有

大有字有大號松壑。嵯縣人。寶祐開遊太學。率諸生上書言賈似道姦狀。不遂。退處林泉。與林昉、仇遠、白珽等以詩酒相娛。元初辟爲國子檢閱。不赴。

饒陳隨隱歸臨川

我昔見君方成童。長吉才華驚鉅公。人間科第不屑就。直使聲名聞九重。乃翁引上凝華殿。子虛不待他人薦。入直來來凡幾年。天上奇書盡曾見。翩然歸去大江西。二疏父子還相隨。故鄉分得雲水地。卻喜不爽漁樵期。春雨騎牛對烟草。何如振衣隨龍五雲表。秋霜黃獨煨地爐。何如駝峯犀筍食天廚。林閒拾葉抄詩句。何如宮妃捧硯揮毫處。溪邊照影著荷衣。何如龍門應制奪錦時。鈞天夢斷難回顧。浩然合在山中住。金石臺前伴白雲。六年不踏西湖路。今日重來發長吁。忍看清平破草廬。盡拈書籍向人賣。歸買田園供荷鋤。乃翁齒髮落。倚門待兒斜日薄。孤山梅花帶不歸。卻喚扁舟載童鶴。隨隱漫錄。

遊天竺

編茅爲屋住。結葉作衣裳。不試燒金訣。唯尋煮石方。洗瓢溪月冷。采藥野雲香。常有仙家鶴。飛來繞石牀。

天竺寺志。

雜詩

兩年書問斷。湖海竟悠悠。一見心雖滿。相看淚忽流。彩烟山色暮。碧瀨月痕秋。明日登程去。鶴鴿沙上愁。山中多雨水。秋晚正妨農。病菜和根煮。新粳帶溼舂。擁沙埋廢井。墮石折枯松。寂寂猿啼晝。白雲藏數峯。客行情最苦。草草共清尊。萬水千山路。今朝好出門。

雁聲低度水村深。中有人敲月下砧。滿屋秋風燈欲暗。江山千里故園心。以上珊瑚網。

陳仁玉

仁玉號碧棲。仙居人。第進士。開慶中禮部郎中。兼崇政殿說書。除直祕閣。浙東提刑。兼知衢州。直敷文閣。

南峯寺藍光軒懷吳直翁

懷佳人兮山扃。躡烟霏兮步輕。蹇獨立兮山上。空山無人兮寒松自聲。懷佳人兮何許。白雲封關兮猿鶴看戶。羌有懷兮曷愬。風虛徐兮簷鐸語。辭佳人兮未來。聊逍遙兮容與。吳禮部詩話。

遊洞霄宮

天柱峯頭疊紫烟。遙看萬玉聳相連。雲深九鎖疑無路。翠豁一區俄有天。爽氣襲人森石樹。噴雷飛雨響山泉。脩然不類人間世。今日自驚平地仙。洞霄詩集。

題蘇端明書乳泉賦後

坡公謫海上。人傳已仙去。道逢章子厚。謫復返塵路。至言想世驚。猶闕乳泉賦。遙憐嵩山正。千古不可駐。
式古堂書考

陳宜中

宜中字與權。永嘉人。景定三年進士第二。德祐元年。除知樞密院參知政事。拜特進右丞相。元兵至臨安。宜中宵遁入閩。益王以爲左丞相。井澳之敗。宜中如占城不反。後歿於暹。

如占城經吳川極浦亭

顛風吹雨過吳川。極浦亭前望遠天。有路可通環嶼外。無山堪並首陽顛。溪雲起處潮初長。夜月高時人未眠。異日北歸須記取。平蕪盡處一峯圓。廣東通志

丁開張中行

開字復見。長沙人。負氣敢言。安撫向士璧被問。開獨詣闕上疏。具陳士璧有大功。軍府小費。不宜推究。書奏。羈管揚州。歲餘卒。

可惜

日者今何及。天乎有不平。功高人共嫉。事定我當烹。父老俱嗚咽。天王本聖明。不愁罹黨禍。攜淚向孤城。

漂泊岳陽遇張中行泛舟洞庭晚宿君山聯句

元氣無根株。開地脈有斷絕。中行日月互吞吐。開雲霧自生滅。中行楚妃結幽想。開巴客蒼清映。中行寧知莽蒼中。不假巨鼇力。勢閱南紀浮。開思隨西風發。形影寄孤舟。中行吾道成鳩舌。笑談正凌傲。開俯仰

不偏側。每與景物會。中行未省歡娛畢。疊翠晚悒悒。開墮黃秋。的的魚龍負最屨。中行獨鳥去不息。曠原
眇周抱。開異境超恍惚。徑度萬頃空。中行忽得一拳碧。稍稍雞犬近。開依依鐘梵夕。推門月微墮。中行煮
茗香初歇。衣裳識霜信。開瓶鉢了禪悅。事定心源清。中行夢回斗柄直。周游興欲盡。開長往計未決。出門
更回首。中行沙水盡虛白。美哉神禹功。開已矣三苗國。山川長不朽。中行愚智俱可惜。神交正冥冥。開指
點空歷歷。甚勿語俗人。中行桃源恐相失。開

建業

誰遣淒涼滿眼中。蘋花渺渺又秋風。龍蹲虎踞江山大。馬去牛來社稷空。縱有千人惟諾諾。本無百歲更
怱怱。乾坤顛倒孤舟在。聊復殘生伴釣翁。

揚州歲莫

萬國回春日。層城晚眺餘。江聲隔吳楚。原色到邳徐。大閱軍容壯。狂歌客禮疎。百年寒荻裏。風雨憶吾廬。
以上各音。

呂人龍

人龍字首之。淳安人。景定三年進士。終承務郎。有鳳山集。

春歸

過卻清明豔冶天。梨花飛雪柳森煙。欲憑鶯燕畱春住。無奈東風信杜鵑。青溪詩話

宿建興寺

路入招提晚更深。萬山秋老薄寒生。芙蓉枝上無多雨。自把孤懷滴到明。

嚴州府志

方逢振

逢振字君玉。逢辰弟。景定三年進士。歷國史實錄院檢討。遷太府寺簿。宋亡歸隱風潭。有山房集。風潭精舍偶成。

茅屋三間一塢雲。此窩眞足養吾神。不知逐鹿斷蛇手。但見落花啼鳥春。石几梅餅添水活。地爐茶鼎煮泉新。古今天地何窮盡。媿我其閒作散人。

山房集

徐天祐

天祐字受之。山陰人。景定三年進士。與王修竹齊名。

洛思山

在蕭山。昔有洛下人隨太尉朱雋來會稽。三年不得返。乃登山北望而歎。故名。

歸去蹉跎歲月深。羈愁無奈故鄉心。人生畢竟俱懷土。莊鳥當時自越吟。

方干疊

在鑑湖中一名箭莊。

平生心事白鷗知。一卷雲菴處士詩。占得鏡中奇絕處。祇緣身值廣明時。

白樓亭

世說孫興公許元度共在白樓亭商略先往名達。林公既非所屬。聽訖云。二賢故自有才情。

江左名流共往還。白樓何許只青山。不須商略閑今古。物換星移俯仰閒。

許詢園

在蕭山。許詢嘗登永興縣西山築室其上。蕭然自放。乃號其岫爲蕭山。

高棲不受鶴書招。北幹家園久寂寥。明月空懷人姓許。故山猶自岫名蕭。

錢王祠

石鏡山前結駟遊。故鄉霞錦徧林丘。祇今東府空遺廟。露立唐碑老樹秋。以上紹興府志。

宗必經

必經字子文。南昌人。景定三年進士。通判瑞州。宋亡入元。世祖詔求江南人才。畱夢炎程文海交薦。固辭。械至燕。繫獄三歲放還。有玉溪集。

孺子亭

連天大廈莫容身。小向湖邊一問津。心事說知林下郭。姓名誤入府中陳。半篙綠水三閒屋。一榻清風百世人。只有青青隄上柳。至今猶是漢時春。

滕王閣

高閣連城十二闌。西風領客共躋攀。半簾烟雨長空外。千里江湖咫尺閒。鴈帶秋聲歸別浦。鶯分春色過巴山。當年蛺蝶知誰畫。一夢莊周去不還。以上南昌府志。

家坤翁

坤翁號頤山。眉州人。景定三年。以戶部郎中知撫州。

遊金石臺

撫州羊角山北崖有石岡南向曰金石臺。

廬陵遊樂夕陽山。太守何人若是班。三疊幻成一丘小。五峯對峙兩溪環。竹間庭院鄰翁卜。木杪樓臺仙者寰。紫笑扶疎枝幹老。春來得興頗開顏。撫州府志。

陳郁

郁字仲文，號藏一。臨川人。理宗朝充緝熙殿應制。景定間充東宮講堂掌書兼撰述。德祐乙亥卒。

撫州府志：度宗嘗贊郁像云：文窺西

漢詩到盛唐，侍予左右知汝忠良。

石湖歸途

人與西風結約來，芙蓉花氣撲吟杯。曲塘好處都行徧，帶得一身秋色回。

東園書所見

娉婷游女步東園，曲徑相逢一少年。不肯比肩花下過，含羞卻立海棠邊。

城東看柳

翻煖爲寒一信風，畫橋南北岸西東。春歸楊柳無私意，深淺青黃自不同。

蘇隄曉望

荷邊清露襲人衣，風裏明蟾浴曉池。涼影潤香吟不得，手扳堤柳立多時。

景靈宮恭謝駕回丞相以下皆簪花

幸驂恭謝觀繁華，馬上歸來戴御花。老婦稚兒相顧問，也頌春色到詩家。以上隨隱漫錄。

賦翁仲限久字韻

銅仙擎露秋風表，珍重劉郎千萬壽。老瞞攘鼎貽孫謀，因逼此仙俱受垢。仙寧折骨拒非招，恥爲姦雄效。

奔走。汚名翁仲俾司門。口不能言心自否。洛陽宮殿一灰飛。天上此標獨長久。君不見堂堂冠劍隱滕城。萬古六丁驅鬼守。

隨隱漫錄。抱獨山人跋云。紹定壬辰九日。徐逸觀陳藏一所作翁仲詩。命意布辭。灼見魅鄉。呼魄指寃。俾受言獎。如在荆棘中。流涕而語往事。嗚呼。如詩人忠憤之心。隨事而見。可勝歎哉。因執筆惘惘而書。

劉辰翁

辰翁字會孟。廬陵人。少登陸象山之門。補太學生。景定壬戌。廷試對策。忤賈似道。置丙第。以親老。請濂溪書院山長。薦居史館。又除太學博士。皆固辭。宋亡。隱居卒。有須溪疏。

蘇李泣別圖

事已矣。泣何爲。蘇武節。李陵詩。噫。

送李鶴田入浙赴趙春谷招

天下南北車書通。行人點點過汴宮。空餘艮嶽一拳土。黯慘如雪吹不融。平乘樓上王夷甫。一流中外淚如雨。西風羽扇不障塵。更是蓮子隨根去。政事堂中三相公。往往退食如夔龍。少年慟哭不見用。一語不合面發紅。八年流落無處所。合眼當朝竟如許。忠魂不到海門潮。別殿芙蓉廢爲圃。茫茫古路日平西。不信金銅不淚垂。浮沈親故嬾相問。白髮唯有春風知。李侯髀肉堪流涕。同谷哀吟越州弟。買絲刺繡刺未成。公子翩翩鴈書至。飄飄起望白雲閒。裘雪牛車度赤山。年餘七十能幾見。我且欲往窮當還。平生高李經行處。寂寞斷橋漂落絮。不知到日似枯魚。淚入黃河別魴鱖。當空殿閣密雪團。曾和薰弦接羽翰。至今

尙畱花石否。杜鵑再賦長恨端。蘇州正念東鄰女。傷心更遇楊開府。語言憔悴敢分明。買酒行澆茂陵土。
讀杜拾遺百憂集行有感

我生行年將六十。不知何者爲憂戚。富貴不驕貧賤安。以此存心度朝夕。往年承乏佐中書。大官羊膳供
堂食。只今賜老作編氓。衣食信天無固必。陋巷箪瓢如素居。不管茅茨春雨溼。門前載酒求賦詩。錦軸牙
籤日堆積。在官不置附郭田。既老翻得稽古力。毀譽都忘月旦評。姓名不上春秋筆。朝米不煩鄰僧送。暮
米不煩太倉糴。我亦一飯不忘君。文人相輕所不及。傷哉白首杜拾遺。入蜀還秦勞轍迹。文章蓋世亦何
爲。妻子相看百憂集。

龍霧洲雪

此處幾人行。隔波搖暮晴。洲迴江似玦。山遠雪如城。離合看雙櫓。荒寒又一程。今年梅未醉。最覺別來輕。
夜雨

夜半起雷車。天門報曉衙。何消如此雨。又有未開花。繡被人中酒。茅簷客夢家。一晴天地闊。稽首見重華。
清明日偶成

海日高高天欲斜。斷橋無復聽嘔啞。墓中醅酎已千載。陌上清明有幾家。已老愈疎唯酒盞。更晴相覓是
梅花。年年春怨深如昨。莫把無涯恨有涯。

春晴

江柳長天草色齊。新晴何物不芳菲。無因化作千胡蝶。西蜀東吳款款歸。

探梅

江天欲雪未雪時。絕江探梅驢倒騎。空中著我方成畫。亂後逢花且賦詩。以上須溪集。

初晴

初日入高樓。歸雲雜江樹。魚游新雨晴。鳥語晨光吐。天容起復觀。烟色轉輕素。牆草麗車前。巷溝映泥路。窗明祛宿潤。礎泫滑微步。會朝有宿客。過午無來屢。沿砌上蟻衣。虛庭竿犢袴。人生足無事。世故非所慮。彼語吾不聞。清風有時度。

戲題

無人知坦腹。水影半簾苔。驚謂青蟲墮。垂絲忽上來。

春歸

畱春一日不可種樹十年未成。芳草斷腸花落。綠窗攜手鶯聲。以上天下同文集。

宣和雙蟹圖卷款題已未前史臣某。

講餘幾暇諫書空。良嶽江湖入眼中。郭索能令天一笑。畫圖何必面春風。邵氏書畫題跋記。

錢舜選

舜選號春塘。吳江人。

景定癸亥特旨以布衣陳隨隱除東宮掌書作詩賀之

吟筆何須管用銀。日供撰述聖恩新。只今已脫凡塵去。便作金丹換骨人。

夜泛孤篷載月船。靜搜吟料六橋邊。詩成上達宸聰了。流落人間到處傳。

紀夢

翠峯巖峩三十六。寒泉落空響哀玉。整花石路勢縈紆。玉闌干護修筠綠。雪髯老人負紫瓢。金絲摩尾遙相招。紅螺酌酒湛湛碧。坐倚蒼石吹洞簫。孤鶴來傳天上詔。老人挽余偕一到。飄飄高舉凌青冥。直過罡風履黃道。祥光樓閣倚崢嶸。神虎守關森衛兵。雙闔朱扉忽微啓。中有靈官來遠迎。絳衣持斧立丹陛。玉皇手中玉如意。雲璈風瑟自宮商。天聲清越非人世。帝旁青童傳帝宣。文華宮中呼謫仙。謫仙顧余笑且言。子宜亟反來他年。探懷贈我五色筆。子當寶之慎勿失。濃香氤氳迷帝所。長揖老人下西廡。身從日月上頭行。俯視斗杓分子午。雲氣相隨步武生。過耳但覺松風鳴。覺來握筆紀佳夢。月明樓鼓擲三更。以上隨隱漫錄。

示姪

才過中年百念輕。獨於風月未忘情。貧將入骨詩方好。事不縈心夢亦清。萬卷難圖金馬貴。一篷當與白鷗盟。幸然不作諸侯客。猶恐江湖說姓名。詩家鼎鑿。

韋居安

居安、吳興人。宋季進士。司糾三衢。著梅磻詩話。

景定壬戌得數椽於城南慈感渡。側詢之故老云。距賈耘老水閣舊址不遠。因作五言八句。卜居求靜處。喜傍碧溪灣。隔岸高低柳。當軒遠近山。天開圖畫久。人共水雲閑。聞說賈耘老。舊曾居此閒。

梅磻詩話

凌萬頃

萬頃字叔度號松臞崑山人景定進士

劉龍洲墓

嘗隨薦鶚上天關肯信荒山泣斷魂百歲光陰隨酒盡一生氣槩祇詩存冢傾平地藤蘿合碑倚空巖霧雨昏縱是紙灰那得到落花寒食不開門崑山縣志

錢選

選字舜舉號玉潭吳興人景定閒鄉貢進士家有習嬾齋因自稱習嬾翁雪川翁清臞老人皆其別號也

清河書畫舫錢舜舉與趙子昂同里並在吳興八俊中至元閒子昂徵入功名赫赫諸人皆依附取官獨舜舉齟齬不合流連詩畫以老

春暮

晴日溪光動草堂兩峯浮翠瞰滄浪獨揮羽扇成何事更嘆芒屨爲底忙一水澄清魚避影萬紅狼藉蝶分香東風自是無情物白日楊花莫漫狂

友人判太平歸來詩卷

宮錦翩翩五色鱗如君端合侍楓宸山中老去陶弘景湖曲歸來賀季真上界神仙足官府此身城郭舊

人民還鄉我結同盟社。只看桃花莫問春。

春日卽事

十日春風暄且妍。溪頭花柳競相鮮。美人遙隔山川外。社雨忽來尊俎前。白髮青春猶故我。夕陽幽草自新阡。五陵公子莫相笑。曾散黃金樂少年。

雜書

地僻秋深戎馬閒。一尊隨處且開顏。誰思銅雀埋黃土。但憶金人出漢關。六合茫茫天共遠。五湖杳杳雁飛還。中年陶寫無絲竹。王謝風流莫強攀。以上丘吉吳興絕唱。

仇書圖

兩兩挾策遊康衢。聚戲不異同隊魚。忽然兒態起爭競。捐棄篋笥仇詩書。

自題浮玉山居圖

瞻彼南山岑。白雲何翩翩。下有幽棲人。嘯歌樂徂年。叢石映清泚。嘉木淡芳妍。日月無終極。陵谷從變遷。神襟軼寥廓。興寄揮五弦。塵影一以絕。招隱奚足言。

題桃源圖

始信桃源隔幾塵。後來無復問津人。武陵不是花開晚。流到人閒卻暮春。

題洪厓先生像卷

神駕馭景颺。太虛時總轡。元道不可分。直悟天人際。羣從皆成仙。玩世不計年。何當事神遊。許我笑拍肩。

題竹林七賢圖

昔人好沈酣。人事不復理。但進杯中物。應世聊爾爾。悠悠天地閒。媮樂本無媿。諸賢各有心。流俗無輕議。
以上珊瑚網。

題秋茄圖

憶昔毗山愛寫生。瓜茄任我筆縱橫。自憐老去翻成拙。學圃今猶學不成。

雪溪翁雪霽望山圖并引

至元二十九年。余畱太湖之濱。雪霽舟行溪上。西望弁山。作此圖。且賦詩云。

弁山之陽冠吳興。嵒嶙巖嶺望不平。煥然仙宮隱其下。衆山所仰青復青。雪花夜積山如換。乘興行舟須放緩。平生不識五老峯。且寫吾鄉一奇觀。

倚天蒼弁獨崔嵬。仙闕遨遊媿不才。攬鏡頻嗟雙鬢改。推窗三見六花開。山中酒戶衝寒去。城裏行人踏雪來。安得時晴風日好。竹林深處且銜杯。
以上郁氏書畫題跋記。

何基

基字子恭。金華人。師事黃勉齋。景定五年。薦舉賢良。咸淳授史館校勘。兼崇政殿說書。不受卒。學者稱北山先生。賜諡文定。有集。

春日閑居

輕陰薄薄籠朝曦。小雨斑斑溼燕泥。春草塔前隨意綠。曉鶯花裏盡情啼。
宋藝圃集。

李 芾

芾字叔章。其先廣平人。徙汴。南渡。徙衡州。以蔭入仕。咸淳中。知潭州。兼湖南安撫使。德祐元年。元兵圍城。力盡死之。贈端明殿學士。諡忠節。

浯溪讀中興頌

羯鼓梨園跡已荒。斯文猶在日星光。我來細拂青苔石。不憶三郎憶漫郎。永州府志。

江萬里

萬里字子遠。號古心。都昌人。太學上舍出身。度宗朝。同知樞密院事。進參知政事。忤賈似道。退居鄱陽。元兵至。城陷。赴止水死。贈太師益國公。諡文忠。

水亭

結亭臨水似舟中。夜雨瀟瀟亂打篷。荷葉曉看元不溼。卻疑誤聽五更風。

絕句

草際春回殘雪消。強扶衰病傍溪橋。東風不管梅花落。自釀新黃染柳條。以上全芳備祖。

章 鑑

鑑字公秉。寧州人。以別院省試及第。累官權參知政事。遷同知樞密院事。咸淳十年。拜右丞相。兼樞密使。元兵逼臨安。鑑託故去。遣使召還。罷相。子祠。季年屏居山中有杭山集。

送道士歸得日觀

風月詩幾卷。江湖屐一雙。斷蛟懷劍石。跨鶴叩禪窗。土潤巖生雨。林幽寺隔江。歸當訪仙隱。相對酒盈缸。

杭山

買得漁磯繫釣船。魚龍吹浪駭鷗眠。從來白石清泉水。勝似青山小洞天。以上南昌府志。

許月卿

月卿字太空。婺源人。後字宋士。人稱山屋先生。理宗朝進士。歷承直郎。浙西運幹。賈似道當國。試館職。言不合。罷去。閉門著書。號泉田子。宋亡不出。十年而卒。有先天集。

追賦暮遊并序

余庚子冬。挈挈離廣陵。將肆奉常。試業于京師。舟泊無錫。日已暮。與王希聖微服遊南禪。蓋訪古也。參寥題名壁。無恙。寺記有碑。碑陰結字甚偉。視之。蔡京也。出門。烟樹蒼然。數僧偶語而已。余與希聖卻立四顧。曰。此佳景也。當寫之爲詩。而舉子業亂其中。不能就。暇日追想。宛在其目。爲詩以寄希聖。其明年冬十一月也。歲月驅人。又可一慨。

錫山舟泊似荒村。微服南禪古跡存。壁上姓名今已遠。碑陰人物了能言。薄遊草草寒侵袖。遠思悠悠風滿軒。攜手出門煙樹密。數僧離立語黃昏。

厭厭

厭厭夜飲忘更深。客不來辭主有情。僮僕觸屏成蝶夢。姬姜擊笛作蟬聲。月如有待行行慢。風不生噴細細清。萍散人生何可料。嬋娟千里共交盟。

吟蛩

吟蛩不管興亡事。舞蝶那分夢覺身。別浦連檣歸遠客。高山小徑過樵人。以上先天集。

丁石

石字實道。黃巖人。

景定壬戌除夜

羅列椒盤人未眠。紅爐圍坐笑燈前。時光過隙那知老。纔到雞鳴又一年。黃巖英氣。

專

